

ማቶሲ ዓፊዳ ዮሱስ ኪሪስቶስ ዎንጌላ ጋሳ ቆፋ

ማቶሳ ዎንጌላይ፥ ያና ጌቴቲዲ ኡፋይሳን ናጌቲያ አሼይሲ ዮሱሳ ጊዴይሳኔ ያሳይ ጋልዓ ጫቁዋን ባ አሳስ ኢሚዳ ኡፋይሳ ቃላ ፖሊዳይ ኢያ ባጋራ ጊዴይሳ አዲያ ዎንጌላ። ሃ ዎንጌላይ ዮሱሲ ኤንታ ጊዶን ዮሌቲዲ ዲጩዳ አይሁዶታ ዓላላስ ጊዶናሺን ኩሜሳ አላሚያ ኡባሳ።

ማቶሳ ዎንጌላይ፥ ዳሮ ናጌቴሳን ዓፊቲዳ ማፃፋ። ማቶሲ ባ ማፃፋ ዮሱሳ ዮሌቴሳን ዶሚዲ፥ ኢያ ዓማቁቴሳኔ ኢያ ፓጩቴሳ አዲ ሲሚዲ፥ ጋሊላን ኢ ሳባኪዳባ፥ ታማርሲዳባኔ ሃርጋንቾታ ፓሲዳባ አዴስ። ሄሳፌ ካሊዲ፥ ዮሱሲ ጋሊላፔ ዮሩሳላሜ ቢዳይሳኔ ኢ ሃ ሳዓን ዴዲዳ ዎዴ ወርሴሳ ሳሚንታን ሃኒዳባታ ቆንጨሴስ። ሄሲካ ኢያ ካቁቴሳ፥ ኢያ ሃይቁዋኔ ኢያ ዴንዱዋ አይኬስ።

ሃ ዎንጌላይ፥ ዮሱሲ ያሳ ሃጊያ ቢርሻናው ማቲ ዴዔይሳኔ ያሳ ካዎቴሳባ ታማርሲያ ጊታ አስታማሬ አሲዲ ሺሼስ። ኢያ ቲሚርቲያፌ ዳሪያ ባጋይ ዱማ ዱማ ማራን ጊጌቲዳ ኢቻሹ ኪፊሌታን ሻኬቴስ።

1. ያሳ ካዎቴሳን ዴዲያ አሳ ሃኖቴሳ፥ አሱዋ፥ ማታኔ ወርሴሳ ቃዳ አዲያ ዴሪያ ቦሳ ቲሚርቲያ (ሼም 5-7)።
2. ታማኔ ናምዑ ታማሬቲ ዎንጌላ ሳባካናው ቢዳ ዎዴ ኤንታው ኢሜቲዳ ካሌሱዋ (ሼም 10)።
3. ያሳ ካዎቴሳባ ታማርሳናው ሸቂዳ ዱማ ዱማ ሌሚሶታ (ሼም 13)።
4. ኢያ ታማሬ ጊዶባ ቢርሼሳ አዲያ ቲሚርቲያ (ሼም 18)።
5. ሃዲ አላሚያ ወርሴሳኔ ያሳ ካዎቴሳ ዮሳባ አዲያ ቲሚርቲያ (ሼም 24-25)።

ማቶሳ ዎንጌላ አይፌ ቆፋታ

ዮሱስ ኪሪስቶስ ዮሌቴሳ ሱሳኔ ኢያ ዮሌቴሳ 1:1-2:23

ዓማቂያ ዮሃንሳ አሱዋ 3:1-12

ዮሱሳ ጊንቃቲያኔ ፓጩቴሳ 3:13-4:11

ዮሱሲ ጋሊላን ባ አሱዋ አይኪዳይሳ 4:12-18:35

ጋሊላፔ ዮሩሳላሜ ጋካናው 19:1-20:34

ወርሴሳ ሳሚንታ ዮሩሳላሜ ሄራን 21:1-27:66

ጎዳ ሃይቁፔ ዴንዱዋኔ ቆንጨሳ 28:1-20

ዮሱሳ ዮሌቴሳ ሱሳ

(ሉቃ 3:23-38)

1 ሃይሳፌ ካሊዲ ፃፌቲዳይሲ ዳዊቴ ናዓ አብራሃም ናዓ ጊዲዳ ዮሱስ ኪሪስቶሳ ዮሌቴሳ።

2 አብራሃም ዮሳቃ ዮሊስ፤

ዮሳቂ ያይቆባ ዮሊስ፤

ያይቆቢ ዮሁዳኔ ኢያ ኢሻታ ዮሊስ፤

3 ዮሁዲ ቲዲማሪፔ ፋሬሴኔ ዛራ ዮሊስ፤

ፋሬሲ አስሮማ ዮሊስ፤

አስሮማይ ራማ ዮሊስ፤

4 ራማይ አሚናዳቤ ዮሊስ፤

አሚናዳቤ ናዓሶና ዮሊስ፤

ናዓሶኔይ ሳልሞና ዮሊስ፤

5 ሳልሞኔይ ራዓቢፔ ቦዔዛ ዮሊስ፤

ቦዔዚ ኡሩቲፔ ኢዮቤዴ ዮሊስ፤

ኢዮቤዲ ኢሴዮ ዮሊስ፤

6 ኢሴዮይ ካዉዋ ዳዊቴ ዮሊስ፤

ዳዊቴይ ኦሪዮ ማቼፌ ሶሎሞኔ ዮሊስ፤

7 ሶሎሞኔይ ሮቢዓማ ዮሊስ፤

ሮቢዓማይ አቢያ ዮሊስ፤

አቢዮይ አሳፌ ዮሊስ፤

8 አሳፌ ኢዮሳፌዔ ዮሊስ፤

ኢዮሳፌዔይ ኢዮራማ ዮሊስ፤

ኢዮራማይ አዚያኔ ዮሊስ፤

9 አዚያኔይ ኢዮዓታማ ዮሊስ፤

ኢዮዓታማይ አካዛ ዮሊስ፤

አካዚ ሂዚቂያሳ ዮሊስ፤

10 ሂዚቂያሳ ሚናሴ ዮሊስ፤

ሚናሴይ አሞና ዮሊስ፤

አሞኒ ኢዮሲያሳ ዮሊስ፤

11 ኢስራዔል አሳይ ዲዔቲዲ ባቢሎኔ ቢታ ቢዳ ዎዴ ኢዮሲያሳ ኢኮኒያናኔ ኢያ ኢሻታ ዮሊስ።

12 ባቢሎኔ ቢታ ኢስራዔል አሳይ ዲዔቲዲ ቢዳፔ ጉዮ ኢኮኒያኒ ሳላቲያሌ ዮሊስ።

ሳላቲያሌይ ዜሩባቤላ ዮሊስ፤

13 ዜሩባቤሊ አብዲዮ ዮሊስ፤

አብዲዮይ ኤሊያቄማ ዮሊስ፤

ኤሊያቄሜይ አዛራ ዮሊስ፤

14 አዛሪ ሳዶቄ ዮሊስ፤

ሳዶቄይ አኪሜ ዮሊስ፤

አኪሜይ ኤሊዮዳ ዮሊስ፤

15 ኤሊዮዳ አላዛራ ዮሊስ፤

አላዛሪ ማታኔ ዮሊስ፤

ማታኔይ ያይቆባ ዮሊስ፤

16 ያይቆቢ ዮሴፋ ዮሊስ፤

ዮሴፊ ኪሪስቶሳ ጊያ ዮሱሳ ዮሊዳ ማይራሚ አዚና።

17 ሂዛ፥ ዮሌቴሳይ አብራሃሜፔ ዳዊቴ ጋካናው ታማኔ አይዳ። ዳዊቴፔ ቢዲ ባቢሎኔ ዲዑዋ ጋካናው ታማኔ አይዳ። ባቢሎኔ ዲዑዋፔ ቢዲ ኪሪስቶሳ ጋካናው ታማኔ አይዱ ዮሌቴሳ ጊዴስ።

ዮሱስ ኪሪስቶሳ ዮሌቴሳ

(ሉቃ 2:1-7)

18 ዮሱስ ኪሪስቶሳ ዮሌቴሳ ታሪኬይ ሃይሳፌ ካሌይሳ። ኢያ አያ ማይራማ ዮሴፋስ አይሼታ ዴዓሼ ዮሴፋራ ጋሄቶና ጌሻ አያናፔ ቃንሳታሱ። 19 ዮሴፊ ሂሎ አሲ ጊዲዳ ጊሾ ኢዮ አሳን ኪሳናው ኮዩቢና። ያኒያ ጊሾ ቆሳን ኢዮ አጋናው ቆፒስ። 20 ኢ ሄ ቆፋን ዴዒሺን ያሳ ኪታንቾይ አሙሆን ቆንጨዲ፥ «ዳዊቴ ናዓው፥ ዮሴፋ፥ ማይራማ ቃንሳቲዳይ ጌሻ አያናፔ ጊዲያ ጊሾ ኢዮ ኤካናው ያዮፋ» ያጊስ። 21 ኢያ አዴ ናዓ ዮላና፥ ኢ ባ ዴሪያ ኤንታ ናጋራፔ አሺያ ጊሾ ኢያ ሱንሳ ኔ ዮሱሳ ጋዳ ሂጋና።

22 ጎዳይ ናቢያ ኢሳያሳ ዶናን፥ 23 «ሄኮ ጌላዲያ ቃንሳታና፤ አዴ ናዓካ ዮላና፤ ኢያ ሱንሳይ አማኑዔላ ጌቴታና» ጎይሲ ፖሌታና ሜላ ሃ ኡባይ ሃኒስ። አማኑዔላ ጌይሳስ ቢርሼሳይ «ያሳይ ኑራ ዴዔስ» ጉሱ።

24 ዮሴፊ ዲስኮፌ ባርኪዲ ጎዳ ኪታንቾይ ኪቲዳይሳ ሜላ ማይራሞ ባ ሶ ኤፊስ። 25 ሺን ባ ባይራ ናዓ ዮላና ጋካናው ኢዮ ቦቺቤና፤ * ዮሌቴዳ ናዓካ ዮሱሳ ጊዲ ሄጊስ።

2

ዶሎሃፔ ዩዳ አሳታ

1 ካዉዋ ሄርዲሳ ዎዴን ዮሱሲ ዩሁዳ ቢታን ቤቴሌሜ ካታማን ዮሌቴዳይሳፌ ጉዩ ያሊንቶ ታይቢያ አሳቲ ዶሎሃፔ ዮሩሳላሜ ዩዲ፥ 2 «ዮሌቴዳ አይሁዴ ካዎይ አዉን ዴዒ? ኑኒ ዶሎሃ

1:18 ሉቃ 1:27 1:21 ሉቃ 1:31 1:23 ኢሳ 7:14 * 1:25 ኢዮ ቦቺቤና፥ ማቺራ አዚናራ አቄይሳዳ ኢሲፌ አቄቡካና ጉሱ። 1:25 ሉቃ 2:21

ባጋራ ከዩዳ አያ ያሊንቱዋ ቤዒዲ አያው ጎይናናው ዩዳ»
ያጊዲ አይቺዶሶና። ³ ካዎይ ሄሮዲሲ ሄሳ ሲዒዳ ዎዴ ዳጋሚስ።
ዮሩሳላሜን ዴዒያ አሳይ ኡባይካ ዳጋሚዶሶና። ⁴ ሄሮዲሲ ካሂኔ
ሃላቃታኔ ሂጌ አስታማሬታ ባኮ ዌጊዲ፥ «ኪሪስቶሲ አውን
ዮሌታን ዴሻ?» ያጊዲ ኤንታ አይቺስ።

⁵ ኤንቲካ፥ «ዩሁዳ ቤቴሌሜና፤ ናቤይ፥

⁶ «ዩሁዳን ዴዒያ ቤቴሌሜ፥
ዩሁዳን ዴዒያ ጎባ ካታማታ፤
ኔኔ አይቤንካ ጉፃካ።

ታ ዴሪያ ኢስራዔል አይሳናይሲ፥

ኔፕ ከያና፤ ጊዲ ፃፊስ»

ያጊዶሶና።

⁷ ሄሳፌ ጉዮ፥ ሄሮዲሲ ዶሎሃፕ ዩዳ አሳታ ጌማን ዌጊዲ፥
ያሊንቱዋ ኤንቲ ቤዒዳ ዎዲያ ኤንታፌ ጌሺዲ ኤሪስ። ⁸ ኢ
ኤንታና ቤቴሌሜ ዮዲሼ፥ «ቢዲ ዮሌቲዳ ናዓ ሚንሲዲ ኮዩቴ፤
ኢያ ሂንቴ ዴሚዳ ዎዴ ታካ ባዳ አያው ጎይናና ሜላ ሲሚዲ ዩሼ
ታው አዲቴ» ያጊስ። ⁹ ኤንቲካ ካዎይ ሄሮዲሲ ጊዳይሳ ሲዒዲ
ቢዶሶና፥ ኤንቲ ዶሎሃ ባጋራ ቤዒዳ ያሊንቶይ ኤንታና ካሌሲሼ
ናዓይ ዴዒያሱዋ ጋካናው ኤፊስ። ¹⁰ ኤንቲ ሄ ያሊንቱዋ ቤዒዳ
ዎዴ ጊታ ኡፋይሲ ኡፋይቲዶሶና። ¹¹ ሶ ጊሊዲ ናዓ ባ አዮ
ማይራሚራ ዴዔይሳ ቤዒዶሶና፥ ኢያው ጉልባቲዲ ጎይኒዶሶና።
ባንታ ሳዲኒያ ዶዩዲ ዎርቃ፥ ኢፃኔኔ ካርቤ ኢያው ኢሚዶሶና።
¹² ኤንቲ ሄሮዲሳኮ ጉዮ ሲሞና ሜላ ያሳይ አሙሆን ኤንታው
አዲን፥ ሃራ አጌራ ባንታ ቢታ ሲሚዶሶና።

ጊብዔ ባቃቱዋ

¹³ ዶሎሃ ባጋፌ ዩዳ አሳቲ ቢዳፕ ጉዮ፥ ጎዳ ኪታንቾይ ዮሴፋስ
አሙሆን ቆንጨዲ፥ «ሄሮዲሲ ናዓ ዎዳናው ኮያ ጊሾ ዴንዳ፤
ኤሌሳዳ ናዓኔ ናዓ አዩው ኤካዳ ጊብዔ ቢታ ባ። ኔ ሲማና ዎዲያ
ታ ኔው አዳና ጋካናው ያን ጋምዓ» ያጊስ።

¹⁴ ሄሳ ጊሾ፥ ዮሴፌ ሄ ቃማን ዴንዲዲ፥ ናዓኔ ናዓ አዩው
ኤኪዲ ጊብዔ ቢስ። ¹⁵ ናቢያ ዶናን ያሳይ፥ «ታኔ፥ ታ ናዓ፥ ጊብዔ
ቢታፌ ዌጋስ» ጌቴቲዳ ቃላይ ፖሌታና ሜላ ሄሮዲሲ ሃይቃና
ጋካናው ኢ ያን ዴዒስ።

¹⁶ ሄሳፌ ጉዮ፥ ዶሎሃ ባጋፌ ዩዳ አሳቲ ኢያ ጨሚዳይሳ ኤሪዳ
ዎዴ ዳር ዩሎቲስ። ኢ ካሴ ኤንታፌ ሲዒዳይሳ ቤቴሌሜኔኔ ሄ
ሄራን ዴዒያ ናምቡ ላይሲ ኩሚዳይሳታኔ ናምቡ ላይሳፌ ጋርሳን
ዴዒያ አዴ ናይታ ኡባ ባ ዎታዳሬታ ዮዲዲ ዎዲሲስ።

2:6 ሚክ 5:2 2:15 ሆሴ 11:1

17-18 ናቢያ ኤርሚያሳ ዶናን፥
 «ዮሆይኔ ዜሌልሲ፥
 ራማ ካታማን ሲዔ ቲስ።
 ራሄላ ባ ናይታስ ዮካወሱ፤
 ኤንቲ ሃይቂዳ ጊሾ
 ሚኔታናው ዳንዳዓቡኩ»
 ጊዲ አዲዳይሲ ፖሌቲስ።

ናዚሬቴ ሲሙዋ

19 ሄሮዲሲ ሃይቂዳፕ ጉዮ ጊብዔን ጎዳ ኪታንቾይ ዮሴፋስ አሙሆን ቆንጨዲ፥ 20 «ናዓ ዎዳናው ኮያ አሳቲ ሃይቂዳ ጊሾ ዴንዳዳ ናዓኔ ናዓ አዩው ኤካዳ ኢስራዔሌ ቢታ ሲማ» ያጊስ።
 21 ዮሴፊ ዴንዲዲ ናዓኔ ናዓ አዩው ኤኪዲ ኢስራዔሌ ቢታ ሲሚስ። 22 ሺን አርኪሊዮሲ ዩሁዳን ባ አዋ ሄሮዲሳ ቤሳን ካዎቲዳይሳ ሲዒዳ ዎዴ ያ ባናው ያዩስ። ያሳይ አሙሆን ኢያው ቆንጨሲን ጋሊላ ቢታ ቢስ። 23 ናቤታ ዶናን፥ «ናዚሬቴ አሲ ጌቴታና» ጊዲ አዴቲዳይሲ ፖሌታና ሜላ ናዚሬቴ ካታማ ቢዲ ያን ዴዒስ።

3

ፃማቂያ ዮሃንሳ ቲሚርቲያ

(ማር 1:1-8፤ ሉቃ 3:1-17፤ ዮሃ 1:19-28)

1-2 ሄ ዎዴ ፃማቂያ ዮሃንሲ፥ «ያሳ ካዎቴሳይ ማታቲዳ ጊሾ ሂንቴ ናጋራፔ ሲሚቴ» ያጊዲ ሳባኪሼ ዩሁዳ ባዞ ቢታ ቢስ።
 3 ናቢያ ኢሳያሲ ዮሃንሳባ አዲዳይሳ ሜላ፥
 «ባዞ ቢታን፥
 ኢሶይ ባ ቃላ ጶቁ አሲዲ፥
 <ጎዳ አጊያ ጊጊሲቴ።
 ኢያ ሆሮጋ ፒዲ አሲቴ> ጊስ»
 ያጌቲዳይ ኢያሳ ያጊስ።
 4 ዮሃንሲ ጊማሌ ኢኪሴፔ አሴቲዳ አፊላ ማዔስ። ባ ዪሳን ዳፎ ዳንጨስ። ኢ ሚያ ካሳይካ ቦሌኔ ዴጌራ ኤሲ። 5 አሳይ ሄ ዎዴ ዩሩሳላሚ ካታማፔ፥ ዩሁዳ ቢታ ኡባፌኔ ዮርዳኖሴ ሻፋ ሄራፔ ኢያኮ ዮሶና። 6 ባንታ ናጋራ ፓዒዲ ዮርዳኖሴ ሻፋን ዮሃንሳ ኩሼን ፃማቂቶሶና።

2:17-18 ኤር 31:15 2:23 ማር 1:24፤ ሉቃ 2:39፤ ዮሃ 1:45 3:1-2 ማቶ 4:17፤ ማር 1:15 3:3 ኢሳ 40:3 3:4 2ካዎ 1:8

7 የሃኒሲ፥ ዳሮ ፋሪሳዌቲኔ ሳዱቃዊቲ ማጣታናው ባኮ ዩይሳታ ቤዒዲ፥ ኤንታኮ፥ «ሃ ኢታ ሾሻቶ፥ ያና ያሳ ሃንቁዋፊ ባቃታና ሜላ ሂንቴና ኦኔ ዞሪዳይ? 8 ሂዛ፥ ሂንቴ፥ ሂንቴ ናጋራፔ ሲሚዳይሳ ኤሪሲያባ አሲቴ። 9 ሂንቴ፥ ሂንቴ ዎዛናን፥ <አብራሃሜይ፥ ኑ አዋይ ዴዔስ> ጊዲ ቆፖፊቴ። ሎይሲ ሲዒቴ! ያሳይ ሃ ሹቻታፔ አብራሃሜስ ናዓ ኪሳናው ዳንዳዔስ። 10 ቤዒይ ሚላ ሃጵዋን ጊጊዲ ኡቲስ፤ ሎዎ አይፊ አይፎና ሚላ ኡባይ ቃንጌቲዲ ታማን ዩጌታና።

11 «ሂንቴ፥ ሂንቴ ናጋራፔ ሲሚዳይሳ ኤሪሳናው ታኒ ሂንቴና ሃላን ማቃይስ። ሺን ታፔ ጉዩራ ዩይሲ ሂንቴና ጌሻ አያናኒኔ ታማን ማቃና። ኢ ታፔ ዳሮ ዎልቃሜስ፤ ታኒ ሃሪ አቶሺን ኢያ ጫማ ቶካናዉካ ቤሲኬ። 12 ካላ ጌሺያ ፒሴይ ኢያ ኩሼን ዴዔስ። ካላ ሎይሲ ጌሼስ፤ ጊስቲያ ባ ሻሊያን ቆላና፥ ሺን ፑኑዋ ቶያና ታማን ፀጋና» ያጊስ።

ዩሱሳ ማጣታ
(ማር 1:9-11፤ ሉቃ 3:21-22)

13 ሄ ዎዴ ዩሱሲ የሃኒሳ ኩሼን ማጣታናው ጋሊላፔ ዮርዳኖሴ ሻፋ ቤስ። 14 ሺን የሃኒሲ ኢያ ዲጋናው ኮዩድ፥ «ታኒ ኔናን ማጣታናው ኮሺሺን ኔኒ ታኮ ያይ?» ያጊስ። 15 ሺን ዩሱሲ ዛሪዲ፥ «ያሳይ ኑፔ ኮያባ ኡባ ኑ ፖላናው ቤሲያ ጊሾ ሃዒ ታው ኤሮ ጋ» ያጊስ። የሃኒሲ ኢያው ኤሮ ጊዲ ኤኪስ። 16 ዩሱሲ ማጣታዳ ሚላ ሃላፊ ኬዩስ። ኢራካ ሳሎይ ዶዩቲን ያሳ አያናይ ሆሌዳ ዩሺን ቃሲ ባ ቦላ ዎልዓሚዲ ዎዲሺን ቤዒስ። 17 ሄ ዎዴ «ታ ዶሲያ፥ ኢያን ታና ኡፋይሲያ ታ ናዓይ ሃይሳ» ያጊያ ቃላይ ሳሎፔ ዩስ።

4

ዩሱሳ ፓጫታ
(ማር 1:12-13፤ ሉቃ 4:1-13)

1 ሄሳፊ ጉዩ፥ ሃላሄይ ዩሱሳ ፓጫና ሚላ ጌሻ አያናይ ዩሱሳ ባዞ ቢታ ኤፊስ። 2 አይታሙ ቃማኔ አይታሙ ጋላስ ምሚዳፔ ጉዩ ኮሻቲስ። 3 ሃላሄይ ዩሱሳኮ ዩዲ «ኔኒ ያሳ ናዓ ጊዲኮ፥ አኔ ሃ ሹቻቲ ኡይሲ ጊዳና ሚላ ኪታ» ያጊስ። 4 ዩሱሲ ዛሪዲ፥ «<አሲ ያሳ ዶናፔ ኬያ ቃላ ኡባን ዳናፔ አቲን ኡይሳ ሃላላን ዴዔና> ጌቲቲዲ ያሳ ቃላን ሃፊቲስ» ያጊስ።

3:7 ማቶ 12:34፤ 23:33 3:9 የሃ 8:33 3:10 ማቶ 7:19 3:17 ማቶ 12:18፤ 17:5፤ ማር 1:11፤ ሉቃ 9:35 4:1 ኢብ 2:18፤ 4:15 4:4 ዛሬ 8:3

5 ካሊዲካ፥ ዓላሄይ ዮሱሳ ጊሻ ካታማ ኤፊዲ፥ ያሳ ኬሳ ሁዲያ ኬሲዲ፥ 6 «ኔኒ ያሳ ናዓ ጊዲኮ፥ አኔ ዱጌ ሳዓን ኩንዳ፥ አይስ ጊኮ፥

ፈ ቶሆይ ሹቻን ዱቤቲ ዴሼቶና ሜላ፥
ባንታ ኩሺያን ኔና ዴንሳና ሜላ፥
ያሳይ ባ ኪታንቾታ ኔ ጊሾ ኪታና፥

ጌቴቲዲ ያሳ ቃላን ዓፌቲስ» ያጊስ።

7 ዮሱሲ ኢያኮ፥ «ቃሲካ፥ ሰሳ ቃላን ኔ ጎዳ፥ ኔ ያሳ ፓጮፋ፥ ያጊቲዲ ዓፌቲስ» ጊዲ ዛሪስ።

8 ወርሴሳን ዓላሄይ ዮሱሳ ኢሲ ዎልቃማ ዴሪያ ሁዲ ኬሲዲ አላሚያ ካዎቴሳታ ኡንታ ቦንቹዋራ ኢሲፌ ቤሲዲ፥ 9 «ኔ ታው ኩንዳዳ ጎይኒኮ ታ ኔው ሃ ኡባ ኢማና» ያጊስ።

10 ዮሱሲ ዛሪዲ፥ «ሃ ዓላሂያው፥ ታፔ ሃካ! ኔ ጎዳ፥ ኔ ያሳ ጎይና፥ ኢያ ዓላላ ሃጋዛ፥ ጌቴቲዲ ያሳ ቃላን ዓፌቲስ» ያጊስ።

11 ሄሳፌ ጉዮ፥ ዓላሄይ አጊዲ ቢስ፤ ኪታንቾቲ ዬዲ ኢያ ሃጋዚዶሶና።

ዮሱሳ ቲሚርቲያ
(ማር 1:14-15፤ ሉቃ 4:14-15)

12 ዮሱሲ፥ ዮሃኒሲ ቃሼቶይሳ ሲዲዳ ዎዴ ጋሊላ ቢታ ቢስ።
13 ናዚሬቴ ካታማ አጊዲ ዛቢሎናኒኔ ኒፍታሌሜ ሄራን፥ አባ ማታን ዴዲያ ቂፊርናሆሜ ካታማ ቢዲ ያን ዴዲስ። 14 ሄሲ ሃኒዳይ ናቢያ ኢሳያሳ ዶናን፥

15 «ዛቢሎኔ ቢታን፥ ኒፍታሌሜ ቢታን፥
ዮርዳኖሴ ሻፋፔ ሄፊንላን፥
አባ አጊያ ጋዓን ዴዲያ፥
አይሁዴ ጊዶና ዴሬይ ዴዲያ ጋሊላን፥

16 ዱማን ዴዲያ ዴሬይ፥
ዎልቃማ ፖዎ ቤዲስ።
ሃይቆ ኩያ ቢታን፥
ዴዔይሳታስ ፖዎይ ኬዩስ»

ያጊዲ አዴቲዳ ቃላይ ፖሌታና ሜላሳ።

17 ሄ ዎዴፔ ዶሚዲ ዮሱሲ፥ «ያሳ ካዎቴሳይ ማታቲዳ ጊሾ ሄንቴ ናጋራፔ ሲሚቴ» ያጊዲ ቃላ ሳባኬስ።

ኮይሮ ታማሬታ ዪጌቴሳ
(ማር 1:16-20፤ ሉቃ 5:1-11)

4:6 ማዝ 91:11 4:7 ዛሬ 6:16 4:10 ዛሬ 6:13 4:12 ማቶ 14:3፤
ማር 6:17፤ ሉቃ 3:19-20 4:13 ዮሃ 2:12 4:15 ኢሳ 9:1-2 4:17
ማቶ 3:2

18 ዮሱሲ ጋሊላ አባ ማታራ አዲሽ ናምዑ ኢሻታ፥ ጳጊሮሳ ጌቲቲያ ሲሞናኔ ኢያ ኢሻ ኢንዲሪያሳ ቤዒስ። ኤንቲ ሞሎ አይኪይሳታ ጊዲዳ ጊሾ ባንታ ጊቲያ አባን ዮጎሶና። 19 ዮሱሲ ኤንታና፥ «ሃ ዩቴ፤ ታና ካሊቴ! ሞሎ አይሲ አቶሺን፥ ታ ሂንቴና አሴ አይሲ ታማርሳና» ያገሰ። 20 ኤንቲካ፥ ኤሌሲዲ ባንታ ጊቲያ ዩጊ አጊዲ ዮሱሳ ካሊዶሶና።

21 ዮሱሲ ያፔ ቡሮ ጌዴ ሲንሴ አዲሽ ሃራ ናምዑ ኢሻታ፥ ዛብዲዮሳ ናይታ፥ ያይቆባኔ ዮሃኒሳ ቤዒስ። ባንታ አዋ ዛብዲዮሳራ ኢሲፌ ወጎሉዋ ጊዶን ባንታ ጊቲያ ጊጊሴይሳታ ያገሰ። 22 ኤንቲካ፥ ኤሌሲዲ ባንታ ወጎሉዋኔ ባንታ አዋ አጊዲ ዮሱሳ ካሊዶሶና።

ዮሱሲ ሃርጋንቾታ ፓሲስ
(ሉቃ 6:17-19)

23 ዮሱሲ አይሁዴ ዎሳ ኬሳታን ታማርሲሽ፥ ሳሎ ካዎቴሳ ዎንጌላ አዲሽኔ ዱማ ዱማ ሃርጊያፌ አሳ ፓሲሽ ጋሊላ ቢታ ኡባን ዩዩስ።

24 ሄሳፌ ዴንዶይሳን ኢያ ሱንሳይ ሶሪያ ቢታ ኡባን ኬዩስ። ዱማ ዱማ ሃርጊን አይኪቲዳይሳታኔ ዋዩቴይሳታ፥ ቴና አያናን አይኪቲዳይሳታ፥ ሾጪ ዩጊያ ሃርጊን አይኪቲዳይሳታኔ፥ ጉንዳታ ኢያኮ ኤሂዶሶና፤ ኢካ ኤንታና ፓሲስ።

25 አሳይ ጋሊላፔ፥ ታሙ ካታማታፔ፥ ዩሩሳላሜፔ፥ ዩሁዳፔኔ ዮርዳኖሴ ሻፋ ሄፊንሳን ዴዒያ ቢታፌ ዩዳ ዳሮ አሳይ ኢያ ካሊዶሶና።

5

ዮሱሲ ዴሪያ ቦላ ታማርሲዳ ቲሚርቲያ

1 ዳሮ ዴሬይ ሸቂዳይሳ ዮሱሲ ቤዒዳ ዎዴ ዴሪያ ቦላ ኬዩዲ ኡቲስ። ኢያ ታማሬቲ ኢያኮ ሸቂን፥ 2 ሃይሳዳ ያጊዲ ታማርሲስ።

ቴማ ኡፋይሳ
(ሉቃ 6:2-23)

- 3 «ባንታ አያናን ማንቆቲ አንጄቲዳይሳታ፥ ሳሎ ካዎቴሳይ ኤንታሳ።
- 4 ዩኪይሳቲ አንጄቲዳይሳታ፥ ኤንቲ ሚንሴሶ ዴማና።
- 5 ባንታ ዎዛናን አሽኬቲ አንጄቲዳይሳታ፥

- ኤንቲ ሳዓ ላታና።
- 6 ዊሎባ አሳናው ኮሻቴይሳቲኔ ሳሞቴይሳቲ ኣንጄቲዳይሳታ፥ ኤንቲ ካላና።
- 7 ማሬይሳቲ ኣንጄቲዳይሳታ፥ ኤንቲ ማሮቴሲ ዴማና።
- 8 ምዛና ጊሻቲ ኣንጄቲዳይሳታ፥ ኤንቲ ሶሳ ቤዓና።
- 9 ሲጌሴይሳቲ ኣንጄቲዳይሳታ፥ ኤንቲ ሶሳ ናይታ ጌቴቲ ዌጌታና።
- 10 ዊሎባ አሲያ ጊሾ ጊዲ፥ ጎዴቴይሳቲ ኣንጄቲዳይሳታ፥ ሳሎ ካምቴሳይ ኤንታሳ።
- 11 «አሳይ ሂንቴና ታ ጊሾ ጊዲ ጫያ ምዴ ጎዲያ ምዴኔ ሂንቴ ቦላ ኢታባ ኡባ ምርዶን ኦዲሲያ ምዴ ሂንቴ ኣንጄቲዳይሳታ።
- 12 ሂንቴ ምይቶይ ሳሎን ጊታ ጊዲያ ጊሾ ኡፋይቲቴ፥ ሃሹ ጊቴ፥ ሂንቴፌ ካሴ ዴዲያ ናቤታ ሄሳዳ ጎዲዶሶና።

ማዒኔኔ ፖዖ

- 13 «ሂንቴ ቤታስ ማዒኔ፤ ማዒኔይ ባ ማዒኔቴሳ አጊኮ፥ ባ ማልዖቴሳ ሞቲ ዛሬ ዴማኔ? ካሬ ሆሊን አሳን ዩዴታናፔ አቲን አይቤስካ ማዴና።
- 14 «ሂንቴ ቤታስ ፖዖ፤ ዴሬ ቦላ ዴዲያ ካታሚያ ቆሴታናው ዳንዳውኩ። 15 ምምፔ አይሲዲ ሶን ዴዲያ አሳ ኡባስ ፖዓና ሜላ ጶቃ ሶን ምሴሲፔ አቲን ዳሎ ጊዶን ምሴይ ባዋ። 16 ሄሳ ሜላ አሳይ ሂንቴ ሎዖ አሱዋ ቤዲዲ፥ ሳሎን ዴዲያ ሂንቴ አዋ ቦንቻና ሜላ ሂንቴ ፖዖይ አሳ ሲንሳን ፖዖ።

ሙሴ ሂጊያ

17 «ታኒ ሙሴ ሂጊያኔ ናቤታ ቃላ ሻራናው ዩዳ ሂንቴው ዳኖፖ። ታኒ፥ ኤንቲ አዲዳይሲ ቴማ ጊዴይሳ ቆንጨሳናው ያሲፔ አቲን ሻራናው ያቢኬ። 18 ታ ሂንቴው ቴማ አዳይስ፤ ሳሎይኔ ሳዓይ አቆና ጋካናው ሂጌ ኡባይ ፖሌታናፔ አቲን ሂጊያፌ ኢሲ ቃሳይ ምይኮ ፒዳሌይ አዴና። 19 ሄሳ ጊሾ፥ ሃ ኪታታፔ ጉዲያ ኢሲ ኪታ ሜንሲያ አኒካ ቃሲ ሃራታ ሄሳሶ አሳና ሜላ ታማርሴይ አኒካ ሳሎ ካምቴሳን ኡባፌ ጉሳ ጊዳና። ሺን ሃ ኪታ ፖሌይሲኔ

5:5 ማዝ 37:11 5:6 ኢሳ 55:1 5:8 ማዝ 24:3 5:10 1ጴጌ 3:14
 5:11 1ጴጌ 4:14 5:12 2ታሪ 36:16፤ ሃ.አ 7:52 5:13 ማር 9:50፤ ሉቃ
 14:34-35 5:14 ዮሃ 8:12፤ 9:5 5:15 ማር 4:21፤ ሉቃ 8:16፤ 11:33
 5:16 1ጴጌ 2:12 5:18 ሉቃ 16:17

ሃራታካ ፖላና ሜላ ታማርሴይ ሳሎ ካዎቴሳን ጊታ ጊዳና። 20 ታ ሂንቴው አዳይስ፤ ሂንቴ ዊሎቴሳይ ፋሪሳዌታ ዊሎቴሳፌኔ ሂጌ አስታማራታ ዊሎቴሳፌ አዶና ኢዊኮ፣ ሳሎ ካዎቴሳ ጌሌኬታ።

ዎዶባ

21 «ሂንቴ ማይዛታስ፣ <ዎዶፒቴ፤ ሼምፖ ዎዶዳ አኒካ ፒርዴታና> ጌቴቶይሳ ሲዒ ዴታ። 22 ሺን ታ ሂንቴው አዳይስ፤ ባ ኢሻ ሃንቄቲያ ኡባይ ፒርዴታና። ባ ኢሻ ጫያ አኒካ ዳይና ሲንሲ ፒርዳስ ሺቃና። ባ ኢሻኮ፣ <ኤያይ> ጊያ አኒካ ቃሲ ጋናሜ ታማን ፒርዴታና።

23 «ሄሳ ጊሾ፣ ኔኒ ኔ ያርሹዋ ያርሺያ ዎዴ ኔ ኢሻ ቆሂዳባይ ኔው አኬኬቲኮ፣ 24 ኔ ያርሹዋ ሄ ቤሳን አጋዳ ባ፤ ኮይሮታ ባዳ ኔ ኢሻራ ጊጋ፤ ያታ ሲማዳ፣ ኔ ያርሹዋ ያሳስ ያርሻ።

25 «ኔና ሞቴይሳራ ፒርዳ ኬሲ ባሼ ኦጌ ቦላ ኢያራ ጊጋ። ሄሲ አቶ ጊኮ ኢ ኔና ዳይና ሲንሲ ኤፋና። ዳይናይ ኔና ቃቼይሳስ አሲ ኢማና፤ ኢ ኔና ዎይኔን ዬጋና። 26 ታ ቴማ አዳይስ፤ ኔ ቦላ ፒርዴቲዳ አጩዋ ኢሲ ሳንቲሜይ አቶና ጨጋ አንጋና ጋካናው ቃሾ ኬሳፌ ኬያካ።

ላይማቴሳባ

27 «ሃይሳፌ ካሴ፣ <ላይማቶፒቴ> ጌቴቶይሳ ሲዒ ዴታ። 28 ሺን ታ ሂንቴው አዳይስ፣ ማጫስ ያሊዲ፣ አሞቲዳ ኡባይ ባ ዎዛናን ኢራ ላይማቴስ። 29 ኔ ኡሻቻ አይፌይ ኔው ናጋራስ ጋሶ ጊዲኮ፣ ኬሳ ሆላ። ኔ አሳቴሳይ ኩሜሲ ጋናሜ ታማን ዎዳናፔ ኔ አሳቴሳፌ ኢሶይ ዳይኮ ኔው ሎዎ። 30 ኔ ኡሻቻ ኩሼይ ኔው ናጋራስ ጋሶ ጊዲኮ፣ ኢያ ቃንፃ ሆላ። ኔ አሳቴሳይ ኩሜሲ ጋናሜ ታማን ዎዳናፔ ኔ አሳቴሳፌ ኢሶይ ዳይኮ፣ ኔው ሎዎ።

ማቺ አዚና ቢሌሳባ

(ማቶ 19:9፤ ማር 10:11-12፤ ሉቃ 16:18)

31 «<ባ ማቺው ዬዲያ አኒካ አንጆ ዋርቃቲያ ኢሞ> ጌቴቲስ። 32 ሺን ታ ሂንቴው አዳይስ፤ ባ ማቺያ ላይማቶና ዴዒሺን ቢሊያ አኒካ ኢያ ላይማታና ሜላ አሴስ። ሄሳዳካ፣ አንጅቲዳ ማጫሲው ኤኪያ ኡባይ ላይማቴስ።

ጫቆባ

5:21 ኬሳ 20:13፤ ዛሬ 5:17 5:27 ኬሳ 20:14፤ ዛሬ 5:18 5:29 ማቶ 18:9፤ ማር 9:47 5:30 ማቶ 18:8፤ ማር 9:43 5:31 ማቶ 19:7፤ ማር 10:4 5:32 ማቶ 19:9፤ ማር 10:11-12፤ ሉቃ 16:18፤ 1ቆሮ 7:10-11

33 «ሂንቴ ማይዛታኮ፣ <ዎርዶን ጫቆፊቴ፤ ሂንቴ ያሳ ሲንሳን ጫቁዳይሳ ፖሊቴ> ጌቴቴዳይሳ ሲዒዴታ። 34 ሺን ታ ሂንቴው አዳይስ፤ ኡባራካ ጫቆፊቴ። ያሳይ ኡቴያ አራታ ጊዲያ ጊሾ ሳሎን ጫቆፊቴ። 35 ኢያ ቶሆይ ዩዲያ ሶ ጊዲያ ጊሾ ሳዓንካ ጫቆፊቴ። ጊታ ካዉዋ ካታማ ጊዲያ ጊሾ ዩሩሳላሚንካ ጫቆፊቴ። 36 ሂንቴ ቢናናፕ ኢሱዋካ ቦሲ ዎይኮ ካሬሲ አሳናው ዳንዳዎና ጊሾ ሂንቴ ሂንቴ ሁዒንካ ጫቆፊቴ። 37 ሄሳ ጊሾ፣ ሂንቴ ቃላይ፣ <ኤ> ዎይኮ <አካይ> ጊዶ። ሄሳፌ ካሬ ኬዩይ ዓላሄፕ ዩስ።

ሃሎ ኬያናው ኮሺና

38 «<አይፌ ጊሾ አይፌ፤ አቻ ጊሾ አቼ> ጌቴቴዳይሳ ሲዒዴታ። 39 ሺን ታ ሂንቴው አዳይስ፤ ሂንቴ ቦላ ኢታባ አሲያ ኡራራ ኤቁቶፊቴ። አኒካ ኔ ኡሻቻ ሻካላ ባቂኮ ኔ ሃዲርሳ ሻካላካ ቤሳ። 40 ኢሲ አሲ ኔ ሻሚዚያ ኤካናው ኔና ሞቴኮ፣ ኔ ኮቴያ ጉጃዳ ኢማ። 41 ኢሲ አሲ ኔና ዎልቃን ባባ ቶሲዲ ኢሲ ሳቴ አጌ ባራ ባና ሜላ ኔና ኡንዔሲኮ፣ ኢያራ ናምዑ ሳቴ አጌ ባ። 42 ዎሲያ አዴስካ ኢማ፤ ኔፕ ታልዓናው ኮያ አናካ ዲንፋ።

ኔ ሞርኬታ ሲቃ

(ሉቃ 6: 27-28፣ 32-36)

43 «<ኔና ዶሴይሳ ዶሳ፤ ኔና ኢዔይሳ ኢዳ> ጌቴቶይሳ ሲዒዴታ። 44 ሺን ታ ሂንቴው አዳይስ፤ ሂንቴ ሞርኬታ ዶሲቴ፤ ሂንቴና ቆሄይሳታስ ዎሲቴ። 45 ሄሳሶ ሂንቴ አሲኮ፣ ሳሎን ዴዒያ ሂንቴ አዋስ ሂንቴ ናይታ ጊዳና። ኢ ኢታታሲኔ ሎዎታስ አዋ ኬሴስ፤ ሂሎታሲኔ ናጋራንቾታስ ባ ኢራ ቡኪሴስ። 46 ሂንቴና ዶሲያ አሳ ዓላላ ሂንቴ ዶሲኮ፣ ሂንቴው አይ ዎይቶይ ዴዒ? ሃሪ አቶሺን፣ ቃራፃ ቃንዒሴይሳቴካ ሄሳ አሶሶና። 47 ሂንቴ፣ ሂንቴ ኢሻታ ዓላላ ሳሮሲኮ፣ ሃራታፕ አይ ሃራ አዲያባ አሲዴቴ? ሃሪ አቶሺን፣ ያሳ አማኖና አሳይካ ሄሳ አሶሶና። 48 ሂዛ፣ ሳሎን ዴዒያ ሂንቴ አዋይ ፖሎ ጊዶይሳዳ ሂንቴካ ፖሎ ጊዲቴ።

6

ማንቆታስ ኢሞባ

1 «አሲ ቤዎ ጊዲ ሂንቴ ሎዎ አሱዋ አሳ ሲንሳን አሶናዳ ናጌቴቴ። ሄሳሶ ሃኖና ኢዒኮ ሳሎን ዴዒያ ሂንቴ አዋፕ ዎይቶ ዴሚኬታ።

5:33 ሌዌ 19:12፣ ታይ 30:2፣ ዛሬ 23:21 5:34 ማቶ 23:22 5:35 ኢሳ 66:1፣ ማዝ 48:2 5:38 ኬሳ 21:24፣ ሌዌ 24:20፣ ዛሬ 19:19 5:48 ሌዌ 19:2፣ ዛሬ 18:13 6:1 ማቶ 23:5

² «ሂንቴ ማንቆታስ ኢሚያ ዎዴ አሳ ሲንሳን ቦንቼታናው ጊዲ ጩቦቲ አጊያ ዶናኒኔ አይሁዴ ዎሳ ኬሳታን አሴይሳዳ አሲ ቤያ ጊዲ አሶፊቴ። ታ ሂንቴው ቱማ አዳይስ፤ ኤንቲ ባንታ ኩሜሳ ዎይቱዋ ኤኪዶሶና። ³ ሺን ሂንቴ ማንቆታስ ኢሚያ ዎዴ ሂንቴ አሻቻ ኩሼይ አሴይሳ ሂንቴ ሃዲርሳ ኩሼይ ኤርፖ፤ ⁴ ሂንቴ ኢዋይ ጌማን ጊዶ። ጌማን አሴይሳ ቤዲያ ሂንቴ አዋይ ሂንቴው ዎይቱዋ ቆንጩን ኢማና።

ዎሳባ
(ሉቃ 11:2-4)

⁵ «ዎሳ ዎሲሼ ጩቦታሶ ሃኖፕቴ። ኤንቲ፣ ባንታና አሲ ቤያ ጊዲ አይሁዴ ዎሳ ኬሳኒኔ አጊያ ዶናን ኤቂዲ ዎሴይሳ ዶሶሶና። ታ ሂንቴው ቱማ አዳይስ፤ ኤንቲ ባንታ ኩሜሳ ዎይቱዋ ኤኪዶሶና።

⁶ ሺን ነኒ ዎሲያ ዎዴ ኔ ሶ ጌላ፣ ዉላ ጎርዳዳ ጌማን ዴዲያ ኔ አዋኮ ዎሳ፤ ጌማን አሴቲዳይሳ ቤዲያ ኔ አዋይ ኔው ዎይቱዋ ኢማና። ⁷ ሂንቴ ዎሲያ ዎዴ አማኖና አሳሶ ጮ ቃላ ዳርሲዲ ዎሶፊቴ። ኤንቲ አዱሲ ዎሲን ያሳይ ሲዔስ ጊዲ ቆፖሶና። ⁸ ሄሳ ጊሾ፣ ኤንታይሳዳ ሃኖፕቴ። አይስ ጊኮ፣ ሂንቴ አዋይ ሂንቴው አይ ኮሺያኮ ሂንቴ ዎሳናፔ ሲንሳቲዲ ኤፊስ።

⁹ «ሂዛ፣ ሂንቴ ያጊዲ ዎሲቴ፡

ሳሎን ዴዲያ ኑ አዋው፣

ኔ ጌሻ ሱንሳይ አንጄቶ።

¹⁰ ኔ ካዎቴሳይ ዮ፣

ኔ ሼኔይ ሳሎን ሃኒዳይሳዳ

ሳዓንካ ሃኖ።

¹¹ ጋላሳ ካሳ ሃቺ ሃቺ ኑስ ኢማ።

¹² ኑኒ ኑና ቆሂዳይሳታ፣ አቶ ጌይሳዳ፣

ኑስካ ኑ ቆሁዋ አቶ ጋ።

¹³ ኑና ኢታፔ አሻፌ አቲን

ፓጩን ጌልሶፋ።

[ካዎቴሳይ፣ ዎልቃይኔ ቦንቾይ

ሜሪናው ነሳ፣ አሚንዲ።]

¹⁴ «ሂንቴ ሂንቴና ቆሂዳይሳታ አቶ ጊኮ፣ ሳሎን ዴዲያ ሂንቴ አዋይ ሂንቴ ቆሁዋካ አቶ ጋና። ¹⁵ ሺን ሂንቴ ሃራ አሳ ናጋራ አቶ ጎና ኢዲኮ ሂንቴ አዋይ ሂንቴ ናጋራ አቶ ጌና።

ያማባ

16 «ሂንቴ ምረያ ዎዴ ጩቦታሶ ካዮቶፊቴ። አይስ ጊኮ፣ ኤንቴ ምሄይሳ አሲ ኤራና ሜላ ባንታ ሶምዑዋ ቂታዮሶና። ታ ቱማ አዳይስ፤ ኤንቴ ባንታ ዎይቱዋ ኤኪዶሶና።

17 «ሺን ነኒ ምረያ ዎዴ ኔ ሶምዑዋ ሜጫ፣ ኔ ሁዲያ ቲዮታ።

18 ሄሳዳ ኔ አሲኮ ኔ ምረያ ምይ አሳፕ ጌሚዳይሳ፣ ሺን ጌማን ዴዲያ ኔ አዋይ ኤሪያ ምግ ጊዳና። ጌማን አሴቲዳይሳ ቤዲያ ኔ አዋይ ኔው ዎይቱዋ ኢማና።

ሳሎን ሻሎ ሺሾ

19 «ቢሊ ሚያሶን፣ ቢራቲ ሺዲያሶን፣ ካይሶይ ቦኪዲ ኤኪያሶን፣ ሃ ሳዓን፣ ሂንቴው ሻሎ ሺሾፕቴ። 20 ሺን ቢሊ ሞናሶን፣ ቢራቲ ሺያናሶን፣ ካይሶይ ቦኪዲ ኤኮናሶን ሳሎን ሂንቴው ሻሎ ሺሺቴ። 21 ኔ ሻሎይ ዴዲያሶቱን ኔ ዎዛናይ ዴዓና።

22 «አይፌይ አሳቴሳስ ምጥ። ሄሳ ጊሾ፣ ኔ አይፌይ ፓዓ ጊዲኮ ኔ ኩሜሳ አሳቴሳይ ፖሶ ጊዴስ። 23 ኔ አይፌይ ሃርጋንቾ ጊዲኮ ኔ ኩሜሳ አሳቴሳይ ጳማ ጊዴስ። ሂዛ፣ ኔናን ዴዲያ ፖሶይ ጳማ ጊዲኮ፣ ጳማይ አይ ሜላ አዲዲ ጳማንዴሻ!

24 «ኢሲ አሲ ናምዑ ጎዳስ ሃሬታናው ዳንዳዔና። ኢሱዋ ዶሲኮ ሃንኩዋ ኢደስ፤ ዎይኮ ኢሱዋ ቦንቺኮ ሃንኩዋ ካዴስ። ሶሳሲ ኔ ሚሺስ ሃሬታናው ዳንዳዔኬታ።

ኡንዔቶፊቴ

(ሉቃ 12:22-31)

25 «ሂዛ፣ ሲዲቴ! ሂንቴ ዴዎን ዳናው፣ (አይ ማኔ? አይ ኡያኔ? አይ ማዓኔ?) ጊዲ ኡንዔቶፊቴ፤ ዴዎይ ካሳፌ ዎይኮ ማሶፕ አዴኔ?

26 ሳሎ ካፎታ ዪሊቴ፤ ኤንቴ ዜሮኮና፣ ቡጮኮና፣ ሻሌን ዮ-ጎኮና፣ ሺን ሂንቴ ሳሎ አዋይ ኤንታ ሙዜስ። ሂንቴ ኤንታፌ ኬሂ አዴኬቲ? 27 ሂንቴ ጊዶፌ ዳሮ ኡንዔቲዲ ባ ላይሳ ቦላ ኢሲ ጋላስ ጉጃናው ዳንዳዔይ ዴዒ?

28 «ቃሲ ሂንቴ ማዲያባስ አይስ ኡንዔቲቴ? አኔ ጨሻታ ቤዲቴ፣ አሶን ዳቡሮኮና ዎይኮ ሱቆኮና። 29 ሲዲቴ! ሃሪ አቶሺን፣ ካወዋ ሶሎሞኔይ ባ ቦንቾ ኡባን ሃ ጨሻታፕ ኢሱዋ ሜላካ ማዲቤና። 30 ሂንቴና፣ አማናይ ፓጨዳይሳቶ፣ ሶሳይ ሃቺ ቤንቲዲ ዎንቶ ታማን ዎዳናው ዴዲያ ማታ ያቲዲ ማይዚያባ ጊዲኮ፣ ሂንቴና ኤንታፌ አሲዲ ዋቲ ማይዜኔ? 31 ሄሳ ጊሾ፣ (አይ ማኔ? አይ ኡያኔ? አይ ማዓኔ?) ጊዲ ኡንዔቶፊቴ። 32 ሄ ኡባ ሶሳ አማናና አሳይ ዳርሲዲ ዴማናው ኡንዔቶሶና። ሂንቴ ሳሎ አዋይ ሄ ኡባይ ሂንቴው ኮሼይሳ ኤሬስ። 33 ሺን ኡባፌ ሲንጌ

ያሳ ካዎቱሳኔ ኢያ ዒሎቱሳ ኮዩቱ፤ ሄ ኡባይ ሂንቱው ጉጂ ኢሜታና።³⁴ ሄሳ ጊሾ፥ ዎንቶስ ቆፒሼ ኡንዔቶፊቱ። ዎንቶይሲ ዎንቶስ አቆ፤ ኢሲ ኢሲ ጋላሳይ ባው ጊዲያ ሜቶራ ዴዔስ።

7

ሃራታ ቦላ ፒርዶፊቱ
(ሉቃ 6:37-42)

¹ «ሂንቱ ቦላ ፒርዶቶና ሜላ ሃራታ ቦላ ፒርዶፊቱ።² አይስ ጊኮ፥ ሃራታ ቦላ ሂንቱ ፒርዶይሳዳ ሂንቱ ቦላ ፒርዶታና፤ ሂንቱ ሃራታስ ማኪዳባን ሂንቱው ዛሪ ማኬታና።³ ኔ አይፌን ዴዒያ ቱሱ ዳኔይሳ ቤዖና ኔ ኢሻ አይፌን ዴዒያ ቡሪያ አይስ ቤዓይ?⁴ ኔ አይፌን ቱሲ ዴዒሺን ኔ ኢሻ አይፌን ዴዒያ ቡሪያ ኬሶ ጋናው ዋና ዳንዳዓይ?⁵ ኔኖ ጩቡዋው፥ ኮይሮታዳ ኔ አይፌን ዴዒያ ቱሲ ዳኔይሳ ኬሳ። ኢያፔ ጉዩ፥ ኔ ኢሻ አይፌን ዴዒያ ቡሪያ ኬሳናው ኔ ጌሻ ያላና።

⁶ «ጉዩ ሲሚዲ ሂንቱና ሳዖና ሜላ ጌሻባ ካናታስ ዩጎፊቱ። ባንታ ቶሁዋን ዩዲዲ ኢሶና ሜላ ሂንቱ አልዖ ኢንቁዋ ጉዱንሶታ ሲንሳን ዩጎፊቱ።

ዎሲቱ፥ ኮዩቱ፥ ያጊቱ
(ሉቃ 11:9-13)

⁷ «ዎሲቱ ሂንቱው ኢሜታና፥ ኮዩቱ ሂንቱ ዴማና፥ ካሬ ዩዲ ያጊቱ ሂንቱው ዶዩታና።⁸ ዎሲያ አዴስካ ኢሜታና፥ ኮያ አዴስካ ቤንታና፥ ካሬ ዩዲ ያጊያ አዴስካ ዶዩታና።

⁹ «ሂንቱ ጊዶፌ ባ ናዒ ኡይሲ ዎሲኮ ሹቺ ኢሜይ አኔ?¹⁰ ዎይኮ ዋሎ ዎሲኮ ሾሺ ኢሜይ ዴዒ?¹¹ ያቲን ሂንቱ ኢታ ጊዲሼ ሂንቱ ናይታስ ሎዖባ ኢዋ ኤሪኮ፥ ሂንቱ ሳሎ አዋይ ባና ዎሴይሳታስ ሎዖባ ዋቲ ዳርሲዲ ኢሜኔ?¹² ሃራቲ ሂንቱው አላና ሜላ ሂንቱ ኮያባ ኡባ ሂንቱካ ሃራታስ አሲቱ። አይስ ጊኮ፥ ሙሴ ሂጌይኔ ናቤቲ ታማርሴይ ሃይሳ።

¹³ «ፁንሳ ዉላራ ጌሊቱ፤ አይስ ጊኮ፥ ዳዮስ ኤፊያ አጌይ ዎጋ፥ ዉላይካ ዳልጋ። ኢያራ ጌሊያ አሳይካ ዳሮ።¹⁴ ሺን ዴዑዋኮ ኤፊያ አጌይኔ ዉላይ ፁንሉ፤ ያ ጌሊያ አሳይካ ጉላ።

ሚሲ ባ አይፌን ኤሬቱስ
(ሉቃ 6:43-44)

¹⁵ «ቦላ ባጋራ ዶርሴ ዳኔዲ ባንታ ጋላን ሱዳሜ ጊዲዲ ሂንቱ ጊዶ ጌሊያ ዎርዳንቾ ናቤታፔ ናጌቲቱ።¹⁶ ሂንቱ ኤንታ፥ ኤንታ

7:2 ማር 4:24 7:12 ሉቃ 6:31

አይፊያፕ ካራና፤ አጉንጎፊ ወይኔይ፤ ኪንቾቴፕ ላዴይ ማጌቴና።
 17 ሄሳ ሜላ ሎዎ ሚሲ ኡባይ ሎዎ አይፊ አይፊ። ኢታ ሚሲ
 ኢታ አይፊ አይፊ። 18 ሎዎ ሚሲ ኢታ አይፊ አይፊና፤ ቃሲ
 ኢታ ሚሲ ሎዎ አይፊ አይፋናው ዳንዳዳና። 19 ሎዎ አይፊ
 አይፎና ሚሲ ኡባይ ቃንጌቴዲ ታማን ፀጌታና። 20 ሄሳ ጊሾ፤
 ሂንቴ ኤንታ፤ ኤንታ አይፊን ካራና።

21 «ሳሎን ዴዲያ ታ አዋ ሽኒያ አሲያ ኡራይ ሳሎ ካዎቴሲ
 ጌላናፕ አቲን ጮ ታና <ጎዳው፤ ጎዳው> ጊያ ኡባይ ሳሎ ካዎቴሲ
 ጌሌና። 22 ፒርዳ ጋላስ ዳርቲ፤ <ጎዳው፤ ጎዳው፤ ኔ ሱንጎን
 ቲንቢቴ አዲቦኮ? ኔ ሱንጎን ቱና አያናታ ኬሲቦኮ? ኔ ሱንጎን
 ማላታታ አሲቦኮ?> ያጋና። 23 ሄ ዎዴ ታኒ፤ ታ ሂንቴና ኡባራካ
 ኤሪኬ፤ ሂንቴ ኢታ አሴይሳቲ ታፕ ሃኪቴ» ያጋና።

24 «ሂዛ፤ ሃ ታ ቃላ ሲዲዲ አሲያ አኒካ ባ ኬላ ሹቻ ቦላ ኬዲዳ
 ዎዛናማ አሳ ሜላ። 25 ኢራይ ቡኪስ፤ ዲዎይ ዲዲስ፤ ጫርኮይካ
 ጫርኪዲ ሄ ኬላ ሱጊስ። ሺን ኬላይ ሹቻ ባሶ ቦላ ኬዲቲዳ ጊሾ
 ኩንዲቤና። 26 ሃ ታ ቃላ ሲዲዲ አሶና አኒካ ባ ኬላ ሻፌ ቦላ ኬዲዳ
 ኤያ ኡራ ሜላ። 27 ኢራይ ቡኪዲ፤ ዲዎይ ዲዲዲ፤ ጫርኮይካ
 ጫርኪዲ፤ ሄ ኬላ ሱጊን፤ ሄ ኬላይ ኩንዲስ፤ ኢያ ኩንዴሳይካ
 ዎልቃማ» ያጊስ።

28-29 ዩሱሲ ባ አዳ አንጊዳ ዎዴ ኢያ ቲሚርቲይ ሂጌ
 አስታማሬታ ሜላ ጊዶና ማታራ ጊዲያ ጊሾ አሳይ ኢያ
 ቲሚርቲያን ማላሌቲዶሶና።

8

ዩሱሲ ባሮ ሃርጋንቹዋ ፓሲስ
 (ማር 1:40-45፤ ሉቃ 5:12-16)

1 ዩሱሲ ዴሪያፕ ዎዲያ ዎዴ ዳሮ አሳይ ኢያ ካሊዶሶና። 2 ሄኮ
 ኢሲ ባሮ ሃርጋንቹይ ኢያኮ ሸቀዲ፤ ኢያ ሲንጎን ጉልባቲዲ፤
 «ጎዳው፤ ኔ ሽኔ ጊዲኮ ታና ጊሻዳ ፓላናው ዳንዳዳና» ያጊስ።
 3 ዩሱሲ ባ ኩሺያ ዩዲዲ ኢያ ቦቹዲ፤ «ኤ፤ ታ ሽኔ፤ ፓፃ»
 ያጊስ። ኡራይ ኢራካ ጌዩ አጊስ። 4 ዩሱሲ ኢያኮ፤ «ኔ ፓፀዋ
 አዴስካ አዶፓ። ሺን ባዳ ኔ ጌያዳ ፓዎይሳ ካሂኔ ቤሳ፤ ኔ ፓፀዋስ
 ማርካ ጊዳና ሜላ ባዳ ሙሴይ ኪቲዳ ያርሹዋ ያርሻ» ያጊስ።

ማቶ ሃላቃ አማኑዋ

7:19 ማቶ 3:10፤ ሉቃ 3:9 7:20 ማቶ 12:33 7:23 ማዝ 6:8 7:28-29
 ማር 1:22፤ ሉቃ 4:32 8:4 ሴዌ 14:1

5 ዮሱሲ ቂፊርናሆሜ ካታማ ጋኪዳ ዎዴ ኢሲ ማቶ ሃላቃይ ኢያኮ ሸቂዲ፥ 6 «ጎዳው፥ ታ አይሌይ አሳቴሳይ ጉንዲን ዳር ሃርጌቲዲ፥ ሶን ዜንዲዲ ዴዔስ» ያጊዲ ዎሲስ።

7 ዮሱሲ ዛሪዲ፥ «ታኒ ባዳ ኢያ ፓላና» ያጊስ።

8 ሺን ማቶ ሃላቃይ ዛሪዲ፥ «ጎዳው፥ ኔ ታ ሶ ጌላናው ቤሲያ አሲ ጊዲኬ፥ ሺን ኔ ሃን ኡታዳ ቃላ ሃላላ ኦዳ፥ ታ አይሌይ ፓሃና። 9 አይስ ጊኮ፥ ታፔ ቦላራ ታ ኪቴቲያ አሳቲ ዴቦሶና፥ ቃሲ ታፔ ጋርሳራ ታው ኪቴቴይሳቲ ዴቦሶና። ኤንታፊ ኢሱዋ፥ <ባ> ጊያዴ ቤስ፤ ሃንኩዋ ቃሲ <ሃያ!> ጊያዴ ዮስ፥ ታ አይሊያ፥ <ሃይሳ አላ> ጊያዴ አሴስ» ያጊስ።

10 ዮሱሲ ሄሳ ሲዲዳ ዎዴ ማላሌቲዲ፥ ባና ካሊያ አሳኮ፥ «ታ ሂንቴው ቱማ ኦዳይስ፤ ታኒ ሃይሳ ሜላ አማኖ ኢስራዔሌ አሳንካ ቤዓቢኬ። 11 ታ ሂንቴው ኦዳይስ፤ ዳርቲ ዶሎሃፔኔ ወሎሃፔ ዩዲ፥ ሳሎ ካዎቴላን አብራሃሜራ፥ ዩሳቃራኔ ያይቆባራ ኢሲፊ ኢማቶ ቦላ ኡታና። 12 ሺን ሳሎ ካዎቴላ ሳታናው ቤሲሺን አቲዳይሳቲ ካሬ ጴማን ሆሌታና። ያን ኤንታው ዮሆኔ አቻ ጋርጩሲ ጊዳና» ያጊስ።

13 ዮሱሲ ማቶ ሃላቃኮ፥ «ኔ ሶ ባ፥ ኔ አማኩዋሶ ኔው ሃኖ» ያጊስ። ኢያ አይሌይ ሶሁዋራ ፓፂ አጊስ።

**ዮሱሲ ዳር ሃርጋንቾታ ፓሲስ
(ማር 1:29-34፤ ሉቃ 4:38-41)**

14 ዮሱሲ ጴጊሮሳ ሶ ጌሊያ ዎዴ ጴጊሮሳ ማቼ አያ ቆዎ ሚሻ ሃርጌን ሳኬታዳ ዜንዲዳር ቤዲስ። 15 ዮሱሲ ኢ ኩሺያ ቦቹዳ ዎዴ ቆዎይኔ ሚሻይ አጊ አጊስ። ፓፃ ዴንዳዳ ኢያ ሞካሱ።

16 ሄ ዎዴ አማርሲ ቱና አያናን አይኬቲዳ ዳር አሳታ፥ አሳይ ዮሱሳኮ ኤሂዶሶና። ኢካ ቱና አያናታ ባ ቃላን ኬሲስ፥ ሃርጋንቾታ ኡባ ፓሲስ። 17 ሄሳንካ ናቢያ ኢሳያሲ፥

«ኢ ኑ ሃርጊያ ባው ኤኪስ፥

ኢ ኑ ሃርጊያ ቶኪስ»

ጊዳ ቃላይ ፖሌቲስ።

**ዮሱሳ ካሎይ ጨጊሲያ ጋቲያ
(ሉቃ 9:57-62)**

18 ዮሱሲ ዳር አሳይ ኢያ ዩሹዋን ኤቂዳይሳ ቤዲዲ፥ አባፌ ሄፊንሲ ፒናና ሜላ ባ ታማሬታ ኪቲስ። 19 ሂጌ አስታማሬታፔ ኢሶይ፥ «አስታማሬያው፥ ኔ ቢያሶ ኡባ ታ ካላና» ያጊስ።

8:11 ሉቃ 13:29 8:12 ማቶ 22:13፤ 25:30፤ ሉቃ 13:28 8:17 ኢሳ 53:4

20 ዮሱሲ ኢያሱ «ዎርካናታስ አሊ ዴዔስ፤ ሳሎ ካፎታስ ኬሲ ዴዔስ። ሺን አሳ ናዓስ ባ ሁዲያ ሺምፒሲያ ቤሲ ባዎ» ያጊስ።

21 ዮሱሳ ካሊያ አሳታፔ ኢሶይ፤ «ጎዳው፤ ታኒ ሲንሳታ ባዳ ታ አዎ ሞጋዳ ያና» ያጊስ።

22 ሺን ዮሱሲ፤ «ሃይቂዳይሳቲ ባንታ ሃይቆታ ሞጎ፤ ኔኒ ታና ካላ» ያጊስ።

ዮሱሲ ሆቢያ ሲዲ አሲስ
(ማር 4:35-41፤ ሉቃ 8:22-25)

23 ዮሱሲ ባናው ዎጎሎዋን ጌሊዳ ዎዴ ኢያ ታማሬቲካ ኢያራ ባናው ጌሊዶሶና። 24 ኤንቲ ቆፖና ዴዲሺን፤ ዎልቃማ ሆቤይ ሃላ ቦላ ዴንዲን ዎጎሎይ ሚቴታናው ጋኪስ። ሺን ዮሱሲ ዲስኪስ።

25 ኢያ ታማሬቲ ኢያሱ ሺቂዲ ኢያ ባርኬሲዲ፤ «ጎዳው፤ ኑ ዳዮስ ኑና አሻርኪ» ያጊዶሶና።

26 ዮሱሲ ኤንታኮ፤ «ሂንቴኖ፤ አማኖይ ፓጪዳይሳቶ፤ አይስ ያዩቲ?» ያጊስ። ዴንዲዲ፤ ሆቢያኔ ጎቲያ ኤሲስ። ኤሌሲዲ ኡባባይ ሲዲ ጊስ።

27 ኢያ ታማሬቲ ማላሌቲዲ፤ «ሃይሲ፤ ሃሪ አቶሺን፤ ሆቤይኔ ጎቴይ ኪቴቴይሲ ዋኒዳ አሴ?» ያጊዶሶና።

ቱና አያናይ አይኪዳ ናምዑ አሳታ
(ማር 5:1-20፤ ሉቃ 8:26-39)

28 ዮሱሲ አባፌ ሄፊንሳን ዴዲያ ጌርጌሶኔ ጊያ ቢታ ጋኪዳ ዎዴ ቱና አያናይ አይኪዳ ናምዑ አሳቲ ዱፎፔ ኬዬዲ ኢያራ ጋሄቲዶሶና። ኤንቲ ዳሮ ኢታኔ ያሺያ አሳታ ጊዲያ ጊሾ አሲ ሄ ቤሳራ አዳናው ዳንዳዔና። 29 ኤንቲካ፤ «ያሳ ናዓው፤ ኑናኔ ኔና አይቤ ጋሴይ? ዎዴይ ጋኮና ዴዲሺን ኑና ፒርዳናው ያዲ?» ጊዲ ዋሲዶሶና።

30 ኤንታፌ ዳሮ ሃኮና ጉዱንሶ ዉዴይ ሄሜቴስ። 31 ቱና አያናቲ ዮሱሳ፤ «ኔ ኑና ኬሳናባ ጊዲኮ፤ ሂኒ ጉዱንሶ ዉዲያ ጊዶ ዮዳርኪ» ያጊዲ ዎሲዶሶና።

32 ዮሱሲ፤ «ቢቴ» ያጊስ። ቱና አያናቲ አሳታፔ ኬዬዲ ጉዱንሶታን ጌሊዶሶና። ጉዱንሶቲ ኡባይ አፎ ዶናራ ዲርጊዲ ቢዲ አባን ሚቴቲዲ ሃይቂዶሶና።

33 ጉዱንሶ ዉዲያ ሄሜይሳቲ ባቃቲዲ ካታማ ቢዲ፤ ሃኒዳባኔ ቱና አያናይ አይኪዳ አሳታ ቦላ አሴቲዳባ ኡባ አዲዶሶና።

34 ያቲን፤ ካታማን ዴዲያ አሳ ኡባይ ዮሱሳ ቤዓናው ኬዬዶሶና። ኤንቲ ዮሱሳ ቤዲዳ ዎዴ ባንታ ቢታፌ ኬዬዲ ባና ማላ ዎሲዶሶና።

9

ጉንዳ ኡራ ፓፁዋ

(ማር 2:1-12፤ ሉቃ 5:17-26)

¹ ሄሳፌ ጉዩ፥ ዩሱሲ ዎጎሉዋን ጌሊዲ፥ አባ ፒኒዲ ባ ካታማ ቢስ። ² ሃሂዳ ጉሳ አሳቲ ኢሲ ጉንዳ ኡራ አልጋራ ቶኪዲ ዩሱሳኮ ኤሂዶሶና። ዩሱሲ ኤንታ አማኑዋ ቤዒዲ፥ ጉንዳ ኡራ፥ «ታ ናዓው፥ ያዮፋ! ኔ ናጋራይ አቶ ጌቴቲስ» ያጊስ።

³ ሄ ሳቲያን፥ አይሁዴ ሂጌ አስታማሬታፕ ኢሶቲ ኢሶቲ፥ «ሃይሲ ያሳ ጫሼ ጊዴኔ» ያጊዲ ባንታ ዎዛናን ቆፒዶሶና።

⁴ ዩሱሲ ኤንታ ቆፋ ኤሪዲ፥ «ኢታባ ሂንቴ ዎዛናን አይስ ቆፕቲ? ⁵ ሃኖሺን፥ <ኔ ናጋራይ አቶ ጌቴቲስ> ጌይሳፌኔ <ዴንዳ ኤቃዳ ባ> ጌይሳፌ አዉሲ ካዉዴ? ⁶ ሺን ሳዓ ቦላ ናጋራ አቶ ጋናው አሳ ናዓስ ማቲ ዴዔይሳ ታ ሂንቴና ኤሪሳና» ያጊዲ፥ ጉንዳ አዲያኮ፥ «ዴንዳ ኤቃ፥ ኔ አልጋ ቶካዳ፥ ኔ ሶ ባ» ያጊስ።

⁷ ጉንዳ ኡራይ ዴንዲዲ ባ ሶ ቢስ። ⁸ ዴሬይ ሄሳ ቤዒዲ ማላሌቲዶሶና፥ ሄሳ ሜላ ማታ አሳስ ኢሚዳ ያሳ ጋላቲዶሶና።

ማቶሳ ዩጌቴሳ

(ማር 2:13-17፤ ሉቃ 5:27-32)

⁹ ዩሱሲ ያፕ ዴንዲዲ ቢሼ ማቶሳ ጌይሳ ቃራፃ ቃንጊሲያ ቤሳን ኡቲዳሺን ቤዒዲ፥ «ታና ካላ» ያጊስ።

ኢካ ዴንዲዲ ካሊስ።

¹⁰ ዩሱሲ ማቶሳ ሶን ጋይታ ቦላ ኡቲዳሺን፥ ቃራፃ ቃንጊሲያ ዳር አሳቲኔ ናጋራንቾቲ ዩዲ ኢያራኔ ኢያ ታማሬታራ ኢሲፌ ማናው ኡቲዶሶና። ¹¹ ኢሲ ኢሲ ፋሪሳዌቲ ሄሳ ቤዒዲ፥ ዩሱሳ ታማሬታ፥ «ሂንቴ አስታማሬይ ቃራፃ ቃንጊሴይሳታራኔ ናጋራንቾታራ አይስ ሚ?» ያጊዶሶና።

¹² ዩሱሲ ሄሳ ሲዒዲ፥ «ዳሌ ኮሼይ ሃራጋንቾታሳፌ አቲን ፓፃታሳ ጊዴና። ¹³ ሺን ሂንቴ ቢዲ፥ <ታኒ ሂንቴ ያርሹዋ ጊዶናሺን ሂንቴ ሃራታ ማራና ሜላ ኮያይስ> ጌቴቲዲ ፃፌቲዳይሲ ዎይ ጉሴኮ ኤሪቴ። አይስ ጊኮ፥ ታኒ ናጋራንቾታ ዩጋናው ያሲፕ አቲን ጊሎታ ዩጋናው ያቢኬ» ያጊስ።

ዩሱሲ ያማባ አይሼቲስ

(ማር 2:18-22፤ ሉቃ 5:33-39)

¹⁴ ሄ ዎዴ ዮሃንሳ ታማሬቲ ዩሱሳኮ ሺቂዲ፥ «ኑኔ ፋሪሳዌቲ ያሞስ፥ ሺን ኔ ታማሬቲ አይስ ያሞኮና?» ያጊዲ አይቺዶሶና።

15 ዩሱሲ ዛሪዲ ኤንታኮ፥ «ሙሹራይ ኤንታራ ዴቢሺን ግንቲዲ ዩሳ አሳይ ካዮታናው ዳንዳዮና? ሙሹራይ ኤንታ ማታፔ ኤኬታና ወዴይ ያና፥ ኤንቲ ሄ ወዴ ያማና።

16 «አራሳ ማገፔ ፔዲዲ ጋልዓ ማገ ቦላ ሲኬይ አኒካ ባዋ። ሄሳሶ አሲኮ አራሳይ ጋልዓ ፔዴስ። ፔዴሳይካ ጉጂ ዳልጊስ።

17 አራሳ ወይኔ ጋልዓ አጎሮን ቆሊያ አኒካ ባዋ። ሄሳሶ አሲኮ አራሳ ወይኔይ ጋልዓ አጎሩዋ ዱሴስ ወይኔይካ ጉኩስ፤ አጎሮይካ ናምዓንሶ ማዶናባ ጊዴስ። ሺን አራሳ ወይኔይ አራሳ አጎሮን ቆሌታናው ቤሴስ። ሄሳሶ አሴቲኮ ናምዓይካ ኢቶና ናጌቶሶና» ያጊስ።

ሃይቂዳ ናዲወኔ ዩሱሳ አፊላ ቦቺዳ ማጫሲው

(ማር 5: 21-43፤ ሉቃ 8: 40-56)

18 ዩሱሲ ሄሳ አዶ ቦላ ዴቢሺን፥ አይሁዴ ሃላቃታፔ ኢሶይ ኢያኮ ዩዲ፥ ኢያ ሲንሳን ጉልባቲዲ፥ «ታ ናዲያ ሃዲ ሃይቃሱ፥ ሺን ኢያ ፓፃና ሜላ ኔኒ ያዳ ኔ ኩሺያ ኢ ቦላ ዎሳርኪ» ጊዲ ወሲስ። 19 ዩሱሲ ዴንዲዲ ኢያራ ቢስ፤ ኢያ ታማሬቲካ ካሊዶሶና።

20 ኢ ቢሺን ታማኔ ናምዑ ሳይሲ ኩሜሲ ሱሲ ጎጊዲ ዋይሲያ ኢሲ ማጫሲያ ጉዩራ ሺቃዳ ዩሱሳ አፊላ ማጫራ ቦቻሱ። 21 ኢያ ባ ዎዛናን፥ «ታ ኢያ አፊላ ማጫራ ፃላላ ቦቺያኮ ፓፃና» ያጋዳ ቆፓሱ።

22 ዩሱሲ ጉዩ ሲሚ ኢዮ ጌሊዲ፥ «ታ ናቴ፥ ያዮፋ! ኔና ኔ አማኖይ ፓሲስ» ያጊስ። ማጫሲያ ሶሁዋራ ፓፃ አጋሱ።

23 ዩሱሲ አይሁዴ ሃላቃ ሶ ጋኪያ ወዴ ዛዩ ፑኔይሳታኔ ዩኬይሳታ ቤዲዲ፥ 24 «አኔ ኪቺቴ፤ ጉሳ ናዲያ ዲስካሱፔ አቲን ሃይቃሱ» ያጊስ። ሺን አሳይ ኢያ ቦላ ሚጫዶሶና። 25 አሳ ካሬ ኪሲዳፔ ጉዩ ሶ ጊሊዲ፥ ናዲ ኩሺያ አይኪስ፥ ናዲያ ዴንዳ ኤቃሱ። 26 ሄ ወሬይ ሄ ቢታ ኡባ ጋኪስ።

ዩሱሲ ናምዑ ቆቄታ ጌሊሲስ

27 ዩሱሲ ያፔ ዴንዲዲ ጌዴ ሲንሴ ቢያ ወዴ ናምዑ ቆቄቲ ባንታ ቃላ ዶቁ አሲዲ፥ «ዳዊቴ ናዓው፥ ኑና ማራርኪ» ያጊሼ ኢያ ካሊዶሶና።

28 ዩሱሲ ሶ ጊሊዳ ወዴ ቆቄቲ ኢያ ካሊዲ ዩዶሶና። ዩሱሲ ኤንታኮ፥ «ታ፥ ሄሳ አሳናው ዳንዳዴሳ ሂንቴ አማኔቲ?» ያጊስ። ኤንቲካ፥ «ኤ፥ ጎዳው» ያጊዲ ዛሪዶሶና።

29 ሄሳፌ ጉዩ፥ ዩሱሲ ኤንታ አይፊያ ቦቺዲ ኤንታኮ፥ «ሂንቴው፥ ሂንቴ አማኑዋሶ ሃና» ያጊስ። 30 ኤንታ አይፊይካ

ዶቶቲስ። ዮሱሲ ኤንታኮ፣ «ሃይሳ አደስካ አዶፒቱ» ያጊዲ ሚንሲ አዲስ። ³¹ ሺን አሳቲ ቢዲ ዮሱሳባ ሄ ቢታ ኡባን አዲዶሶና።

³² ኤንቲ ያፔ ኬያ ዎዴ አሳይ ቱና አያናይ አይኪዲ ሙሚሲዳ ኢሲ አሲ ዮሱሳኮ ኤሂዶሶና። ³³ ቱና አያናይ ኬዬዳፔ ጉዬ ሙሜ ኡራይ አዴቲስ። ዴሬይካ ማላሌቲዲ፣ «ሃይሳ ሜላ አራሳባይ ኢስራዔሌ ቢታን ሃኒቤና» ያጊዶሶና።

³⁴ ሺን ፋሪሳዌቲ፣ «ቱና አያናታ ሃላቃን ቱና አያናታ ኬሴስ» ያጊዶሶና።

ዮሱሲ አሳስ ቃዴቲስ

³⁵ ዮሱሲ አይሁዴ ዎሳ ኬሳታን ታማርሲሼ፣ ሳሎ ካዎቱሳ ዎንጊላ ሳባኪሼ፣ አሳ ሃርጌ ኡባፌ ፓሲሼ ካታማታኒኔ ጉታ ኡባን ዩዩስ። ³⁶ ዳሮ ዴሬይ፣ ሄሚያ አሲ ባይና ዶርሳዳ ኤንታና ቤዲያ አሲ ዳዩን ኡንዔቲዲ ዴዔይሳታ ቤዲዲ ኤንታው ቃዴቲስ። ³⁷ ባ ታማሬታኮ፣ «ሺቃና ካሳይ ዳሮ፣ ሺን ካሳ ሺሺያ አሳይ ጉላ። ³⁸ ሄሳ ጊሾ፣ ጎዳይ ካሳ ሺሺያ አሳንቾታ ዩዳና ሜላ ዎሲቱ» ያጊስ።

10

ዮሱሲ ኪቲዳ ታማኔ ናምዑ ሃዋሬታ (ማር 3:13-19፤ ሉቃ 6:12-16)

¹ ዮሱሲ ታማኔ ናምዑ ታማሬታ ባኮ ዪጊዲ፣ ቱና አያናታ ኬሳና ሜላኔ ሃርጌ ኡባ ፓሳና ሜላ ኤንታው ማታ ኢሚስ።

² ዮሱሲ ኪቲዳ ታማኔ ናምዑ ሃዋሬታ ሱንሳይ፣ ኮይሮይ ጴጊሮሳ ጊያ ሲሞናኔ ኢያ ኢሻ ኢንዲሪያሳ፣ ዛብዲዮሳ ናዓ ያይቆባኔ ኢያ ኢሻ ዮሃኒሳ፣ ³ ፊልጶሳኔ ባርቶሎሚዮሳ፣ ቶማሳኔ ቃራግ ቃንጊሲያ ማቶሳ፣ ኢልፊዮሳ ናዓ ያይቆባ፣ ታዲዮሳ፣ ⁴ ባ ቤታስ ሚሼቲያ ሲሞናኔ ዮሱሳ አሲ ኢሚዳ አስቆሮታ ዩሁዳ።

⁵ ሄ ታማኔ ናምዓታ ዮሱሲ ኪቲዲ ዩዲሼ፣ «አይሁዴ ጊዶና ዴሬያኮ ቦፒቱ፣ ቃሲ ሳማሬታ ካታማካ ጌሎፒቱ። ⁶ ሺን ኢስራዔሌ ኬሳፌ ጊዲዳ ሂኒ ዳዩዳ ዶርሳታኮ ቢቱ። ⁷ ያ ቢዲ፣ ሳሎ ካዎቱሳይ ማታቲስ» ጊዲ አዲቱ። ⁸ ሃርጋንቾታ ፓሲቱ፣ ሃይቂዳይሳታ ሃይቆፔ ዴንሲቱ፣ ባሮ ሃርጋንቾታ ጌሺ ፓሲቱ፣ ቱና አያናታ ኬሲቱ። ሂንቱ ሮ ኤኪዳይሳ ሮ ኢሚቱ። ⁹ ሂንቱ ኪሴን ዎርቃ፣ ዎይኮ ቢራ ሳንቲሜ አይኮፊቱ። ¹⁰ ሂንቱ አጊያስ

9:34 ማቶ 10:25፤ 12:24፤ ማር 3:22፤ ሉቃ 11:15 9:35 ማቶ 4:23፤ ማር 1:39፤ ሉቃ 4:44 9:36 ታይ 27:17፤ 1ካዎ 22:17፤ 2ታሪ 18:16፤ ሂዝ 34:5፤ ማር 6:34 9:37 ሉቃ 10:2 10:7 ሉቃ 10:4-12

ካርዲቶ፣ ናምዑ አፈላ፣ ወይኮ ጫማ ወይኮ ሃምዓ አይኮፊቱ፤ አሳንቸዋስ ጋሳሳ ካሲ ኮሺስ።

11 «ሂንቴ ኢሲ ካታማ ወይኮ ጉታ ጌሊያ ወይኮ ሂንቴና ሞኪዲ ኤካናው ኡፋይቲያ ኡራ ኮዩዲ ኢያ ሶን ሽምፒቱ፤ ሂንቴ ባና ጋካናው ያን ጋምዲቱ። 12 ቃሲ አዴ ሶካ ጌሊሽ ሳሮሲቱ። 13 ሄ ኬሳይ ሂንቴና ሞኪኮ ሂንቴ ሳሮሲዳ ሳሮይ ኤንታና ጋኮ፣ ሺን ኤንቲ ሞኮና ኢዊኮ ሂንቴ ሳሮሲዳ ሳሮይ ሂንቴው ጉዩ ሲሞ። 14 እኒካ ሂንቴና ሞኮናኔ ሂንቴ አዲያባ ሲያና ኢዊኮ ሄ ኬሳፊ ወይኮ ሄ ካታማፔ ኬዩሽ ሂንቴ ቶሁዋን ዴዲያ ባና ፒቲዲ ኬዩቱ። 15 ታ ሂንቴው ቱማ አዳይስ፤ ያሳ ፒርዳ ጋሳሳን ሄ ካታማፔ ሶዶሚኒኔ ጋሞራ ካታማታስ ፒርዳይ ካወያና።

16 «ታ ሂንቴና ዶርሳታዳ ሱዳሜታ ጊዶ ዩዳና። ሄሳ ጊሾ፣ ሾሻዳ ጪንጫታ፣ ሆሌዳ አዳታ ጊዲቱ። 17 አሳይ ሂንቴና ፒርዳ ዳይናታስ አሲ ኢማና፣ ቃሲ አይሁዴ ያሳ ኬሳን ሂንቴና ጋራፋና፣ ሄሳ ጊሾ፣ ኤንታፊ ናጌቲቱ። 18 ታ ጊሾ ጊዲ ሂንቴና ዴሪያ ሃሬይሳታ ሲንሴኔ ካዎታ ሲንሴ ኡፋና። ኤንታ ሲንሳኒኔ አይሁዴ ጊዶና ዴሪያ ሲንሳን ኡቁዲ ሂንቴ ታባ ማርካታና። 19 ሺን ሂንቴና ፒርዳስ አሲ ኢሚያ ወይኮ ወይኮ ዛሪኖ ጊዲ ኡንዬቶፊቱ፤ ሄ ሳቲያን ሂንቴ ጋናባ ያሳይ ሂንቴው ኢማና። 20 አይስ ጊኮ፣ ሂንቴናን ሃሳዬይ ሂንቴ አዋ ጌሻ አያናፔ አቲን ሂንቴና ጊዴኬታ።

21 «ኢሻይ ባ ኢሻ፣ አዋይ ባ ናዓ፣ ሃይቆስ አሲ ኢማና፣ ናይቲ ባንታና ዩሊዳይሳታ ቦላ ዴንዲዲ ኤንታና ወዲሳና። 22 ታ ጊሾ ጊዲ አሳ ኡባይ ሂንቴና ኢፃና፣ ሺን ወርሴሲ ጋካናው ሚኒዳይ አታና። 23 ኢሲ ሄራፔ ሂንቴና ኤንቲ ጎዲኮ ሃራ ካታማ ባቃቲቱ። ታኒ ሂንቴው ቱማ አዳይስ፤ አሳ ናዓይ ያና ጋካናው፣ ሂንቴ ኢስራዬሌ ካታማ ኡባ ካንሴኬታ።

24 «ታማሬይ ባ አስታማሪያ፣ አይሌይ ባ ጎዳፔ አዴና። 25 ታማሬይ ባ አስታማሪያ፣ አይሌይ ባ ጎዳ ዳኒኮ ኢያው ጊዳና። ኬሳዋ ቢዔልክቡላ ጊኮ ኢያ ሶ አሳ ዋኒዲ ኢሲዲ ዌኒኔ?

26 «ሂዛ፣ አሳስ ያዮፊቱ። ካሜቲዳባይ ቆንጮና፣ ቆሴቲዳባይ ጌሺ ኬዮና አቴና። 27 ታኒ ሂንቴው ዳማን አዲያባ ሂንቴ ፖያን

10:10 1ቆሮ 9:14፤ 1፲ሞ 5:18 10:14 ሃ.አ 13:51 10:15 ማቶ 11:24፤ ሜዴ 19:24 10:16 ሉቃ 10:3 10:17 ማር 13:9-11፤ ሉቃ 12:11-12፤ 21:12-15 10:21 ማር 13:12፤ ሉቃ 21:16 10:22 ማቶ 24:9፤ ማር 13:13፤ ሉቃ 21:17፤ ማቶ 24:13፤ ማር 13:13 10:24 ሉቃ 6:40፤ ዮሃ 13:16፤ 15:20 10:25 ማቶ 9:34፤ 12:24፤ ማር 3:22፤ ሉቃ 11:15 10:26 ማር 4:22፤ ሉቃ 8:17

አዲቱ፤ ታ ሂንቴው ሃይላን ካልካሺዳባ ዳባባን አዋጁቴ።²⁸ አሾፕ አቲን ሽምፖ ዎዳናው ዳንዳዎናይሳታስ ያዮፊቴ። ሺን ሽምፑዋኔ አሾዋ ጋናሜን ዳይሳናው ዳንዳዊያ ያሳስ ያዩቴ።²⁹ ናምዑ ቡቤቲ ኢሲ ሳንቲሜን ባይዘቶኮናዩ? ሃኖፕ አቲን፣ ኤንታፌ ኢሲናካ ሂንቴ ያሳይ ጎና ዴሂሺን ሳዓን ዎዳኩ።³⁰ ሃሪ አቶሺን፣ ሂንቴ ሁዔ ቢናናይካ ፓይዴቲዲ ዴዔስ።³¹ ሂዛ፣ ዳሮ ቡቤታፕ ሂንቴ አዲያ ጊሾ ያዮፊቴ።

³² «አሳ ሲንሳን ታው ማርካቲያ ኡባስ ታኒካ ሳሉዋን ዴዲያ ታ አዋ ሲንሳን ማርካታና።³³ ሺን አሳ ሲንሳን ታና ካዴይሳ ታኒካ ሳሎን ዴዲያ ታ አዋ ሲንሳን ካዳና።

³⁴ «ታኒ ሳዓን ሳሮ ኤሃናው ዩዳ ሂንቴው ዳኖፖ። ታኒ ቶራፕ አቲን ሳሮቴሲ ኤሃናው ያቢኬ።³⁵ ታኒ ዩዳይ፣

ናዓ አዋፕ ማጫ ናዲው አዩፕ

ናዓ ማቺው አዚና አዩፕ ሻካናሳ።

³⁶ አሳስ ሞርኬቲ ኢያ ሶ አሳታ ጊዳና።»

³⁷ «ታፕ አሲዲ ባ አዋ ዎይኮ ባ አዩው ዶሴይ፣ ታባ ጊዳናው ቤሴና። ባ አዴ ናዓ ዎይኮ ባ ማጫ ናዲው ታፕ አሲዲ ዶሴይ፣ ታባ ጊዳናው ቤሴና።³⁸ ባ ማስቃሊያ ቶኪዲ ታና ካሎና አኒካ ታባ ጊዳናው ቤሴና።³⁹ ባ ሽምፑዋ አሻናው ኮዩይ ዳይሳና፣ ሺን ባ ሽምፑዋ ታ ጊሾ አሲ ኢሜይ አሻና።

⁴⁰ «ሂንቴና ሞኬይ ታና ሞኬስ፣ ታና ሞኬይ ቃሲ ታና ኪቲዳይሳ ሞኬስ።⁴¹ ናቢያ ናቤ ሱንሳን ሞኬይ፣ ናቢያሶ ዎይቴታና፤ ቃሲ ዲሉዋ ዲሎ ሱንሳን ሞኬይ፣ ዲሉዋሶ ዎይቴታና።⁴² ታ ሂንቴው ቱማ አዳይስ፤ ሃ ታ ታማሬታፕ ጉዲያ ኢሉዋስ ታና ካሊያ ጊሾ ሃሪ አቶሺን ጉሳ ኢርፃ ሃላ ኢሚኮ ኢያ ዎይቶይ ዳዩና» ያጊስ።

11

ግግቲያ ዮሃንሲ ኪቲዳ አሳታ (ሉቃ 7:18-35)

¹ ዩሱሲ ታማኔ ናምዑ ታማሬታ ኪታ አንጊዳፕ ጉዩ ያፕ ዴንዲዲ ታማርሳናውኔ ሳባካናው ጋሊላ ካታማታ ቢስ።

10:33 2ጊዋ 2:12 10:35 ሚክ 7:6 10:38 ግብግ 16:24፤ ማር 8:34፤ ሉቃ 9:23 10:39 ግብግ 16:25፤ ማር 8:35፤ ሉቃ 9:24፤ 17:33፤ ዮሃ 12:25
10:40 ሉቃ 10:16፤ ዮሃ 13:20፤ ማር 9:37፤ ሉቃ 9:48

2 የሃኒሲ ቃሾ ኪሳን ዴዲሼ ኪሪስቶሲ አሲያባታ ሲዲዲ፥ ባ ታማሬታፔ ኢያኮ ኪቲዲ፥ 3 «ያና ጌቴቲዳይ ኔኔዬ? ዎይኮ ኑኒ ሃራ ናጊኖ?» ያጊዲ አይቺስ።

4 ዮሱሲ ኤንታኮ ዛሪዲ፥ «ቢዲ ሂንቴ ሲዲያባኔ ሂንቴ ቤዲያባ የሃኒሳስ አዲቱ፥ 5 ቆቄቲ ጌሎሶና፥ ዎቤቲ ሃሙቶሶና፥ ባሮ ሃርጋንቾቲ ፓዎሶና፥ ቱሌቲ ሲዎሶና፥ ሃይቀዳይሳቲ ሃይቆፔ ዴንዶሶና፤ ማንቆታስ ዎንጌላይ ሳባኬቴስ። 6 ታናን ዱቤቶናይ አንጄቲዳይሳ» ያጊስ።

7 የሃኒሳ ታማሬቲ ጉዩ ሲሚዲ ቢን፥ ዮሱሲ ዴሪያስ የሃኒሳባ አዲሼ፥ «ሃ ባዙዋ አይ ቤዓናው ኬዬዴቲ? ጫርኮይ ቃሲያ ማቃ ቤዓናው ዩዴቲዬ? 8 ያቲን፥ አይ ቤዓናው ኬዬዴቲ? ኪቴ ማዎ ማዲዳ አሴ ቤዓናሴዬ? ኪቴ ማዎ ማዲዳይሳቲ ካዎታ ኪሳን ዴዎሶና። 9 ያቲን፥ አይ ቤዓናው ኬዬዴቲ? ናቤ ቤዓናሴዬ? ሄኮ፥ ሂንቴ ናቤፔካ አደይሳ ቤዔታ።

10 «ኔ አጊያ ኔ ሲንሳን ጊጊሲያ ታ ኪታንቺዋ ኔፔ ሲንሴ ኪታና» ጌቴቲዲ ዓፌቲዳይ አያሳ።

11 ታ ሂንቴው ቱማ አዳይስ፤ ማጫሳፔ ዮሌቲዳይሳታ ጊዶፌ የሃኒሳፔ አደይ አኒካ ባዋ፤ ሳሎ ካዎቴሳን ኡባፌ ጉዲይ ኢ፥ ኢያፔ አዳና። 12 ዓማቂያ የሃኒሳ ዎዲያፔ ዶሚዲ ሃቺ ጋካናው ሳሎ ካዎቴሳይ ዳሮ ናቄቴስ፥ ሚኒዳ አሳቲ ዎልቃን ያ ጌላና። 13 ናቤቲ ኡባይኔ ሙሴ ሂጌይ የሃኒሳ ዎዴ ጋካናው ሳሎ ካዎቴሳባ ቲንቢቴ አዲዶሶና። 14 ሂዛ፥ ሂንቴ ኤንታ ኪታ አማናና ጊዲኮ፥ ያና ጌቴቲዳ ኤሊያሲ፥ ኢ የሃኒሳ። 15 ሂዛ፥ ሲዲያ ሃይሳ ዴዔይ ሲዎ።

16 «ሂዛ፥ ሃ ዎዲያ ዮሌቴሳ አይቢራ ዳኒሶ? ጊያ ጊዶን ኡቴዲ ዎሊ ያጊዲ፥

17 ኑ ሂንቴው ሱሱልዔ ፑኒን፤ ሂንቴ ዮዲኪታ። ኑ ሳቢዲ ዜሌሊን፤ ሂንቴ ዮኪኪታ)

ያጊያ ናይታ ዳኖሶና። 18 ዓማቂያ የሃኒሲ ሞናኔ ኡዮና ዩን፥ <ቱና አያኒ ዴዔስ> ያጊዴታ። 19 አሳ ናዓይ ሚሼኔ ኡዩሼ ዩን፥ <ያራምባኔ ኡሻንቾ፥ ቃራፃ ቃንጊሴይሳታኔ ናጋራንቾታ ዳቦ> ያጊዴታ። ሂዛ፥ ጨንጫቴሳ ቱማቴሳይ ኢያ አሱዋን ቆንጨሽ» ያጊስ።

11:5 ኢሳ 35:5 11:10 ሚል 3:1 11:12 ሉቃ 16:16 11:14 ሚል 4:5፤ ማቶ 17:10

አማኖና ኢዲዳ ካታማታ

(ሉቃ 10:13-15)

20 ሄሳፌ ጉዩ፥ ዩሱሲ ዳሮ ማላታታ አሲዳ ካታማታን ዴዲያ አሳቲ ባንታ ናጋራፔ ሲሚዲ ማርታን ጌሎና ኢዲዳ ጊሾ ኤንታና፥

21 «አዩ ኮራዚኔ ካታማው፥ አዩ ቤቴሳይዳ ካታማው፥ አይስ ጊኮ፥ ሂንቴ ጊዶን አሴቲዳ ማላታቲ ሂሮሳኔኔ ሲዶናን አሴቲዳ ጊዲያኮ፥ ኤንቲ ቤኒ ቢዶ ቲዩቲዲ፥ ካሌ ማዲዲ ባንታ ናጋራፔ ሲሚ አጋና። 22 ሺን ታ ሂንቴው አዳይስ፤ ፐርዳ ጋላስ ሂንቴፌ አሲዲ ሂሮሳሲኔ ሲዶናስ ፐርዳይ ካዉያና። 23 ቃሲ፥ ቂፊርናሆሜ፥ ኔኒ ፑዴ ሳሎ ኬያናው ኮያይ? ሃኔና! ኔኒ ሲዶሌን ዩጌታና፥ አይስ ጊኮ፥ ኔ ጊዶን አሴቲዳ ማላታቲ ሶዶሜን አሴቲዳባ ጊዲያኮ፥ ሶዶሜይ ሃቺ ጋካናው ዴዳናሺን። 24 ሺን ታ ኔው አዳይስ፤ ፐርዳ ጋላስ ኔፔ አሲዲ ሶዶሜስ ፐርዳይ ካዉያና» ያጊዲ ሃንቁቲስ።

ኪሪስቶስን ዴዲያ ሼምፖ

(ሉቃ 10:21-22)

25 ሄ ዎዴ ዩሱሲ፥ «አዋው፥ ሳሉዋኔ ሳዓ ጎዳው፥ ኔኒ ሃይሳ ኤራንቾታፔኔ ጨንጫታፔ ጌንሳዳ ናይታስ ቆንጨሲዳ ጊሾ ኔና ጋላታይስ። 26 ኤ፥ ታ አዋው፥ ሃይሲ ኔ ሎዎ ሼኒያዳ ሃኒስ።

27 «አባይ ታው ታ አዋፔ ኢሜቲስ። አዋፔ ሃሪ ናዓ ኤሬይ ባዋ፥ ናዓፔኔ ኢ ኤንታው ቆንጨሳናው ኮዩይሳታፔ ሃሪ አዋ ኤራናው ዳንዳዔይ ባዋ።

28 «ሂንቴኖ፥ ዳቡራንቾቶ፥ ቶሆይ ዴዲዳ አባይ ታኮ ሃ ዩቴ፤ ታኒ ሂንቴና ሼምፐሳና። 29 ታኒ ታ ዎዛናን አሽኬኔ አዳ ጊዲያ ጊሾ ታ ቃምባራን ጌሊቴ፥ ታፔ ታማሪቴ፤ ሂንቴ፥ ሂንቴ ሼምፑዋስ ሼምፖ ዴማና። 30 ታ ቃምባራይ ሊቆ፥ ቃሲ ታ ቶሆይካ ካዉሼ» ያጊስ።

12

ሳምባታ ቦንቻናው ቤሲ?

(ማር 2:23-28፤ ሉቃ 6:1-5)

1 ሄሳፌ ጉዩ፥ ሳምባታ ጋላስ፥ ዩሱሲ ጋዴ ጊዶራ አዴስ። ዩሱሳ ታማሬቲ ኮሻቲዳ ጊሾ ቲያ ባንጋ ሺሪኪዲ ሞሶና። 2 ሺን

11:21 ኢሳ 23:1-18፤ ሃዘ 26:1-28:26፤ ኢዩ 3:4-8፤ አዎ 1:9-10፤ ዛነ 9:2-4
 11:23 ኢሳ 14:13 11:24 ማቶ 10:15፤ ሉቃ 10:12 11:27 ዮሃ 3:35፤
 ዮሃ 1:18፤ 10:15 11:29 ኤር 6:16 12:1 ዛሬ 23:25

ፋሪሳዊቲ ሄሳ ቤዲዲ ዩሱሳኮ፥ «ሄኮ፥ ኔ ታማሬቲ ሳምባታ ጋላስ አሳናው ቤሶናባ አሶሶና» ያጊዶሶና።

3 ዩሱሲ ኤንታኮ ዛሪዲ፥ «ዳዊቴይ ኮሻቲዳ ዎዴ ኢያራ ዴዔይሳታራ አይ አሲዳኮ ናባቢቤኬቲ? 4 ዳዊቴይ ዎሳ ኬሲ ጌሊዲ ካሂኔታ ፃላላፕ ኣቲን ኢኔ ኢያራ ዴዔይሳታስ ቤሶና ጊሻ ዳቡዎ ሚስ። 5 ዎይኮ ካሂኔቲ ሳምባታ ዎጋ ሻሪዲ ዎሳ ኬላን ሳምባታ ጋላስ አሶ አሲኮ ኤንታው ባላ ጊዶናይሳ ሙሴ ሂጊያን ናባቢቤኬቲ? 6 ሺን ሲዲቴ! ዎሳ ኬሳፌ አደይ ሃይሳን ዴዔስ። 7 <ታኒ ሂንቴ ያርሹዎ ጊዶናሺን ሂንቴ ሃራታ ማራና ማላ ኮያይስ> ጊያ ቃላይ ዎይ ጉሴኮ ሂንቴ ኤሪዳኮ ጊሎ አሳ ቦላ ፐርዴኬታ።

8 አሳ ናዓይ ሳምባታ ንዳ» ያጊስ።

9 ዩሱሲ ያፕ ቤዲ አይሁዴ ዎሳ ኬሲ ጌሊስ። 10 ያን ኩሼይ ጉንዲዳ ኢሲ ኡራይ ዴዔስ። ዩሱሳ ሞታናው ጋሶ ኮያ አሳቲ፥ «ሳምባታ ጋላስ ፓላናው ቤሲ ቤሴኔ?» ያጊዲ አይቺዶሶና።

11 ኢ ኤንታኮ፥ «ሂንቴ ጊዶፌ ኢሱዋስ ዶርሲ ሳምባታ ጋላስ አፎን ወሊኮ፥ ንቺዲ ኬሶናይ አኔ? 12 ያቲን አሲ ዶርሳፌ ዋኒዲ ዳር አደፊ? ሄሳ ጊሾ፥ ሳምባታ ጋላስ ሎዎባ አሶይ ቤሴስ» ያጊስ።

13 ሄሳፌ ጉዩ፥ ዩሱሲ አዲያኮ፥ «ኔ ኩሺያ ፒዲ አሳ» ያጊን፥ ኡራይ ፒዲ አሲስ። ኢያ ኩሼይ ፓዲዲ ሃንኮ ኩሺያዳ ሃኒስ። 14 ሺን ፋሪሳዊቲ ያፕ ካሬ ኬዩዲ፥ ዩሱሳ ዋቲ ዎዳኔኮ ማቄቲዶሶና።

ዎሳይ ዶሪዳ አይሊያ

15 ዩሱሲ ኤንታ ቆፋ ኤሪዲ ሄ ቤሳ አጊዲ ሃራ ሶ ቢስ። ዳር አሳይ ኢያ ካሊዲ ቢዶሶና፥ ሃርጋንቾታ ኡባ ፓሲስ። 16 ዩሱሲ፥ «ታባ ሃራ አዴስካ አዶፒቴ» ያጊዲ ሚንሲ አዲስ። 17 ሄሲካ ናቢያ ኢሳያሲ፥

18 «ሄኮ ታ ዶሪዳ አይሌይ፥
ታ ዶሴይሲ፥ ታና ኡፋይሴይሲ፥
ታኒ ታ አያና፥ ኢያ ቦላ ሽምፒሳና፤
ኢ፥ አይሁዴ ጊዶና ዴሪያስ ሱሬ ፐርዳባ አዋጃና።

19 ኢ ፓላሜና ዎይኮ ካጩና፤
ባ ቃላካ ዴንባን ሮ ሲሴና።

20 ሱሬ ፐርዳን ዎኖ ዴማና ጋካናው፥
ዲንጩቲዳ ማቃ ሜንሴና፥
ጩዩያ ሙቃዳ ቶይሴና።

21 አይሁዴ ጊዶና ዴሬይ ኡባይ ኢያን ኡፋይሲ ዎላና»

12:3 1ሳሙ 21:1-6 12:4 ሌዌ 24:9 12:5 ታይ 28:9-10 12:7 ማቶ
9:13፤ ሆሴ 6:6 12:11 ሉቃ 14:5 12:18 ኢሳ 42:1-4

ያጊዲ ዓፊዳይሲ ፖሌታና ሜላሳ።

ዮሱሳኔ ቢዔልዜቡላ
(ማር 3:20-30፤ ሉቃ 11:14-23)

22 ሄሳፌ ጉዮ፥ ቱና አያናን አይኬቲዳ ቆቄኔ ሙሜ አሴ ዴዔይሳ ኢያኮ ኤሂዶሶና። ዮሱሲ ኡራ ፓሲን፥ ኡራይ ቤዒሲኔ አዴቲስ። 23 አሳ ኡባይ ማላሌቲዲ፥ «ሃይሲ ዳዊቱ ናዓ ጊዳንዴሻ?» ያጊዶሶና።

24 ሺን ፋሪሳዌቲ ሄሳ ሲዒዲ፥ «ሃ ኡራይ ቱና አያናታ ኬሴይ ቱና አያናታ ሃላቃ ቢዔልዜቡላ ዎልቃና» ያጊዶሶና።

25 ዮሱሲ ኤንታ ቆፋ ኤሪዲ፥ «ዎሊ ጊዶን ሻኬቲያ ካዎቴላ ኡባይ ኩንዳና፤ ቃሲ ዎሊ ጊዶን ሻኬቲያ ካታማይ ዎይኮ ኬሳይ ሚኒዲ ኤቁና። 26 ዓላሄይ ዓላሄ ኬሲያባ ጊዲኮ ባ ጊዶን ሻኬቲስ ጉሱ። ሄሳሶ ሃኒያባ ጊዲኮ ኢያ ካዎቴሳይ ዋኒዲ ሚኒዲ ኤቃናው ዳንዳዒ? 27 ታኒ ቱና አያና ኬሴይ ቢዔልዜቡላ ዎልቃን ጊዲኮ ሂንቴና ካሊያ አሳቲ አዴ ዎልቃን ኬሳኔ? ሄሳ ጊሾ፥ ሂንቴና ካሊያ አሳቲ ሂንቴና ፒርዳና። 28 ሺን ታኒ ቱና አያናታ ኬሴይ ዶሳ አያናን ጊዲኮ፥ ዶሳ ካዎቴሳይ ሂንቴኮ ዩስ።

29 «ዎይኮ ኢሲ አሲ ዎልቃማ አሳ ሶ ጊሊዲ ኢያ ሻሉዎ ቦንቃናው ኮይኮ ኮይሮቲዲ ሄ ኡራ ቃሾና ኢዒኮ ዋቲዲ ዳንዳዒ? ያቲኮ ኢያ ሻሉዎ ቦንቃናው ዳንዳዒስ።

30 «ታራ ጊዶናይ አኒካ ታራ ኤቁቴስ፤ ቃሲ ታራ ኢሲፌ ሺሾና ኡባይ ላሌስ። 31 ሄሳ ጊሾ፥ ሲዒቴ፤ አሳይ አሊያ አይ ናጋሪኔ ጫሻ ቃሊ ኡባይ አቶ ጌቴታና፥ ሺን ጌሻ አያና ጫያ አዴስካ ኢያ ናጋራይ አቶ ጌቴታና። 32 አኒካ አሳ ናዓ ቦላ ኢታባ አዴቲኮ ኢያው አቶ ጌቴታና፥ ሺን ጌሻ አያና ቦላ ኢታባ አዴቲያ አዴስካ ሃ ሳዓን ጊዲን ያና አላሚያን ኢያ ናጋራይ አቶ ጌቴታና።

33 «ሎዎ ሚሳይ ሎዎ አይፌ አይፌስ፤ ቃሲ ኢታ ሚሳይ ኢታ አይፌስ። ሂዛ፥ ሚሳይ ኤሬቴይ ባ አይፌያና። 34 ሂንቴና፥ ሾሻ ናይቶ፥ ሂንቴ ኢታ ጊዲሼ ዋኒዲ ሎዎባ አዴታናው ዳንዳዒቲ? አሲ ባ ዎዛናን ኩሚዳባፔ ዶናን አዴቴስ። 35 ሎዎ አሲ ባ ዎዛናን ዎሲዳ ሎዎባፔ፥ ሎዎባ ኬሴስ፤ ኢታ አሲ ባ ዎዛናን ዎሲዳ ኢታባፔ፥ ኢታባ ኬሴስ። 36 ሺን ሲዒቴ፥ አሳይ አዴቲያ ጮ አዳ ኡባስ ፒርዳ ጋላስ ዛሮ ኢማና። 37 አይስ ጊኮ፥ ኔ አዴቲያ ኔ ቃላን ዒላና፤ ኔ አዴቲያ ኔ ቃላይ ኔ ቦላ ፒርዳና» ያጊስ።

12:24 ግብግ 9:34፤ 10:25 12:30 ግር 9:40 12:31 ሉቃ 12:10 12:32 ሉቃ 12:10 12:34 ግብግ 3:7፤ 23:33፤ ሉቃ 3:7፤ ግብግ 15:18፤ ሉቃ 6:45

ማላታ ቤዓናው ሺቂዳ አይሻ

(ማር 8: 11-12፤ ሉቃ 11: 29-32)

38 ሄሳፌ ጉዬ፥ ኢሲ ኢሲ ፋሪሳዌቲኔ ሂኒ አስታማሬቲ ዮሱሳኮ፥ «አስታማሪያው፥ ኔኒ ማላታ አሳዳ ኑና ቤሳ» ያጊዶሶና።

39 ሺን ዮሱሲ ዛሪዲ፥ «አማኔቶናኔ ኢታ ዮሌቴሳይ ማላታ ኮዬስ። ሺን ናቢያ ዮናሳ ማላታ፤ ሃራ ማላቲ ኢያው ኢሜቴና።

40 ዮናሲ ጊታ ሞሎ ኡሎን ሄሹ ጋላሲኔ ሄሹ ቃማ ጋምዲዳይሳ ሜላ አሳ ናዓይ ሄሹ ጋላሲኔ ሄሹ ቃማ ቢታ ጋርሳን ጋምዓና።

41 ናናዌ አሳይ ፐርዳ ጋላስ ዴንዲዲ ሃ ዮሌቴሳ ቦላ ፐርዳና፤ አይስ ጊኮ፥ ኤንቲ ዮናሳ ሲብካቲያ ሲዲዲ ባንታ ናጋራ፤ ሲሚዶሶና።

ሄኮ፥ ዮናሳ፤ አዴይሲ ሃይሳን ዴዔስ። 42 ፐርዳ ጋላስ ዱጊሃ ካዊያ ዴንዳዳ ሃ ዮሌቴሳ ቦላ ፐርዳና፤ አይስ ጊኮ፥ ኢያ ሶሎሞኔ

ጪንጫቴሳ ሲዓናው ቢታ ጋፃ፤ ያሱ። ሄኮ፥ ሶሎሞኔ፤ አዴይ ሃይሳን ዴዔስ።

43 «ቴና አያናይ አሳ፤ ከዬዳ፤ ጉዬ ባው ሽምፐያሶ ኮዬዲ ሃሲ ባይና ሜላ ቤሳን ዳቡሬስ፥ ሺን ባ ኮያ ሽምፐዋ ዴሜና።

44 ያኒን፥ ስታ አጋ ከዬዳ ከሳ ሲማዳ ባና) ያጊስ። ኢ ሲሚያ ዎዴ ከሳይ ካይሲ ጊዴይሳኔ ፐቴቲዲ ጊጊ ኡቲዳይሳ ዴሜስ። 45 ሂዛ፥

ሲሚ ቢዲ፥ ባ፤ ኢቲያ ሃራ ላፑን ኢታ አያናታ ኤኪዲ ዮስ፤ ኤንቲካ ኡራ ጊዶ ጊሊዲ ዴዎሶና። ሄ ኡራስ ካሴይሳፌ ጉዬይሲ ዳሮ ኢቴስ። ሃ ኢታ ዮሌቴሳ ቦላ ሄሳ ሜላ ሃናና» ያጊስ።

ዮሱሳ አዩወኔ ኢያ ኢሻታ

(ማር 3: 31-35፤ ሉቃ 8: 19-21)

46 ዮሱሲ ዴሪያስ አዳ ቦላ ዴዲሺን ኢያ አያኔ ኢያ ኢሻቲ ኢያ አዲሳናው ኮዬዲ ካሬን ኤቂዶሶና። 47 ኢሲ አሲ ኢያኮ፥ «ኔ አያኔ ኔ ኢሻቲ ኔና አዲሳናው ኮዬዲ ካሬን ኤቂዶሶና» ያጊስ።

48 ዮሱሲ ዛሪዲ፥ «ታ አያ ኦኔ? ታ ኢሻቲካ አናንቴ?» ያጊስ።

49 ባ ኩሺያራ ታማሬታ ማሊሼ፥ «ቤዲቴ፥ ታ አያኔ ታ ኢሻቲ ሃይሳታ። 50 ሳሎን ዴዲያ ታ አዋ ሽኒያ አሲያ ኡባይ ታ ኢሻ፥

ታ ሚቾኔ ታ አዮ» ያጊስ።

13

ዜሬሲ ዜሪያ ኡራ ሌሚሶ

(ማር 4: 1-9፤ ሉቃ 8: 4-8)

12:38 ማቶ 16:1፤ ማር 8:11፤ ሉቃ 11:16 12:39 ማቶ 16:4፤ ማር 8:12

12:40 ዮሃ 1:17 12:41 ዮሃ 3:5 12:42 1ካዎ 10:1-10፤ 2ታሪ 9:1-12

1 ሄ ጋላስ ዩሱሲ ሶፔ ኪዩዲ አባ ጋፃን ኡቲስ። 2 ዳሮ ዴሬይ ኢያ ዩሹዋን ሺቂን አሳ አባ ጋፃን አጋጊዲ ዎጎሎን ጌሊዲ ኡቲስ።

3 አሳስ ዳሮባ ሌሚሶን ያጊዲ አዲስ።

«ኢሲ ጎሻንቾይ ዜሬሲ ዜራናው ኪዩስ። 4 ኢ ዜሪያ ዎዴ ኢሲ ኢሲ ዜሬሳቲ አጌ ጋፃን ዎዲዶሶና፤ ኤንታካ ካፎቲ ዩዲ ማሂ ሚዶሶና። 5 ኢሲ ኢሲ ዜሬሳቲ ጋርሳን ሻሎይ ዴዲያ ቢታ ቦላ ዎዲዶሶና። ዳሮ ቢቲ ባይና ጊሾ ኤሌሲዲ ዶሊስ። 6 ሺን አዋይ ኪዩን ሹሊስ፤ ፃጰይ ባይና ጊሾ ሜሊስ። 7 ኢሲ ኢሲ ዜሬሳይ አጉንሳ ጊዶን ዎዲስ፤ አጉንሳይ ዲጨዲ ሄ ዶላ ጨሊስ። 8 ሃራቲ ቃሲ አራዳ ቢታ ቦላ ዎዲስ፤ ዶሊዲ አይፌ አይፊስ። ኢሶይ ዪታ፣ ኢሶይ ኡሱፑን ታማ፣ ኢሶይ ቃሲ ሃስታማ አይፊስ። 9 ሲዲያ ሃይሲ ዴዲያ ኡራይ ሲያ» ያጊስ።

10 ዩሱሳ ታማሬቲ ኢያኮ ሺቂዲ፣ «አይስ ነኔ ዴሪያስ ሌሚሶን አዳይ?» ያጊዲ አይቺዶሶና።

11 ኢ ዛሪዲ፣ «ሂንቴው ሳሎ ካዎቴሳ ፀራ ኤራይ ኢሜቲስ፣ ሺን ኤንታው ኢሜቲቤና። 12 ዴዲያ ኡባስ ጉገፎታና፣ ኢያው ዳራና፣ ሺን ባይናይሳሬ ሃሪ አቶሺን ኢያው ዴዲያራካ ኤኪታና።

13 ሄሳ ጊሾ፣ ታኒ ኤንቲ፣ ዪሊሼ ዴዋና ሜላ፣ ሲዲሼ ሲያና ሜላ ዎይኮ አኪኮና ሜላ ኤንታው ሌሚሶን አዳይስ።

14 «ኢሳያሲ ባ ማፃፋን አዲዳይሲ ኤንታ ቦላ ፖሌቲስ። ኢ አዲሼ፣

ሂንቴ ሲሳ ሲዔታ፣ ሺን አኪኪኪታ፤

ሂንቴ ያሌታ፣ ሺን ቤዔኪታ።

15 አይስ ጊኮ፣ ሃ አሳ ዎዛናይ ዜልዑሚስ፤

ባንታ ሃይሳ ኤሪሼ ቱሊሲዶሶና፣

ባንታ አይፊያ ጎዚዶሶና።

ሄሲ ባይኒኮ ኤንቲ ባንታ አይፊያን ቤዲዲ፣

ባንታ ሃይሳን ሲዲዲ፣

ባንታ ዎዛናን አኪኪዲ፣

ታኮ ሲማና፣

ታካ ኤንታ ፓሳናሺን» ያጊስ።

16 «ሺን ሂንቴ አይፊሬቲ ቤዲያ ጊሾኔ ሂንቴ ሃይሳቲ ሲዲያ

ጊሾ ሂንቴ አንጄቲዳይሳታ። 17 ታ ሂንቴው ቱማ አዳይስ፤

ዳሮ ናቤቲኔ ዪሎ አሳቲ ሂንቴ ቤዔይሳ ቤዓናዉኔ ሂንቴ ሲዔይሳ

ሲዓናው አዋቲዶሶና፣ ሺን ኤንታው ሃኒቤና።

18 «ሂዛ፣ ሃ ዜሬሳ ዜሪያ ኡራ ሌሚሱዋ ሲዲቴ። 19 አጌ

ጋፃን ዎዲዳ ዜሬሳ ሌሚሶይ ሃይሳ፣ ሳሎ ካዎቴሳ ቃላ ሲዲዲ

13:2 ሉቃ 5:1 13:12 ማቶ 25:29፤ ማር 4:25፤ ሉቃ 8:18፤ 19:26
13:16 ሉቃ 10:23-24

አኬኮና ኡራ ዎዛና፤ ገላሄይ ዩዲ ኢያ ዎዛናን ዴዲያ ዜሬሳ ማጊ ዲጊስ።²⁰ ሻሎይ ጋርሳን ዴዲያ ቢታ ቦላ ዜሬቲዳይሲ ቃላ ሲዲዲ ኤሌሲዲ ኡፋይሳን ኤኬይሳታ።²¹ ሺን ገጾ ዩዳናው ዳንዳዎና ጊሾ ዳር ጋምዎኮና። ቃላ ጋሶን ሜቶይ ዎይኮ ጎዴቴሲ ያ ዎዴ ኤሌሲ ዲቤቶሶና።²² አጉንሳ ጋሳን ዜሬቲዳይሲ ቃላ ሲዲስ፤ ሺን ሃ አላሚያ ዱሳ ሂርጋይኔ ዱሬቴሳ ቆፋይ ቃላ ጩሊያ ጊሾ አይፌ አይፎና አቴስ።²³ ሺን አራዳ ቢታን ዜሬቲዳ ዜሬሳይ አኬካን ቃላ ሲዲያ ኡራ። ኢ አይፌ አይፌስ፤ ኢሶይ ዪታ፤ ኢሶይ ኡሶፑን ታማ ኢሶይ ቃሲ ሃስታማ አይፌስ» ያጊስ።

ሌሹዋ ሌሚሶ

²⁴ ዩሱሲ ኤንታው ሃራ ሌሚሶ አዲስ፤ «ዎሳ ካዎቴሳይ ባ ጎሻን ሎዎ ዜሬሲ ዜሪዳ ኡራ ዳኔስ።²⁵ ሺን አሲ ኡባይ ዲስኪን ኢያ ሞርኬይ ዩዲ ጊስቲያ ጊዶን ሌሾ ዜሪዲ ቢስ።²⁶ ጊስቲይ ዲጩዲ አይፊያ ዎዴ ሌሾይ ኢያ ጊዶን ቤንቲስ።

²⁷ «ጋዲያ ጎዳ አይሌቲ ጎዳኮ ቢዲ፤ ጎዳው፤ ኔ ጎሻን ኔ ሎዎ ዜሬሲ ዜራቢኪሾ? ያቲን፤ ሌሾይ አዉፔ ዩዴ?» ያጊዶሶና።

²⁸ «ኢ ኤንታኮ፤ ሄሳ ሞርኬይ አሲስ» ያጊስ።

«አይሌቲ ጎዳኮ፤ ጉ ቢዲ ሌሹዋ ሾዳና ሜላ ኮያይ?» ያጊዶሶና።

²⁹ «ሺን ኢ፤ ጎዳ ሰቾሬቴ፤ ሂንቴ ሌሹዋ ሾዳይስ ጊሺን ጊስቲይ ሾዴታና።³⁰ ሰቾሬቴ፤ ጫካ ዎዴይ ጋካናው ኢሲፌ ዲጮ። ሄ ዎዴ ጫኪያ አሳታ ሌሹዋ ሲንሳቲዲ ማጊዲ ታማን ፁጋናው ሚርቁን ሚርቁን ቃቺቴ። ሺን ጊስቲያ ሺሺዲ ታ ሻሊያን ቆሊቴ» ያጋና» ያጊስ።

ጉሳ ሚሴ ሌሚሶ

(ማር 4:30-32፤ ሉቃ 13:18-19)

³¹ ቃሲ ሃራ ሌሚሶ ያጊዲ አዲስ፤ «ሳሎ ካዎቴሳይ ኢሲ አሲ ባ ጎሻን ባኪዳ ጉሳ ሚሴ አይፌ ዳኔስ።³² ሄ ሚሴ አይፌይ ሃራ ሚሳ አይፌታፔ ጉሳ፤ ሺን ኢያ ዶላ ዲጩዳ ሃራ ሚሳታ ኡባፌ አዳ ጊታታዉሱ። ኢ ታሺያን ካፎቲ ኬዲዲ ኡታና ጋካናው ዎልቃማ ሚሴ ጊዳዉሱ» ያጊስ።

ኢርሾ ሌሚሶ

(ሉቃ 13:20-21)

³³ ካሊዲካ፤ ዩሱሲ ሃራ ሌሚሶ አዲስ፤ «ሳሎ ካዎቴሳይ ኢሲ ማጫሲ ሄሹ ጋባቴ ዲሌ ኤካ ሙኑቃዳ፤ ሙኑቃይ ዴንዳና ሜላ ኢያን ጉጂዳ ኢርሾ ዳኔስ» ያጊስ።

³⁴ ዩሱሲ ዴሪያስ ሄ ሌሚሱዋ ኡባ አዲስ። ሌሚሶይ ባይና ኢሲባካ አዲይና።³⁵ ናቤይ ባ ማፃፋን፤

«ታኒ ታ ዶና፥ ሌሚሶን ዶያና፤
 ሳሎይኔ ሳዓይ ሜዴቶሳፕ፥
 ጌሚዳይሳ አዳይስ»
 ያጊዲ አዲዳይሲ ሄሳን ፖሌቲስ።

ሌሾ ሌሚሱዋ ቢርሼላ

³⁶ ዩሱሲ ዴሪያ ሞይዚዲ ሶ ጌሊስ። ኢያ ታማሬቲ ኢያኮ ሺቂዲ፥ «ጎሻን ዴሚያ ሌሾዋ ቢርሼላ ኑስ አዳ» ያጊዶሶና።

³⁷ ኢ ዛሪዲ፥ «ሎዎ ዜሬላ ዜሪዳይ አሳ ናዓ። ³⁸ ጎሻይ ሃ አላሚያ፥ ሎዎ ዜሬላይ ሳሎ ካዎቴላ ናይታ። ሌሾይ ፃላሄ ናይታ። ³⁹ ሌሾዋ ዜሪዳይ ሞርኪያ ፃላሄ። ጫካ ዎዴይ፥ ዎዲያ ወርሴላ። ጫኪይሳቲ ኪታንቾታ።

⁴⁰ «ሌሾይ ማዌቲዲ ታማን ፀጌቴይሳ ሜላ ዎዲያ ወርሴላን ሄሳዳ ሃናና። ⁴¹ አሳ ናዓይ ባ ኪታንቾታ ኪታና። ኤንቲ ናጋራስ ጋሶ ጊዴይሳታኔ ኢታ አሲያ ኡባ ማዊዲ ኢያ ካዎቴላፌ ኬሳና። ⁴² ማዊ ሺሺዲ ዩሆይኔ አቻ ጋርጩሲ ዴሚያ ቶዎና ታማን ዩጋና። ⁴³ ሄ ዎዴ ዒሎቲ ባንታ አዋ ካዎቴላን አዋዳ ፖዎና። ሲዒያ ሃይሲ ዴዔይ ሲዎ!

⁴⁴ «ዶሳ ካዎቴላይ ጎሻን ሞጌቲዳ ሚሼ ዳኔስ። ኢሲ አሲ ሄ ሚሺያ ዴሚዲ ዛሪ ሞጊስ። ዳሮ ኡፋይቲዲ ቢዲ ባው ዴሚያባ ኡባ ባይዚዲ ሄ ጎሻ ጋዲያ ሻሚስ።

⁴⁵ «ሄሳዳካ፥ ቃሲ ሳሎ ካዎቴላይ ኢንቆ ጊያ አልዎ ሹቻታ ኮያ ዛልዓንቾ ዳኔስ። ⁴⁶ ዳሮ አልዎ ኢንቁዋ ዴሚዲ ቢዲ ባው ዴሚያባ ኡባ ባይዚዲ ኢያ ሻሚስ።

ሞሎ አይኪያ ጌቲ ሌሚሶ

⁴⁷ «ቃሲ ዶሳ ካዎቴላይ አባን ዩጌቲዳ ዱማ ዱማ ቆሞ ሞሎ አይኪያ ጌቲያ ዳኔስ። ⁴⁸ ሞሎ አይኪያ አሳቲ ሞሎይ ጌቲያን ኩሚን አባፌ ጋፃ ኬሲዶሶና። ያን ኡቲዲ ሎዑዋ ቆሪ ቆሪ ዳቾን ዩጊዶሶና፥ ሺን ኢታ ሞሎታ ዎራ ሆሊዶሶና። ⁴⁹ ዎዲያ ወርሴላን ሄሳላ ሃናና። ኪታንቾቲ ዩዲ ናጋራንቾታ ዒሎታፕ ሻኪዲ፥ ⁵⁰ ዩሆይኔ አቻ ጋርጩሲ ዴሚያ ቶዎና ታማን ዩጋና።

⁵¹ «ሃ ኡባይ ሂንቴው ጌሊዴ?» ያጊዲ ኤንታ አይቺስ።

ኤንቲ ዛሪዲ፥ «ኤ» ያጊዶሶና።

⁵² ዩሱሲ፥ «ሂዛ፥ ሳሎ ካዎቴላ ኤራ ኤኪዲ ሂጊያ ታማርሲያ ኡባይ፥ ባ ሚንጂዳ ሻሉዋፕ አራላኔ ጋልዓ ኬሲያ አሴ ዳኔስ» ያጊስ።

ዮሱሲ ናዘሬቴን ኢዲቲስ
(ማር 6:1-6፤ ሉቃ 4:16-30)

53 ዮሱሲ ሃ ሌሚሱዋ ኦዲ ወርሲዳፕ ጉዩ ያፕ ዴንዲዲ ቢስ።
54 ባ ዩሌቲዳ ቢታ ቢዲ አይሁዴ ዎሳ ኬሳን ዴሪያ ታማርሲስ።
ኤንቲ ማላሌቲዲ፣ «ሃ ኡራይ ሃ ጨንጫቴሳኔ ሃ ማላታታ አሲያ
ዎልቃ አወፕ ኤኪዴ?» 55 ሃይሲ አናዲያ ናዓ ጊዴኔይ? ኢያ አዩ
ሱንሳይ ማይራዎ ጊዴኔ? ኢያ ኢሻቲ ያይቆባ፣ ዮሴፋ፣ ሲሞናኔ
ዩሁዳ ጊዶኮናዩ? 56 ኢያ ሚቹቲ ኑራ ዴዎሶና ጊዶኮና? ያቲን፣
ሃ ኡራይ ሃ ኡባ አወፕ ኤኪዴ?» ያጊዶሶና። 57 ሄሳ ጊሾ፣ ኢ
ጊያባ ኤኮና ኢዲዶሶና።

ሺን ዮሱሲ፣ «ናቤይ ባ ዩሌቲዳ ቢታኒኔ ባ ሶ አሳ ማታን
ቦንቹቴና» ያጊስ። 58 ኤንቲ አማኖና ኢዲዳ ጊሾ ዳሮ ማላታታ ሄ
ቤሳን አሲቤና።

14

ግማቂያ ዮሃንሳ ሃይቁዋ
(ማር 6:14-29፤ ሉቃ 9:7-9)

1 ሄ ዎዴ ጋሊላ አይሲያ ሄሮዲሲ * ዮሱሳባ ሲዲስ። 2 ባ
አይሌታኮ፣ «ሃይሲ ግማቂያ ዮሃንሳ፤ ኢ ሃይቆፕ ዴንዲስ። ያኒዳ
ጊሾ ሃ ኡባ ማላታታ ኢ አሴስ» ያጊስ።

3 ኢ ሄሳ ጊዳይ ሄሮዲሲ ባ ኢሻ ፊልጳሳ ማቹ ሄሮዲያዲ ጋሶን
ዮሃንሳ ቃሾ ኬሳ ጌልሲዳ ጊሾሳ። 4 ዮሃንሲ ሄሮዲሳ፣ «ኔ ኢዮ
ኤካናው ዎጋ ጊዴና» ያጊስ። 5 ሄሮዲሲ ዮሃንሳ ዎዳናው ኮዩስ፣
ሺን ዴሬይ ዮሃንሳ ናቤ አሲዲ ቤዲያ ጊሾ ያሹቲስ።

6 ሄሮዲሲ ባ ዩሌቲዳ ጋሳሳ ቦንቹያ ዎዴ ሄሮዲያዳ ናዲያ አሳ
ሲንሳን ዩሳን ዱራዳ ኢያ ኡፋይሳሱ። 7 ያቲን፣ ኢ፣ «ኢያ ኮያባ
ኡባ ኢማና ጊዲ» ጫቂስ። 8 ናዲያ ባ አዩ ዞሪያ ሲዓዳ ሄሮዲሳኮ፣
«ግማቂያ ዮሃንሳ ሁዲያ ኬሬን ዎሳዳ ታው ኢማ» ያጋሱ። 9 ኢያ
ያጊን ካዎይ ቁሮቲስ፣ ሺን ባ ጫቁዋ ጊሾኔ ባራ ዴዲያ ኢማሳታ
ጊሾ ጊዲ ኢ አይሻይ ፖሌታና ሜላ ኪቲስ። 10 ካዎይ አሴ ኪቲዲ
ዮሃንሲ ቃሾ ኬሳን ዴዲሺን ኢያ ቆዲያ ጎይሪሲስ። 11 ሁዲያ
ኬሬን ዎሳ ኤሂዲ ናዔስ ኢሚዶሶና፤ ናዲያካ ኤካዳ ባ አዩስ
ኤፋሱ። 12 ዮሃንሳ ታማሬቲ ዩዲ ኢያ አሃ ኤሬዲ ሞጊዶሶና።
ኢያፕ ጉዩ ሃንዳባ ኡባ ቢዲ ዮሱሳስ አዲዶሶና።

13:57 ዮሃ 4:43 * 14:1 ሄሮዲሲ: ሃይሲ ካወዋ ሄሮዲስ አንቲጳሳ። ኢ ዩሁዳኔ
ፔሪያ ኪሪስቶሲ ዩሌታናፕ ሲንጌ 4-39 ም.ል. ጋካናው ሃሪስ። ኢ ካወዋ ሄሮዲሳስ
ናዓ። 14:4 ሉቃ 3:19-20፤ ሌዌ 18:16፤ 20:21

ዮሱሲ ኢቻሹ ሙኩሉ አሳ ሙዚስ

(ማር 6:30-44፤ ሉቃ 9:10-17፤ ዮሃ 6:1-14)

13 ዮሱሲ ሃኒዳባ ሲዲዳ ዎዴ ዎጎሉዋን ጌሊዲ ሄ ቤሳፌ ኢሲ ጌሚያ ሶ ባርካ ቢስ። አሳይ ሄሳ ሲዲዲ ካታማታፔ ዴንዲዲ ቶሆን ኢያ ካሊዶሶና። 14 ዮሱሲ ዎጎሉዋፔ ዎዲዲ ዳሮ አሳ ቤዲዲ ኤንታው ቃዴቲስ። ኤንታ ጊዶን ዴዲያ ሃርጋንቾታ ታሲስ።

15 ሳዓይ አማርሲሽ ቢያ ዎዴ ዮሱሳ ታማሬቲ ኢያኮ ሺቂዲ፥ «ሃ ቤሳይ አሲ ባይና ቤሲ፥ ሳዓይካ ቃሚስ። ያኒያ ጊሾ፥ ሄራን ዴዲያ ጉታታ ቢዲ ባንታው ሻሚዲ ማና ሜላ ዴሪያ ዮዳ» ያጊዶሶና።

16 ሺን ዮሱሲ ኤንታኮ፥ «ዴሬይ ሞና ባናው ኮሽና፤ ኤንቲ ማናባ ሂንቴ ኢሚቴ» ያጊስ።

17 ኤንቲ ዛሬዲ፥ «ኑስ ሃይሳን ኢቻሹ ኡይሳፌኔ ናምዑ ሞሎፔ ሃሪ ባዋ» ያጊዶሶና።

18 ኢካ፥ «አኔ ኤንታ ሃ ኤሂቴ» ያጊስ። 19 ካሊዲካ፥ ዴሬይ ማታን ኡታና ሜላ አዲስ። ኢቻሹ ኡይሳኔ ናምዑ ሞሎታ ኤኪዲ፥ ሳሎ ዪሊዲ ጋላቲ ሲሚዲ፥ ኡይሳ ሜንሲዲ ባ ታማሬታስ ኢሚስ፤ ኤንቲ ቃሲ ዴሪያስ ኢሚዶሶና። 20 ኡባይ ሚዲ ካሊዶሶና። ዮሱሳ ታማሬቲ ሚሺን አቲዳይሳ ታማኔ ናምዑ ጋይታ ዴንሲዶሶና። 21 ካሳ ሚዳ አሳይ ማጫሳይኔ ናይቲ አቲን ኢቻሹ ሙኩሉ ጊዴስ።

ዮሱሲ አባ ቦላራ ሃሙቲስ

(ማር 6:45-52፤ ዮሃ 6:15-21)

22 ዮሱሲ ባ ታማሬቲ ዎጎሉዋን ጌሊዲ ባፔ ሲንሳቲዲ አባፌ ሄ ፊንሲ ፒናና ሜላ ኪቲዲ ባው ዴሪያ ሞይዛናው ጉዬ አቲስ።

23 ዴሪያ ሞይዚ ሲሚዲ ባርካ ዎሳናው ኢሲ ዴሪያ ቦላ ኪዩስ። ሳዓይ ቃሚንካ ኢ ባርካ ያን ጋምዲስ። 24 ሄ ዎዴ ዎጎሎይ አባ ቦላ ቢሺን ሲንሳ ባጋራ ጫርኮይ ዴንዲን ሆቤይ ዎጎሉዋ ኡንዔሲስ።

25 ዎንቲማሳ ቦላ ዮሱሲ አባ ቦላ ሃሙቲሽ ባ ታማሬታኮ ዩስ።

26 ኢያ ታማሬቲ፥ ኢ አባ ቦላ ሃሙቲሽ ባንታኮ ዩይሳ ቤዲዲ ያዩዶሶና። ኤንቲካ፥ «ሃይሲ ሞይቲሌ» ጊዲ ያዩዲ ዋሲዶሶና።

27 ሺን ዮሱሲ ኤሌሲዲ፥ «አይኮይ ባዋ! ያዮፊቴ! ታናባይ» ያጊስ።

28 ጴጊሮሲ ኢያኮ፥ «ጎዳው፥ ኔና ጊዲኮ፥ ታኒ ሃሳ ቦላራ ሃሙታዳ ኔኮ ባና ሜላ ታና ኪታ» ያጊስ።

29 ዮሱሲ ጴጊሮሳኮ፥ «ሃያ» ያጊስ።

ጴጊሮሲ ዎጎሉዋፔ ዎዲዲ ሃሳ ቦላራ ሃሙቲሽ ዮሱሳኮ ቡሱ አይኪስ። 30 ሺን ዎልቃማ ጫርኮዋ ቤዲዲ ያዩስ። ሃሳን ሚቴቴሲ አይኪዳ ዎዴ «ጎዳው፥ ታና አሻርኪ» ያጊዲ ዋሲስ።

31 ዮሱሲ ኤሌሲዲ ባ ኩሺያ ዮዲ ኢያ አይኪዲ፥ «ኔኖ፥ አማኖይ ፓጩዳይሶ አይስ ሲዳይ» ያጊስ።

32 ዮሱሳራኔ ጴጊሮሳራ ዎጎሉዋን ጌሊዳ ዎዴ ጫርኮይ ሲዲ ጊስ። 33 ዎጎሉዋ ጊዶን ዴዲያ ኢያ ታማሬቲ፥ «ኔኔ ቱማካ ያሳ ናዓ» ጊዲ ጎይኒዶሶና።

34 ኤንቲ አባ ፒኒዲ ጌንሳሬዔ ቢታ ጋኪዶሶና። 35 ሄ ቢታን ዴዲያ አሳይ ዮሱሳ ኤሪዳ ዎዴ ባንታ ሄራን ዴዲያ ጉታ ኡባ ኪታ ዮዲዶሶና። አሳይ ሃርጋንቾታ ኡባ ኢያኮ ኤሂዶሶና።

36 ሃርጋንቾቲ ኢያ አፊላ ማጫራ ዓላላ ቦቻና ሜላ ዎሲዶሶና። ቦቹዳ ኡባይካ ፓሂዶሶና።

15

አዋታ ዎጋባ

(ማር 7:1-13)

1 ሄሳፌ ጉዮ፥ ኢሲ ኢሲ ፋሪሳዌቲኔ ሂጌ አስታማሬቲ ዮሩሳላሜፔ ዮሱሳኮ ዬዲ፥ 2 «ኔ ታማሬቲ አይስ ኑ አዋታ ዎጋ ሜንሶና? ኤንቲ ካሲ ማናፔ ሲንሴ ባንታ ኩሺያ ሜጩቶኮና» ያጊዲ አይቺዶሶና።

3 ዮሱሲ ዛሪዲ፥ «ሂንቱ፥ ሂንቱ ዎጋ ጊሾ ያሳ ኪታ ፖሌይሳ አይስ ኢዳቲ? 4 አይስ ጊኮ፥ ያሳይ፥ «ኔ አዋኔ ኔ አዬው ቦንቻ። ኢ ባ አዋ ዎይኮ ባ አዬው ጫዬይሲ ሃይቆ ጊቤኔ?» ያጊስ።

5 ሺን ሂንቱ፥ ኢሲ አሲ ባ አዋ ዎይኮ ባ አዬው ማዳናባይ ዴዲሺን፥ «ሃይሳ ታ ያሳስ ያርሻስ ጊኮ፥ 6 ባ አዋ ዎይኮ ባ አዬው ቦንቻናው ቤሴና» ያጊታ። ያቲዲ ሂንቱ፥ ሂንቱ ዎጋ ፖላናው ያሳ ቃላ ሜንሴታ። 7 ሂንቱኖ፥ ጩቦቶ፥ ኢሳያሲ ሂንቱባ ሊኬ አዲስ፥

8 «ሃ አሳይ ታና ባንታ ዶናን ቦንቹስ፥

ሺን ኤንታ ዎዛናይ ታፔ ሃሆን ዴዔስ።

9 አሳይ ታና ጮ ጎይኖሶና፤

ኤንቲ አሲ ሜዲዳ ኪታ

ያሳ ሂጌ ዳኒሲዲ ታማርሶሶና ጊስ» ያጊስ።

አሴ ቱኒሲያባታ

(ማር 7:14-23)

10 ዮሱሲ ዳር አሳ ባኮ ዩጊዲ፥ «ሲዲቱ! አኬኪቱ! 11 አሴ ቱኒሲያባይ ዶናራ ጌሊያባ ጊዶናሺን ዶናፔ ኬያባ» ያጊስ።

12 ሄሳፌ ጉዮ፥ ዮሱሳ ታማሬቲ ኢያኮ ዬዲ፥ «ፋሪሳዌቲ ኔኔ ጊዳይሳ ሲዲዲ ዳቤቲዳይሳ አኬካይ?» ያጊዶሶና።

13 ሺን ዮሱሲ ኤንታው ዛሪዲ፥ «ሳሉዋን ደዲያ ታ አዋይ ቶኪቦና ሚሳይ ኡባይ ሾዴታና፥ 14 ኤንታባ ሂርጎሬቱ፤ ኤንቲ ቆቄ ካሌሲያ ቆቄታ፥ ቆቄይ ቆቄ ካሌሲኮ፥ ናምዓይካ አላን ኩንዳና» ያጊስ።

15 ጴጊሮሲ ዛሪዲ፥ «ሃ ሌሚሱዋ ቢርሼላ ኑስ አዳርኪ» ያጊስ።

16 ዮሱሲ ኤንታኮ፥ «ሂንቱወካ ሃዲ ጋካናው ጌሊቤኔ? 17 ደናራ ጌሊያባ ኡባይ ኡሎ ጌሊዲ ካሬ ኬዩይሳ ኤሬኬቲ? 18 ሺን ደናራ ኬያባይ ዎዛናፕ ኬዩስ፥ አሴ ቱኒሲያባቲ ሄሳታ፥ 19 ኤንቲካ አሳ ዎዛና ጊዶሬ ኬያ ኢታ ቆፋ፥ ዎጶ፥ ላይማቴሊ፥ ኢታ አሶ፥ ካይሶ፥ ዎርዶ ማርካቴሊ፥ ጫሽ፥ 20 ሄሳ ዳኒያባቲ አሴ ቱኒሴሲፕ አቲን ሜጩቶና ኩሼራ ሜይሲ ቱኒሴና» ያጊስ።

ኢሲ ማጫሴ አማኑዋ

(ማር 7: 24-30)

21 ሄሳሬ ጉዩ፥ ዮሱሲ ያፕ ኬዩዲ ጊሮሳኔ ሲዶና ካታማቲ ደዲያ ቢታ ቢስ፥ 22 ኢሲ ካናኔ ቢታ ማጫስ ዮሱሳኮ ያዳ፥ ባ ቃላ ጶቁ አሳዳ፥ «ጎዳው፥ ዳዊቱ ናዓው፥ ታው ቃጴታርኪ፤ ታ ናዒው ቱና አያናይ አይኪዲ ኢታ ዋይሴስ» ያጋሱ።

23 ሺን ዮሱሲ ኢሲ ቃላካ ዛርና ሲዲ ጊስ፥ ዮሱሳ ታማሬቲ ኢያኮ ዩዲ፥ «ሃ ማጫሲያ ኑ ጊዶ ካላ ካላዳ፥ ዎሳዉሱ፥ ሄሳ ጊሾ፥ ኔኒ ኢዮ ዋይዛርኪ» ያጊዲ ዎሲዶሶና።

24 ዮሱሲ ዛሪዲ፥ «ታኒ ዉዴፕ ዳዩዳ ዶርሳዳ ኢስራዔል ኬሳፌ ዳዩዳ አሳታ ዓላላስ ኪቴታስ» ያጊስ።

25 ሺን ኢያ፥ ኢያ ሲንሳን ኩንዳዳ፥ «ጎዳው፥ ታና ማዳርኪ?» ያጋሱ።

26 ኢ ዛሪዲ፥ «ናይታ ካሊ ኤኪዲ ካናታስ ዩጌይሲ ሎዎ ጊዴና» ያጊስ።

27 ማጫሲያካ፥ «ጎዳው፥ ሄሲ ቱማ፥ ሺን ሃሪ አቶሺን ካናቲ ባንታ ጎዳቲ ሚሺን፥ ጋይታፕ ዎጲያ ቲሬያ ሞሶና» ያጋሱ።

28 ዮሱሲ ዛሪዲ፥ «ሃ ማጫሴቴ፥ ኔ አማናይ ጊታ፤ ኔ ኮዩዳይሳዳ ኔው ሃኖ» ያጊስ። ኢ ናዲያ ኢራካ ፓዓ አጋሱ።

ዮሱሲ ዳሮ ሃርጋንቾታ ፓሊስ

29 ዮሱሲ ያፕ ዴንዲዲ ጋሊላ አባ ማቲ ቢስ፥ ኢሲ ዴሬ ቦላ ኬዩዲ፥ ያን ኡቲስ፥ 30 ዳሮ አሳይ ባንታራ፥ ዎቤታ፥ ቆቄታ፥ ኩናታ፥ ዶና ሙሜታኔ፥ ሃራ ዳሮ ሃርጋንቾታ ኤኪዲ፥ ኢያኮ ኤሂዲ ኢያ ሲንሳን ዎሲዶሶና፥ ዮሱሲ ኤንታና ፓሊስ።

31 ሄሳ ጊሾ፥ ሙሜቲ አዴቲሺን፥ ኩናቲ ፒዲ ጊሺን፥ ዎቤቲ

ሃሙተኛን፣ ቆቁቲ ያሊሺን አሳይ ቤዒዲ ማላሌቲዳ፣ ኢስራዬሌ ያሳ ጋላቲዶሶና።

ዮሱሲ አይዱ ሙኩሉ አሳ ሙዚስ
(ማር 8:1-10)

32 ዮሱሲ ባ ታማሬታ ባኮ ያጊዲ፣ «ሃ ዳሮ አሳይ ታራ ሄዡ ጋላስ ጋምዒዳ ጊሾኔ ኤንታው ሃዒ ሚያባይ ባይና ጊሾ ታኔ ኤንታው ቃዴታይስ። ኤንቲ አጌን ዳቡሪዲ ኩንዶና ሜላ አይኮ ሙዘና ኤንታ ሜላ ዮዳናው ኮዩኬ» ያጊስ።

33 ኢያ ታማሬቲ ዛሪዲ፣ «ኮኒ ሃ ባዙዋን ሃይሳ ኬና አሳስ ጊዲያ ካሲ አዉፔ ዴማኔ?» ያጊዶሶና።

34 ዮሱሲ ኤንታኮ፣ «ሂንቴው አፑን ኡይሲ ዴዒ?» ያጊዲ አይቺስ።

ኤንቲ ዛሪዲ፣ «ላፑን ኡይሲኔ ላፋ ሞሎታፔ ጉሲ ዴዔስ» ያጊዶሶና።

35 ዮሱሲ ዴሪያ ሳግን ኡቲቲ ያጊዲ ኪቲስ። 36 ሄሳፌ ጉዬ፣ ሄ ላፑን ኡይሳኔ ሞሎዋ ኤኪዲ ያሳ ጋላቲስ። ሜንሲዲ ባ ታማሬታስ ኢሚስ። ኢያ ታማሬቲ አሳስ ጊሺዶሶና።

37 አሳይ ኡባይ ሚዲ ካሊዶሶና። ኢያ ታማሬቲ፣ ሚሺን አቲዳ ቲሬያ ላፑን ጊታ ጋይታ ኩሜሲ ዴንሲዶሶና። 38 ሚዳ አሳይ ማጫሲኔ ናዓ ፓይዶና አዴ ፃላሊ አይዱ ሙኩሉ። 39 ዮሱሲ ዴሪያ ዮዲዳፔ ጉዬ ዎጎሉዋን ጊሊዲ ማጌዶና ጊያ ቢታ ቢስ።

16

ሳሎፔ ማላ ቤዳናው አይቺዳ አይሻ
(ማር 8:11-13፤ ሉቃ 12:54-56)

1 ፋሪሳዌቲኔ ሳዱቃዌቲ ዮሱሳኮ ዩዶሶና። ኢያ ፓጫናው ኮዩዲ፣ ባንታና ሳሎፔ ማላታ ቤሶ ጊዲ አይቺዶሶና። 2 ሺን ኢ ኤንታኮ፣ «ሳዒ አማርሲያ ዎዴ ሳሎይ ዞዒዳ ጊሾ ዎንቶ በቃሳና» ያጌታ። 3 ዎንቲያ ዎዴ፣ ሳሎይ ዞዒዲ ሻራቲዳ ጊሾ ኢራይ ቡካና» ያጌታ። ያቲን ሂንቴ ሳሎ ማላ ቤዒዲ ኤሬታ፣ ሺን ዎዲያ ማላ ኤሬናው ዳንዳዒቤኬታ። 4 ኢታኔ አማኖና ዮሌቴሳይ ማላታ ኮዩስ። ሺን ኢያው ዮናሳ ማላታፔ ሃራ ማላቲ ኢሜቴና» ያጊስ። ሄሳፌ ጉዬ፣ ኤንታና ያን አጊዲ ሃራ ሶ ቢስ።

ፋሪሳዌታኔ ሳዱቃዌታ ኢርሹዋ
(ማር 8:14-21)

5 ኤንቲ አባፌ ሄሬንሲ ፒኒዳ ዎዴ ዳቦ ኤኪዲ ያናይሳ ዶጊዶሶና። 6 ዩሱሲ ኤንታኮ፣ «ፋሪሳዊታፔኔ ሳዱቃዊታ ኢርሹዋፌ ናጌቲቱ» ያጊስ። 7 ኤንቲካ ባንታ ጋርሳን፣ «ኢ ሄሳ ጊዳይ ኑ ዳቦ ኤኪዲ ዮና ጊሾሳ ጊዳና» ያጊዶሶና። 8 ዩሱስ ኤንታ ቆፋ ኤሪዲ፣ «ሂንቴኖ፣ አማኖይ ፓጩዳይሳቶ! ዳቦ ኤኮና ዩዳ ጊሾ ዎሊ ጊዶን አይስ አዴቱቲ? 9 ሃዲካ ሂንቴ አኬኬቲ? ኢቻሹ ሙኩሉ አሳስ ኢቻሹ ኡይሳ ጊሹዳይሳኔ ኤንቲ ሚዲ ካሊን ሂንቴ አፑን ጋይታ ኩሜሲ ዴንሲዳኮ ዶጊዴቲ? 10 ሄሳዳካ፣ ሳፑን ኡይሳ አይዱ ሙኩሉ አሳስ ጊሹዳይሳኔ ኤንቲ ሚዲ ካሊን፣ ሂንቴ አፑን ጊታ ጋይታ ኩሜሲ ዴንሲዳኮ አኬኬኬቲ? 11 ሂዛ፣ ታኒ ፋሪሳዊታኔ ሳዱቃዊታ ኢርሹዋፌ ናጌቲቱ ጋዳ አዴይሲ ዳቦባ ጊዶናይሳ አኬኬኬቲ?» ያጊስ። 12 ያቲን፣ ኢያ ታማሬቲ ዩሱሲ አዴይ ሙኑቃ ዴንሳናው ዩጌቲያ ኢርሾባ ጊዶናሺን ፋሪሳዊታኔ ሳዱቃዊታ ቲሚርቲያፌ ናጌታናይሳ ጊዴይሳ አኬኪዶሶና።

ጲዲሮሲ ዩሱሳባ አዲስ
(ማር 8: 27-30፤ ሉቃ 9: 18-21)

13 ዩሱሲ ቁሳሪያ ፊልጶሳ ቢታ ጋኪዳ ዎዴ ባ ታማሬታኮ፣ «አሳይ፣ አሳ ናዓ እና ጎና?» ያጊዲ አይቺስ።

14 ኤንቲካ፣ «ኢሶቲ ኢሶቲ ፃማቂያ ዮሃንሳ፣ ሃራቲ ኤሊያሳ ቃሲ ሃንኮቲ ኤርሚያሳ ዎይኮ ናቤታፔ ኢሱዋ ጎሶና» ያጊዶሶና።

15 ዩሱሲ ዛሪዲ፣ «ያቲን፣ ሂንቴ ታና እና ጌቲ» ጊዲ ኤንታ አይቺስ።

16 ሲሞና ጲዲሮሲ ዛሪዲ፣ «ኔኒ ኪሪስቶሳ፣ ዴዎ ዎሳ ናዓ» ያጊስ።

17 ዩሱሲ ጲዲሮሳኮ፣ «ዮና ናዓ ሲሞና፣ ኔኒ አንጄቲዳይሳ! ሃይሳ ኔው ቆንጨሲዳይ ሳሉዋን ዴዲያ ታ አዋፔ አቲን አሴ ጊዴና። 18 ታ ኔው አዳይስ ጲዲሮሳ፣ ኔኒ ዛሳ! ታኒ ሃ ዛሳ ቦላ ታ ዎሳ ኬሳ ኬፃና። ሃይቆ ዎልቃቲካ ኢዮ ዎኮኮና። 19 ሳሎ ካዎቴሳ ቁልፔታ ታ ኔው ኢማና፣ ሳዓን ኔኒ ዲጊያባይ ኡባይ ሳሎን ዎሳ ማታን ዲጌቲዳባ ጊዳና። ሳዓን ኔኒ ሃኖ ጊያባይ ኡባይ ሳሎን ዎሳ ማታን ሃኒዳባ ጊዳና» ያጊስ።

20 ሄሳፌ ጉዩ፣ ኢ፣ ኪሪስቶሳ ጊዴይሳ አዴስካ አዶና ሜላ ባ ታማሬታ ሚንሲዲ ኪቲስ።

ዩሱሲ ባና ጋካና ዋያ አዲስ

16:6 ሉቃ 12:1 16:9 ማቶ 14:17 16:10 ማቶ 15:34 16:14 ማቶ 14:1 16:16 ዮሃ 6:68 16:19 ማቶ 18:18፤ ዮሃ 20:23

21 ሄ ዎዲያ፤ ዶሚዲ ዮሱሲ ባ ታማሬታስ፤ «ታኒ ዮሩሳላሜ ባናው ቤሴስ፤ ያን ዴሪያ ጨማታን፤ ካሂኔ ሃላቃታኔ ሂጌ አስታማሬታ ኩሼን ዋዬ ኤካናው ቤሴስ፤ ኤንቲ ታና ዎዳና፤ ሺን ታኒ ሄቫንሶ ጋላስ ሃይቆ፤ ዴንዳና» ያጊዲ ቆንጨሲስ።

22 ጴጊሮሲ ዮሱሳ ጋፃ ኬሲዲ፤ «ጎዳው፤ ሄሲ ሃኔና! ሄሳ ሜላባይ ኔና ኡባራካ ጋኮሬ!» ያጊዲ ሃንቁቲስ።

23 ዮሱሲ ጴጊሮሳኮ ጉዮ ሲሚዲ፤ «ሃ ሃላሂያው፤ ታ፤ ሃካ! ኔኒ አሳ ቆፋ ቆፓሳ፤ አቲን ያሳ ቆፋ ቆፓና ጊሾ ታው ዱቤ ጊዳሳ» ያጊስ።

24 ሄሳፌ ጉዮ፤ ዮሱሲ ባ ታማሬታኮ፤ «አኒካ ታና ካላናው ኮያባ ጊዲኮ ባና ካዶ፤ ባ ማስቃሊያ ቶኪዲ ታና ካሎ። 25 ባ ዴዑዋ አሻናው ኮያ ኡባይ ዳይሴስ። ሺን ባ ዴዑዋ ታ ጊሾ ጊዲ አሲ ኢሜይሲ አሼስ። 26 አሲ አላሜ ኩሜሳ ባባ አሲዲ፤ ጊዶሺን ባ ሼምፑዋ ዳይሲኮ ኢያ አይ ማዲ? ዎይኮ አሲ ባ ሼምፑዋ ላሜ አይ ኢማናው ዳንዳዲ? 27 አሳ ናዓይ ባ አዋ ቦንቹዋን ባ ኪታንቾታራ ያና። ሄ ዎዴ ኢሲ ኢሲ ኡራስ ኢያ አሱዋዳ ኢማና። 28 ታ ቱማ አዳይስ፤ አሳ ናዓይ ካዎ ጊዲዲ ሲሜይሳ ቤዓና ጋካናው ሃይሳን ኤቂዳ አሳ፤ ሃይቆናይሳቲ ዴዎሶና» ያጊስ።

17

ዮሱሳ ማላይ ላሜቲስ (ማር 9:2-13፤ ሉቃ 9:28-36)

1 ኡሱፑን ጋላሳ፤ ጉዮ ዮሱሲ፤ ጴጊሮሳ፤ ያይቆባኔ ኢያ ኢሻ ዮሃኒሳ ባራ ኤኪዲ ባንታርካ ጊዳናው ዴሪያ ቦሳ ኬዬስ። 2 ያን ኤንታ ሲንሳን ዮሱሳ ማላይ ኩሜሲ ላሜቲስ፤ ኢያ ሶምዎይካ አዋዳ ያልቁስ። ኢያ ማዎይካ ዳሮ ቦጊስ። 3 ሄኮ፤ ሙሴይኔ ኤሊያሲ ኢያራ አዴቲሺን ቤዲዶሶና። 4 ጴጊሮሲ ዮሱሳኮ፤ «ኑኒ ሃይሳ ሃሹ ዩዳ፤ ኔ ኮይኮ ኢሲኖ ኔው፤ ኢሲኖ ሙሴስ፤ ኢሲኖ ኤሊያሳስ ሃይሳን ሄቭ ሻቃራ ሻቃራና» ያጊስ። 5 ጴጊሮሲ ሄሳ ቡሮ አዲሺን ቦሳ ሻራይ ኤንታና ካሚስ። ሻራ ጊዶራ፤ «ታና ኡፋይሲያ፤ ታ ዶሲያ ናዓይ ሃይሳ፤ ኢያ ሲዲቱ!» ያጊያ ቃላይ ዩስ። 6 ዮሱሳ ታማሬቲ ሄሳ ሲዲዳ ዎዴ ዳጋሚዲ ባንታ ሶምዑዋራ ሳንን ኩንዲዶሶና። 7 ሺን ዮሱሲ ኤንታኮ ሺቂዲ ኤንታ

16:24 ግብግ 10:38፤ ሉቃ 14:27 16:25 ግብግ 10:39፤ ሉቃ 17:33፤ ዮሃ 12:25 16:27 ግብግ 25:31፤ ግዝ 62:12፤ ሮሜ 2:6 17:1 2ጴጊ 1:17-18
17:5 ሚዴ 22:2፤ ግዝ 2:7፤ ኢሳ 42:1፤ ግብግ 3:17፤ 12:18፤ ግር 1:11፤ ሉቃ 3:22፤ ዛሬ 18:15

ቦቸዲ፥ «ዴንዲቴ፥ ያዮፊቴ!» ያጊስ።⁸ ኤንቲ ጵቁ ጊዲ ቤዒያ ዎዴ ዮሱሳፔ ሃራ ኦናካ ቤዒቦኮና።

⁹ ኤንቲ ዴሪያፔ ዎዲሺን ዮሱሲ ኤንታኮ፥ «አሳ ናዓይ ሃይቆፔ ዴንዳና ጋካናው ሃ ሂንቴ ቤዒዳባ አዴስካ አዶፒቴ» ጊዲ ኪቲስ።¹⁰ ዮሱሳ ታማሬቲ፥ «ያቲን፥ ሂጌ አስታማሬቲ ኤሊያሲ ኪሪስቶሳፔ ካሴቲዲ ያና ጊዳይ አይቢሴ?» ያጊዲ አይቺዶሶና።

¹¹ ዮሱሲ ዛሪዲ፥ «ኤ! ኤሊያሲ ካሴቲ ዩዲ ኡባባ ጊጊሳና።
¹² ሺን ታ ሂንቴው ቱማ አዳይስ፤ ኤሊያሲ ካሴቲዲ ዩስ፥ ኤንቲካ ኢያ ቦላ ኮዩዳባ አሲዶሶናፔ አቲን ኢያ ሻኪ ኤሪቦኮና። ሄሳዳ አሳ ናዓይ ኤንታ ኩሺን ዋዩታና» ያጊስ።

¹³ ሄ ዎዴ ዮሱሲ ጊዳይ ማቂያ ዮሃንሳባ ጊዴይሳ አኬኪዶሶና።

ዮሱሲ ቱና አያናይ አይኪዳ ናዓ ፓሲስ
(ማር 9:14-29፤ ሉቃ 9:37-43)

¹⁴ ኤንቲ ዴሪያፔ አሳኮ ሲሚያ ዎዴ ኢሲ አሲ ዮሱሳ ሲንሳን ጉልባቲዲ፥¹⁵ «ጎዳው፥ ሃያና ታ ናዓስ ቃዴታርኪ፤ ኢያ ሾጩዲ ዩጊያ ሃርጌይ ዳሮ ኡንዔሲዲ ታማኒኔ ሃሳን ዩጌስ።¹⁶ ኔ ታማሬታኮ ኤሃስ፥ ሺን ኤንቲ ፓሳናው ዳንዳዒቦኮና» ያጊስ።

¹⁷ ዮሱሲ ዛሪዲ፥ «ሂንቴኖ፥ አማኖና ጌላ ዮሌቴሳው አዉዴ ጋካናው ታ ሂንቴራ ዳኔ? አዉዴ ጋካናው ታ ሂንቴና ዳንዳዓኔ? አኔ ናዓ ሃ ኤኪ ዩቴ» ያጊስ።¹⁸ ዮሱሲ ቱና አያና ሃንቂን፥ ቱና አያናይ ናዓፔ ኪዩስ፤ ሄ ሳቴንካ ናዓይ ፓዲስ።¹⁹ ሄሳፌ ጉዮ፥ ዮሱሳ ታማሬቲ ባንታርካ ኢያኮ ሺቂዲ፥ «ኦኒ ቱና አያና ኪሳናው ዳንዳዒቦናይ አይቢሴ?» ያጊዲ አይቺዶሶና።²⁰ ኢ ኤንታኮ፥ «ሂንቴው አማኖይ ላፊዳ ጊሾሳ፥ ታ ሂንቴው ቱማ አዳይስ፤ ጋሼ አይፌ ሜላ አማኖይ ሂንቴው ዴዒኮ (ሃ ዴሪያ ሃይሳፌ ዴንዳዳ ጌዴ አዳ) ጊኮ ሂንቴው ኪቴታና፥ ሂንቴው ዳንዳዔቶናባይ ዴና።
²¹ [ሺን ሄሳ ሜላይ ዎሳፔኔ ምግፔ አቲን ሃራን ኪዮና]» ያጊስ።

*

ዮሱሲ ባ ሃይቁዋባ ዛሪ አዲስ
(ማር 9:30-32፤ ሉቃ 9:43-45)

²² ዮሱሳ ታማሬቲ ጋሊላን ሺቂዲ ዴዒሺን ዮሱሲ ኤንታኮ፥ «አሳ ናዓይ አሳ ኩሺን አዲዲ ኢሜታና።²³ ኤንቲ ኢያ ዎዳና፥ ሺን ኢ ሄቫንሶ ጋላስ ሃይቆፔ ዴንዳና» ያጊስ።
ኢያ ታማሬቲካ ዳሮ ቂሮቲዶሶና።

17:10 ሚል 4:5 17:12 ግጥ 11:14 17:21 ግጥ 21:21፤ ማር 11:23፤
1ቆሮ 13:2 * 17:21 ኢሲ ኢሲ ቤኒ ማጎፋታን ፓይዶ 21 ዴና።

ያሳ ኬሳ ጊራ

²⁴ ዮሱሳራኔ ኢያ ታማራታራ ቁፊርናሆሜ ካታማ ጋኪዳ ዎዴ ያሳ ኬሳ ጊራ ቃንጊሴይሳቲ ጳጊሮሳኮ ዩዲ፥ «ሂንቴ አስታማራይ ያሳ ኬሳ ጊራ ጊሪ?» ያጊዲ አይቺዶሶና።

²⁵ ጳጊሮሲ ዛሪዲ፥ «ጊሬስ» ያጊስ። ጳጊሮሲ ሶ ጌሊያ ዎዴ ዮሱሲ ካሴቲዲ፥ «ጳጊሮሳ፥ ኔው አይ ዳኒ? ሃ ሳዓ ካዎቴሳቲ ቃራፃኔ ጊራ አፔ ኤኮና? ጋዴ አሳፔዮ ዎይኮ አሳ ጋዴ አሳፔ?» † ያጊዲ አይቺስ።

²⁶ ጳጊሮሲ «አሳ ጋዴ አሳፔ» ጊዲ ዛሪስ። ዮሱሲ ዛሪዲ፥ «ጋዴ አሳይ ጊራ ጊሮኮና ጉሱ። ²⁷ ሺን ኤንቲ ዱቤቶና ሚላ አባ ባዳ ሞሉዋ አይኪያ ማንፃቆ ዮጋ። ኮይሮ ኔ አይኪያ ሞሉዋ ዶና ዶያዳ ጊራስ ጊዲያ ሚሺያ ኔ ጊሾኔ ታ ጊሾ ኤፋዳ ጊራ» ያጊስ።

18

ኡባፌ አዴይ አኔ?

(ማር 9:33-37፤ ሉቃ 9:46-48)

¹ ሄ ዎዴ ዮሱሳ ታማራቲ ዩዲ፥ «ሳሎ ካዎቴሳን ኡባፌ አዴይ አኔ?» ያጊዲ አይቺዶሶና። ² ዮሱሲ ኢሲ ጉሳ ናዓ ጌጊዲ ኤንታ ጊዶን ኤሲዲ ሃይሳዳ ያጊስ። ³ «ታኒ ሂንቴው ቴማ አዳይስ፤ ሂንቴ ላሜቶናኔ ጉሳ ናይታዳ ሃኖና ኢጊኮ ሳሎ ካዎቴሳ ኡባሬካ ጌላናው ዳንዳጌታ። ⁴ ሂዛ፥ ሃ ጉሳ ናዓዳ ባና ካዉሺያ አኒካ ሳሎ ካዎቴሳን ኡባፌ አዴይሳ ጊዳና። ⁵ ሃይሳ ሚላ ናዓ ታ ሱንሳን ሞኪያ አኒካ ታና ሞኪስ።

⁶ «ሺን ታናን አማኒያ ሃ ጉሳታፔ ኢሱዋ ናጋራ አሳና ሚላ ዱቤ ጊዲያ አኒካ ጊታ ጋቻ ዎፃ ባ ቆዴን ቃቺዲ ጨሞ አባን ሚቴቲኮ ኢያው ሎዎ። ⁷ አላሚን አሳይ ናጋራ አሳና ሚላ አሲያባቲ ዴዒያ ጊሾ አላሚያ አዩ። ሄሳ ሚላባቲ ዮና አቴና፥ ሺን ዱቤይ ኢያ ጋሶን ያ ኡራ አዩ።

⁸ «ኔ ኩሼይ ዎይኮ ኔ ቶሆይ ኔና ባሌሲኮ ኔፔ ቃንፃ ዮጋ። ኔኒ ናምዑ ኩሼራ ዎይኮ ናምዑ ቶሆራ ሜሪና ታማን ዩጌታናይሳፌ ኩሼ ዎይኮ ቶሆ ዱፃ ጊዳዳ ሜሪና ዴዎ ዴሜይሲ ኔው ሎዎ። ⁹ ቃሲ ኔ አይፌይ ኔና ባሌሲኮ ኢዮ ዎጫ ኬሳዳ ዎራ ሆላ። ኔኒ

17:24 ኬሳ 30:13 † 17:25 ጋዴ አሳፔዮ ዎይኮ አሳ ጋዴ አሳፔ? ሄ ዎዴ ካዎቴሳቲ ባንታ ጋዴ አሳፔ ጊራ ኤኮኮና። 18:1 ሉቃ 22:24 18:3 ማር 10:15፤ ሉቃ 18:17 18:8 ግጥ 5:30

ናምዑ አይፈራ ጋናሜ ታማን ዩጌቴይሳፌ ኢሲ አይፈራ ሜሪና ደዑዋ ጌሌይሲ ኔው ሎዎ።

10 «ታ ሂንቴው አዳይስ፤ ሳሎን ደዒያ ኤንታ ናጊያ ኪታንቾቲ ኡባ ዎዴ ሳሎን ደዒያ ታ አዋ ሲንሳን ደዒያ ጊሾ ሂንቴ ሃ ጉሳታፔ ኢሱዋካ ካዶና ሜላ ናጌቲቴ። 11 አሳ ናዓይ ዳይዳይሳታ አሻናው ዩስ» * ያጊስ።

ዳዩዳ ዶርሳ ሌሚሶ
(ሉቃ 15:3-7)

12 ቃሲ ዩሱሲ፥ «ሂንቴው አይ ዳኒ? ኢሲ ኡራስ ዌቱ ዶርሳቲ ደዳይሳታፔ ኢሶይ ዳዩኮ ኡዱፉን ታማኔ ኡዱፉናታ ደሪያ ቦላ ዩጊ አጊዲ ሄ ዳዩዳይሳ ኮያናው ቤኔ? 13 ታ ቴማ አዳይስ፤ ኢ ደሚዳ ዎዴ ኡዱፉን ታማኔ ኡዱፉናታፔ አሲዲ ዳዩዲ ቤንቲዳ ኢሲ ዶርሳን ኡፋይቴስ። 14 ሄሳዳካ፥ ሳሎን ደዒያ ሂንቴ አዋይ ሃ ጉሳታፔ ኢሶይ ዳያና ሜላ ኮዩና።

ቆሂዳ አሲ ዋታኔ?

15 «ኔ ኢሻይ ኔና ቆሂኮ ኔርካ ኢያኮ ባዳ ኢያ ባላ ኢያው አዳ። ኢ ኔና ሲዒኮ ኔ ኢሻ ኔው ኢሻ አላ። 16 ሺን ኢ ኔና ሲያና ኢዒኮ፥ ናምዑ ዎይኮ ሄኹ አሳ ማርካን ሞቶይ ላሴቲያ ጊሾ ኢሲ ዎይኮ ናምዑ አሲ ኤካዳ ኢያኮ ባ። 17 ኢ ኤንታና ሲያና ኢዒኮ፥ ዎሳ ኬሳስ አዳ። ዎሳ ኬሲ ጊያባ ሲያና ኢዒኮ አማኖና አሳዳ ዎይኮ ቃራፃ ቃንዒሲያ አሳዳ ኢያ ስይያ።

18 «ታ ሂንቴው ቴማ አዳይስ፤ ሳዓን ሂንቴ ዲጊያባቲ ኡባይ ሳሎን ዎሳ ማታን ዲጌቲዳባ ጊዳና። ሳዓን ሂንቴ ሃኖ ጊያባቲ ኡባይ ሳሎን ዎሳ ማታን ሃኒዳባ ጊዳና።

19 «ቃሲካ ታ ሂንቴው አዳይስ፤ ሳዓን ሂንቴፌ ናምዓይ ባንታ ዎሲያባስ ኢሲ ዎዛናን ጊዲዲ ዎሳ ዎሲያባ ጊዲኮ ሳሎን ደዒያ ታ አዋይ ሂንቴው አላና። 20 ታና ካሌይሳታፔ ናምዓ ዎይኮ ሄኻ ጊዲዲ ሺቂያ ቤሳን ታኒ ኤንታ ጊዶን ቤንታና» ያጊስ።

አቶ ጉሳባ

21 ሄ ዎዴ ጴዒሮሲ ዩሱሳኮ ዩዲ፥ «ጎዳው፥ ታ ኢሻይ ታና ቆሂኮ አፑን ቶሆ ታኒ አቶ ጋናው ቤሲ? ላፑን ቶሆ ጋካናሴዩ?» ጊዲ አይቺስ።

18:9 ግጥ 5:29 18:10 ሉቃ 19:10 * 18:11 አሳ ናዓይ ዳይዳይሳታ አሻናው ዩስ፡ ኢሲ ኢሲ ቤኒ ማፃፋቲ ፓይዶ 11 ጉጆሶና። 18:15 ሉቃ 17:3 18:16 ዛሬ 19:15 18:18 ግጥ 16:19፤ ዮሃ 20:23 18:21 ሉቃ 17:3-4

22 ዮሱሲ ዛሪዲ፥ «ጊዴና፥ ላፑን ታሙ ቶሆ ላፑናፕ ኣቲን ላፑን ቶሆ ጊዴና።

23 «ሄሳ ጊሾ፥ ያሳ ካዎቴሳይ ባ ኣሳንቾታራ ባ ሚሼይ ፓጩዳኮኔ ፓላሂዳኮ ቤዓናው ቆፒዳ ካዉዎ ዳኔስ። 24 ሄ ካዎይ ሚሼይ ፓጩዳኮኔ ፓላሂዳኮ ቤዒያ ዎዴ ዳሮ ጊንዲጊንዳ ኣጮይ ዴዒያ ኢሲ ኡራ ኢያኮ ኤሂዶሶና። 25 ሺን ሄ ኣይሌይ ኣጩዎ ቃንፃናው ያኔቲን ኢያራ፥ ኢያ ማቼራ፥ ኢያ ናይቲኔ ኢያው ዴዒያባይ ኡባይ ባይዜቲዲ ኣጮይ ጩጌታና ሜላ ኢያ ጎዳይ ኪቲስ። 26 ያቲን ኣይሌይ ባ ጎዳ ቶሆዎ ቦላ ጉልባቲዲ፥ (ታ ጎዳው፥ ሃያና ጉሳ ዎዴ ታካርኪ፥ ታ ኣጩዎ ኡባ ታ ጩጋና) ያጊዲ ዎሲስ። 27 ካዎይ ኢያው ቃዴቲዲ፥ ዮዲ ኣጊስ፤ ኢያ ኣጩዎ ማሪስ።

28 «ሺን ሄ ኣይሌይ ኪዩ ቢዲ ባ ላጌ ኣሳንቾታፕ ኢሶይ ባፕ ዳሮ ጉሳ ሚሼ ታልዒዳይሳ፥ (ኔ ቦላ ዴዒያ ታ ሚሺያ ታው ጩጋ) ጊዲ ቆዴ ኣይኪስ።

29 «ሄ ኢያ ላጌ ኣይሌይ ኢያ ሲንሳን ጉልባቲዲ፥ (ሃያና ጉሳ ዎዴ ታካርኪ ታኒ ታ ኣጩዎ ኡባ ጩጋና) ያጊዲ ዎሲስ።

30 «ሺን ኢዲዲ ኤኪ ኤፊዲ ባ ላጌይ ኣጩዎ ቃንፃና ጋካናው ቃሾ ኬሌ ጌልሲስ። 31 ሄሳ ጊሾ፥ ሃራ ላጌ ኣሳንቾቲ ሄሳ ቤዒዳ ዎዴ ዳሮ ዩሎቲዲ፥ ቢዲ ባንታ ጎዳስ ኢ ኦሲዳባ ኡባ ኦዲዶሶና።

32 «ያቲን ካዎይ ሄ ኣይሊያ ያጊሲዲ፥ (ሃ ኢታ ኣይሊያው፥ ኔኒ ታና ዎሲዳ ጊሾ ታ ኔ ኣጩዎ ኡባ ኔው ማራስ። 33 ያቲን፥ ታኒ ኔ ኣጩዎ ማሪዳይሳዳ ኔኒ ኔ ላጌ ኣይሊያ ኣጩዎ ማራናው ኔው ቤሴኔ?) ያጊስ። 34 ሄሳ ጊሾ፥ ካዎይ ዳሮ ዩሎቲዲ፥ ኢ ባ ኣጩዎ ኡባ ጩጋና ጋካናው ፓፃ ካዲታና ሜላ ቃሾ ኬሳን ዮጊስ።

35 «ሄሳዳካ፥ ሂንቴ ኢሶይ ኢሶይ ሂንቴ ኢሻ ዎዛናፕ ማሮና ኢዲኮ ሳሎን ዴዒያ ታ ኣዎይ ሂንቴና ሄሳዳ ኦሳና» ያጊስ።

19

ኤኮ ጌሎባ (ማር 10:1-12)

1 ዮሱሲ ሄሳ ኦዲ ኦንጊዳፕ ጉዩ ጋሊሳፕ ዴንዲዲ ዮርዳኖሴ ሻፋፕ ሄፊንሳን ዴዒያ ዩሁዳ ቢታ ቢስ። 2 ዳሮ ኣሳይ ኢያ ካሊዲ ቤን ኤንታ ጊዶፊ ሃርጋንቾታ ፓሲስ።

3 ፋሪሳዌቲ ኢያ ፓጫናው ኮዩዲ ኢያኮ ዩዲ፥ «ኢሲ ኣሲ ኣይ ጋሶንካ ባ ማቺው ዮዳናው ቤሲ?» ያጊዲ ኣይቺዶሶና።

4 ዮሴፊ ዛሪዲ፥ «የሳይ ኮይሮ አዴኔ ማጫስ እሲ ሜዲዳይሳ ሂንቴ ናባቢቤኪቲ? 5 ሄሳ ጊሾ፥ ኢሲ አሲ ባ አዋኔ ባ አዩው አጊዲ ባ ማቼራ ኢሲኖ ጊዴስ፥ ናምዓይካ ኢሲ አሾ ጊዴሶና።»
 6 ሄሳ ጊሾ፥ ኤንቲ ኢሲ አሾ ጊዴሶና፤ አቲን ናምዓ ጊዴኮና። ሂዛ፥ ያሲ ቃቺዳይሳ አሲ ሻኮፎ» ያጊስ።

7 ፋሪሳዌቲ፥ «ያቲን፥ ሙሴይ ኢሲ አሲ አንጆ ዎርቃቱ ኢሚዲ ዮዳና ሜላ አይስ ኪቲዴ?» ያጊዲ አይቺዶሶና።

8 ዮሴፊ ዛሪዲ፥ «ሂንቴ፥ ሂንቴ ማቼታ ዮዳና ሜላ ሙሴይ ሂንቴና ኪቲዳይ፥ ሂንቴ ዎዛና ሚኖቴሳ ጊሾ፤ አቲን ኮይሮ፤ ሄሳ ሜላ ጊዴና። 9 ታ ሂንቴው አዳይስ፤ ባ ማቺያ ላይማቶና ዴዒሺን ዮዲዲ ሃራ ኤኪያ አኒካ ላሜስ» ያጊስ።

10 ኢያ ታማሬቲ ኢያኮ፥ «አዚናባይኔ ማቺባይ ሄሳ ሜላ ጊዲኮ ኤኮ ጌሎይ አቲኮ ሎዎ» ያጊዶሶና።

11 ዮሴፊ ዛሪዲ፥ «ሄሳ ሜላ ቲሚርቴይ ያሳይ ዳንዳዓ ኢሚዳይሳታሳፌ አቲን አሳ ኡባሳ ጊዴና። 12 ሂዛ፥ ዮሌቲሼ ሹፋ ጊዲዲ ዮሌቲዳይሳቲ ዴዎሶና፥ ቃሲ አሲ ቃራቲዳይሳቲ ዴዎሶና፥ ቃሲ ሳሎ ካዎቴሳ ጊሾ ጊዲ ባንታና ሹፋይዳይሳቲ ዴዎሶና። ሄሳ ጊሾ፥ ሃይሳ ኤካናው ዳንዳዲያ አኒካ ኤኮ» ያጊስ።

ዮሴፊ ጉሳ ናይታ አንጂስ
 (ማር 10:13-16፤ ሉቃ 18:15-17)

13 ዮሴፊ ባ ኩሺያ ጉሳ ናይታ ቦላ ዎሲዲ ኤንታው ዎሳና ሜላ ኢሲ ኢሲ አሳይ ናይታ ኢያኮ ኤሂዶሶና። ሺን ኢያ ታማሬቲ አሳ ሃንቁቲዶሶና። 14 ሺን ዮሴፊ፥ «የሳ ካዎቴሳይ ሃይሳታ ሜላሳ ጊዲያ ጊሾ ጉሳ ናይቲ ታኮ ዮይሳ ዲጎሬቲ፤ ዮ ጊቲ» ያጊስ።

15 ባ ኩሺያ ኤንታ ቦላ ዎሲዳ፤ ጉዮ ሄ ቤሳፌ አጊዲ ቢስ።

ናዓቴሳ ዱራ ኡራ
 (ማር 10:17-31፤ ሉቃ 18:18-30)

16 ኢሲ ጋላስ ኢሲ ኡራይ ዮሴሳኮ ዩዲ፥ «አስታማሪያው፥ ታኒ ሜሪና ዴዎ ዴማናው አይ ሎዎባ አሶ?» ያጊስ። 17 ዮሴፊ ኢያኮ፥ «ሎዎባ ኔ ታና አይስ አይቻይ? ኢሲ ያሳፌ አቲን ሃራ ሎዎይ ባዋ። ሺን ኔኒ ሜሪና ዴዎ-ዋ ኤካናው ኮይኮ ኪታታ ናጋ» ያጊስ።

18 ኡራይ ዛሪዲ፥ «አዉሳ ኪታታ» ያጊዲ አይቺስ።

19:4 ሜዴ 1:27፤ 5:1 19:5 ሜዴ 2:24 19:7 ሜዴ 24:1 19:9 ማቶ 5:32፤ 1ቆሮ 7:10

ዮሱሴ ዛሪዲ፥ «ዎጵፓ፥ ላይማቶፓ፥ ካይሶቶፓ፥ ዎርዶ ማርካቶፋ፥ 19 ኔ አዋኔ ኔ አዩው ቦንቻ፥ ኔ ሾሩዋ ኔ ሁዲያሶ ዶሳ» ያጊስ።

20 ሄ ናዓቴሳይ፥ «ታኒ ሃይሳታ ኡባ ናዓቴሳፌ ዶማዳ ናጋስ። ያቲን፥ ሃሪ ታው ፓጨያባይ አይቤ?» ያጊዲ አይቺስ።

21 ዮሱሴ ዛሪዲ፥ «ኔኒ ፖሎ ጊዳናው ኮይኮ ባዳ ኔው ዴዲያባ ባይዛዳ ማንቆታስ ኢማ፤ ኔኒ ሳሎን ዱሬታና፥ ያታ ሲማ ያዳ ታና ካላ» ያጊስ።

22 ሺን ሄ ናቴሳ ኡራይ ዳሮ ዱሬ ጊዲያ ጊሾ ሄሳ ሲዲዳ ዎዴ አዛኒሼ አጊዲ ቤስ። 23 ሄሳፌ ጉዬ፥ ዮሱሴ ባ ታማሬታ፥ «ታኒ ሂንቴው ቱማ አዳይስ፤ ዱሬይ ሳሎ ካዎቴሲ ጌላናይሲ ዳሮ ሜቶ። 24 ዱሬ አሲ ያሳ ካዎቴሳ ጌላናይሳፌ ጊማሌይ ማርፔ ሉሆራ አዴይሲ ካውዬስ» ያጊስ።

25 ዮሱሳ ታማሬቲ ሄሳ ሲዲዲ ማላሌቲዲ፥ «ያቲን፥ አኒ አታናው ዳንዳዲ?» ያጊዲ አይቺዶሶና።

26 ዮሱሴ ኤንታ ጫዲ ዌሊዲ፥ «ሃይሲ አሳስ ዳንዳዌቴና፥ ሺን ያሳስ ኡባይ ዳንዳዌቴስ» ያጊስ።

27 ጴጊሮሲ ዛሪዲ፥ «ኑኒ ኡባባ አጊዲ ኔና ካሊዳ፥ ያቲን፥ ኑኒ አይ ዴማኔ?» ያጊስ። 28 ዮሱሴ ኤንታኮ ሃይሳዳ ያጊስ፥ «ታኒ ሂንቴው ቱማ አዳይስ፤ አሳ ናዓይ ያና አላሚያን ባ ቦንቻ አራታን ኡቲያ ዎዴ ሂንቴ ታማኔ ናምዓቲ፥ ታና ካሊዳይሳቲ፥ ታማኔ ናምዑ አራታን ኡቲዲ ታማኔ ናምዑ ኢስራዌሌ ዜሬሳታ ቦላ ፒርዳና። 29 ታ ሱንሳ ጊሾ ኬሴ ዎይኮ ኢሻታ ዎይኮ ሚቼታ ዎይኮ አዋ ዎይኮ አዩው ዎይኮ ናይታ ዎይኮ ጋዲያ አጊዳይ አኒካ ዌቱ ኩሼ ኤካና፥ ቃሲ ሜሪና ዴዑዋካ ኤካና። 30 ሺን ዳርቲ ሃዲ ዴሳን ሲንሴ ጊዲዳይሳቲ ጉዬ ጊዳና፥ ቃሲ ጉዬ ጊዲዳይሳቲ ሲንሴ ጊዳና» ያጊስ።

20

ዎይኒያ ጊዶን አሲያ አሳንቾታ ሌሚሶ

1 «ያሳ ካዎቴሳይ ባ ዎይኒያ ጊዶን አሳንቾታ ኬራ አሲሳናው ዎንታ ጉራ ኬዬዳ ኬሳዋ ዳኔስ። 2 ኢ ሄ አሳንቾታስ ሃቺ ሃቺ ኢሲ ዲናሬ * ቃንፃናው ኤንታራ ጊጊዲ፥ ኤንታ ባ ዎይኒያ ጊዶ ዮዲስ።

19:18 ኬሳ 20:13-16፤ ዛሬ 5:17-20 19:19 ኬሳ 20:12፤ ዛሬ 5:16፤ ሌዌ 19:18 19:28 ማቶ 25:31፤ ሉቃ 22:30 19:30 ማቶ 20:16፤ ሉቃ 13:30 * 20:2 ኢሲ ዲናሬ፥ ኢሲ አሲ ኢሲ ጋላስ አላ ፕዲዲ ኤኬያ ሚሼ።

3 «ቃሲ ዎንታፊ ሄቸ ሳቴ ጊዲሺን ከዬዲ አሶ ዳዬዲ ጊያ ቦላ ኤቁዳ ሃራ አሳታ ዴሚስ። 4 ኢ ኤንታኮ፣ <ሂንቴካ ታ ዎይኒያ ጊዶ ቢዲ አሲቴ፣ ታኒ ሂንቴው ቤሲያ ጋቲያ ቃንገና> ያጊስ። 5 ኤንቴካ ቢዶሶና። ቃሲካ ኢ ኡሱፑን ሳቴኒኔ ኡዱፋን ሳቴን ከዬዲ ሄሳዳ አሲስ። 6 ታማኔ ኢሲ ሳቴ ጊዲሺን ኢ ከያ ዎዴ ሃራቲ ያን ኤቁዳይሳታ ዴሚዲ፣ <ሂንቴ አሶ አሶና ጋላስ ኩሜሲ ሃይሳን አይስ ኤቁዲ ፔዲዴቴ?> ያጊስ።

7 «ኤንቴ ዛሪዲ፣ <ኮና ኬራ አሲሲያ አሲ ዳዬዳ ጊሾሳ> ያጊዶሶና።

«ኢካ፣ <ሂንቴካ ታ ዎይኒያ ጊዶ ቢዲ አሲቴ> ያጊስ።

8 «ሳዲ አማርሲን፣ ዎይኒያ ጎዳይ አሳንቾታ ሃላቃኮ፣ <አሳንቾታ ዪጋዳ ወርሴሳን አሶ ጌሊዳይሳታፔ ዶማዳ ኮይር ጌሊዳይሳታ ጋካናው ኤንታ ጋቲያ ቃንገ> ያጊስ። 9 ታማኔ ኢሲ ሳቴን አሶ አይኪዳይሳቲ ዬዲ፣ ሁዔን ሁዔን ኢሲ ኢሲ ዲናሬ ኤኪዶሶና። 10 ኮይር አሶ አይኪዳይሳቲ ዬዲ፣ ባንታው ዳር ኢሜታና ጊዲ ቆፒዶሶና። ሺን ኤንቴካ ሁዔን ሁዔን ኢሲ ኢሲ ዲናሬ ኤኪዶሶና። 11 ባንታ ሚሺያ ኤኪ ሲሚዲ ኬሳዋ ቦላ ዙዙሚዶሶና። 12 <ሃይሳቲ ጉዬፔ ዬዲ ኢሲ ሳቴ ገላላ አሲዶሶና። ሺን ጋላስ ኩሜሲ አዋ ሱላን ዳቡሪዲ ፔዲዳ ኑራ ኤንቴ ዋኒዲ ኢሲኖ ጊዶና> ያጊዶሶና።

13 «ዎይኒያ ኬሳዋይ አሳንቾታፔ ኢሱዋኮ፣ <ታ ኢሻው፣ ታኒ ኔና ቆሃቢኬ፤ ኔ ታራ ጊጊዳይ ኢሲ ዲናሬሳ ጊዴኔ? 14 ኔ ሚሺያ ኤካዳ ኔ ሶ ባ። ታ አማርሲ ዬዳይሳስካ ኔይሳ ሜላ ኢማናው ኮያይስ። 15 ታኒ ታ ሚሺያን ኮዬዳባ አሳናው ታው ማቲ ባዌ? ዎይኮ ታኒ ከሃ ጊዲዳ ጊሾ ኔኒ ቃናታይ?> ያጊስ።

16 «ሄሳዳ ሃዲ ዴሳን ጉዬ ጊዲዳይሳቲ ሲንሳታና፣ ሲንሳቲዳይሳቲ ቃሲ ጉዬታና» ያጊስ።

ዮሱሲ ባ ሃይቁዋባ ሄቫንሶ አዲስ
(ማር 10: 32-34፤ ሉቃ 18: 31-34)

17 ዮሱሲ ዮሩሳላሜ ቢሼ፣ ታማኔ ናምቡ ታማሬታ ዶማ ጋገ ከሲዲ ኤንታኮ ያጊስ። 18 «ሄኮ፣ ኑኒ ሃዲ ዮሩሳላሜ ቡሳ ቦላ ዴዎስ። ያን አሳ ናዓይ ካሂኔ ሃላቃታሲኔ ሂኒ አስታማሬታስ አዲ ኢሜታና። ኤንቴካ ኢያ ቦላ ሃይቆ ፒርዳ ፒርዳና። 19 ኢያ አይሁዴ ጊዶና ዴሪያስ አሲ ኢማና። ኤንቴ ኢያ ካዉሻና፣ ጋራፋና፣ ያቲዲ ኢያ ማስቃሊያ ቦላ ካቃና። ሺን ኢ ሄቫንሶ ጋላስ ሃይቆፔ ዴንዳና» ያጊስ።

ዛብዲዮሳ ናይታ አዩ ዎሳ

(ማር 10: 35-45)

20 ሄ ዎዴ ዛብዲዮሳ ማቺያ ባ ናምዑ አዴ ናይታራ ዩሱሳኮ ያዳ፥ ኢያ ሲንሳን ጉልባታዳ ኢሲባ ኢያ ዎሳሱ።

21 ዩሱሲ ኢኮ፥ «ኔ አይ ኮያይ?» ያጊስ።

ኢያ ዛራዳ፥ «ኔ ካዎቴሳን ሃ ታ ናምዑ ናይቲ ኢሶይ ኔ ኡሻቻን ኢሶይ ኔ ሃዲርሳን ኡቶ ጋርኪ!» ያጋሱ።

22 ሺን ዩሱሲ ናይታኮ ዛራዲ፥ «ሂንቴ አይ ዎሲያኮ ኤሬኬታ፤ ታኒ ኡያናው ዴዲያ ዋዩ ፁዓ ኡያናው ዳንዳዔቲ?» ያጊስ።

ኤንቲካ፥ «ኤ ዳንዳዎስ» ያጊዶሶና።

23 ዩሱሲ፥ «ቴማካ ታኒ ኡያናው ዴዲያ ፁዓፔ ሂንቴ ኡያና። ሺን ታ ኡሻቻኒኔ ሃዲርሳን ኡታናይሳታ ዶሬይ ታና ጊዲኬ። ሄ ቤሳይ ኢሜቴይ፥ ታ አዋይ ኢማናው ጊጊሲዳ አሳታሳ» ያጊስ።

24 አቲዳ ታሙ ኢያ ታማሬቲ ሄሳ ሲዲዳ ዎዴ ናምዑ ኢሻታ ቦላ ሃንቁቲዶሶና። 25 ሺን ዩሱሲ ኤንታ ኡባ ዩጊዲ ሃይሳዳ ያጊስ። «አይሁዴ ጊዶና አሳ ሃሬይሳቲ ባንታ አሳ ቦላ ጎዳቴይሳኒ ኤንታ ካሌሴይሳቲ ዎልቃን ሃሬይሳ ሂንቴ ኤሬታ። 26 ሺን ሂንቴ ጊዶን ሄሳዳ ጊዶ። ሂንቴሬ ጊታታናው ኮያ ኦኒካ ሂንቴው አይሌ ጊዶ። 27 ሂንቴ ጊዶን ኡባሬ ቦላ ጊዳናው ኮያ ኦኒካ ሂንቴው አይሌ ጊዳናው ቤሴስ። 28 ሄሳዳካ፥ አሳ ናዓይ አሴ ሃጋዛናውኔ ዳሮ አሳ ዎዛናው ባ ሺምፑዋ ኢማናው ዩሲፔ አቲን አሳን ሃጋዜታናው ዩቤና» ያጊስ።

ዩሱሲ ናምዑ ቆቁታ ፓሲስ

(ማር 10: 46-52፤ ሉቃ 18: 35-43)

29 ሄሳሬ ጉዩ፥ ዩሱሲ ባ ታማሬታራ ኢያርኮሬ ኬዩዲ ቢሺን፥ ዳሮ አሳይ ኤንታና ካሊዶሶና። 30 አጌ ጋዓን ኡቲዳ ናምዑ ቆቁቲ ዩሱሲ ያራ አዴይሳ ሲዲዲ፥ «ጎዳው፥ ዳዊቴ ናዓው፥ ኑስ ቃዴታርኪ» ያጊዲ ዋሲዶሶና። 31 ዳሮ አሳይ ኤንታና፥ «ሃይዚቴ» ያጊዲ ካጪዶሶና። ሺን ኤንቲ፥ «ጎዳው፥ ዳዊቴ ናዓው፥ ኑስ ቃዴታርኪ» ጊዲ ጉጂ ዋሲዶሶና።

32 ዩሱሲ ኤቂዲ፥ ኤንታ ዩጊዲ፥ «ታ ሂንቴው አይ አሳና ሜላ ኮዩቲ?» ያጊዲ አይቺስ።

33 ኤንቲካ፥ «ጎዳው፥ ኑ አይሬይ ዩላና ሜላ ኮዩስ» ያጊዶሶና።

34 ዩሱሲ ኤንታው ቃዴቲዲ፥ ኤንታ አይሬያ ቦቺስ። ኤሌሲዲ ኤንታ አይሬይ ዩሊስ፤ ኤንቲ ኢያ ካሊዲ ቢዶሶና።

21

ዮሱሲ ጊታ ቦንቾን ዮሩሳሌም ጌሊስ

(ማር 11:1-11፤ ሉቃ 19:28-40፤ ዮሃ 12:12-19)

1 ዮሱሳራኔ ኢያ ታማሬታራ ዮሩሳሌም ማቲዲ፥ ሻማሆ ዴሪያ ቦላ ዴዲያ ቤቴፋን ጊያ ጉታ ጋኪሼ፥ ዮሱሲ ባ ታማሬታፕ ናምዓታ ባፕ ሲንጩ ያጊዲ ኪቲስ፥ 2 «ሂንቴፌ ሲንሳን ዴዲያ ጉታ ቤቴ፥ ያን ኢሲ ሃሬይ ቃሾን ዴዲያሮ ኢ ማራራ ሂንቴ ሶሁዋራ ዴማና፥ ኤንታ ቢሊዲ ሃ ኤኪ ዩቴ፥ 3 እኒካ ሂንቴና አይቺኮ፥ ጎዳይ ኤንታና ኮዮስ) ያጊቴ፥ ኢ ኤንታና ኢራካ ዮዲ አጋና» ያጊስ።

4 ሄሲካ ናቤይ፥

5 «ዲዮኔ ካታማስ፥

ፀኮ፥ ኔ ካዎይ አሽኬ ጊዲዲ፥ ሃሬ ቦላኔ

ሃሬ ማራ ቦላ ኡቲዲ፥ ኔኮ ዮስ) ያጊቴ።

ያጊዲ ዓፊዳይሲ ፖሌታና ሜላ ሄሲ ሃኒስ።

6 ኢያ ታማሬቲ ቢዲ ዮሱሲ ኤንታ ኪቲዳይሳዳ አሲዶሶና፥

7 ሃሪጫኔ ሃሬ ማራ ኤሂዲ ቦላራ ማዲዳ ባንታ ማዑዋ ኤንታ ዞኮን

ዮጊዶሶና፥ ዮሱሲ ማዎታ ቦላ ኡቲስ፥ 8 ዳሮ አሳይ ባንታ ማዑዋ

አጊያን ሂዲዶሶና፥ ሃራቲ ቦንጮ ታሺዲ አጊያ ቦላ ዮጊዶሶና፥

9 ዮሱሳፕ ሲንሳራ ሃሙቴይሳቲኔ ኢያፕ ጉዮራ ካሊያ ዳሮ አሳይ፥

«ሆሳና! * ዳዊቴ ናዓይ ጋላቴቶ!

ጎዳ ሱንሳን ዮይሲ አንጄቲዳይሳ!

ቦንቾይ ኡባፌ ጅቃ ሳሉዋን ዎሳስ ጊዶ!»

ያጊዲ ዋሲዶሶና።

10 ዮሱሲ ዮሩሳሌም ካታማ ጌሊዳ ዎዴ ሄ ካታማን ዴዲያ አሳ

ኡባይ፥ «ሃይሲ አኔ?» ያጊዲ ያርኪዶሶና።

11 አሳይ፥ «ሃይሲ ጋሊላን ዴዲያ ናዘሬቴ ካታማፕ ዩዳ ናቢያ

ዮሱሳ» ያጊዶሶና።

ዮሱሲ ዎሳ ኬሲ ጌሊስ

(ማር 11:15-19፤ ሉቃ 19:45-48፤ ዮሃ 2:13-22)

12 ዮሱሲ ዎሳ ኬሲ ጌሊዲ፥ ያን ባይዜይሳታኔ ሻሜይሳታ ኡባ

ካሬ ጎዲስ፥ ሚሼ ላሜይሳታ ዓርጴዛታኔ ሆሌታ ባይዜያ አይዴታ

ሺሪ ዮጊስ፥ 13 ኢካ ኤንታኮ፥ «ዎሳ ቃላን፥ ጎታ ኬሳይ ዎሳ ዎሲያ

21:5 ዛካ 9:9 * 21:9 ሆሳና፥ ኢብራይስጥ ዶናን ሆሳና ጉሳይ «ኑና አሻ ጉሱ፥ ቃሲ አሳይ ዎሳ ጋላታናው ጎዔቲያ ቃላ፥ 21:9 ማዘ 118:25

ኪሲ ጌቴታና፤ ጌቴቲ ዓፌቲስ። ሺን ሂንቴ ፓንጋቲ ቆሴቲያ ጎንጎሎ አሲዴታ» ያጊስ።

14 ዮሱሲ ያሳ ኪሳን ዴዲሺን ቆቄቲኔ ጉንዳቲ ኢያኮ ዩን ኤንታ ፓሲስ። 15 ሺን ካሂኔ ሃላቃቲኔ ሂጌ አስታማሬቲ ዮሱሲ አሲዳ ማላሊሲያባታ ቤዲዳይሳሲኔ ጉሳ ናይቲ ያሳ ኪሳን፤ «ዳዊቱ ናዓይ፤ ጋላቴቶ» ያጊዲ ዋሴይሳ ሲዲዲ ሃንቁቲዶሶና። 16 ኤንቲ ዮሱሳኮ፤ «ሃይሳቲ ጌይሳ ኔ ሲዓይ?» ያጊዶሶና።

ዮሱሲ፤ «ኤ ሲዓይስ፤ ያሳ ቃላን፤ ጉሳ ናይታ ዶናኒኔ ዳሚያ ናይታ ዶናን ጋላታ ዎሳዳሳ፤ ጌቴቲዲ ዓፌቲዳይሳ ሂንቴ ናባቢቤኬቲ?» ያጊስ። 17 ኤንታና ያን አጊዲ ቢታኒያ ካታማ ቢዲ አቂስ።

ጎዳይ ባዲዳ ባላሴ ሚሲው
(ማር 11:12-14፤ 20-24)

18 ዮሱሲ ዎንታ ጉራ ካታማ ሲሚዲ ዩሼ ኮሻቲስ። 19 ኦጌ ጋፃን ኢሲ ባላሴ ሚሲ ቤዲዲ ኢኮ ቢስ። ሺን ሃይሳፌ አቲን ሃራ አይኮካ ዴሚቤና። ሄሳ ጊሾ፤ ኢዮ፤ «ሂዛፔ ናምዓንሶ አይፌ አይፎፓ!» ያጊስ። ሄ ባላሴ ሚሲያ ኤሌሳዳ ሜላ አጋሱ።

20 ኢያ ታማሬቲ ሄሳ ቤዲዲ፤ «ሃ ባላሲያ ዋናዳ ኤሌሳ ሜላዴ?» ያጊዲ ማላሌቲዶሶና።

21 ዮሱሲ ዛሪዲ፤ «ታኒ ሂንቴው ቱማ አዳይስ፤ ሂንቴው አማኖይ ዴዲኮ፤ ቃሲ ሂንቴ ሲዶና ኢዲኮ ባላሴ ቦላ ታኒ አሲዳይሳ ሜላ ዓላላ አሴኬታ፤ ሺን ሃ ዴሪያ ሾዴታዳ አባን ዎዳ» ያጊኮ ሃናና። 22 አማኒዲ ሂንቴ ዎሲያባ አይቢባ ጊዲኮካ ሂንቴ ኤካና» ያጊስ።

ዮሱሳ ማታይ አይሹቲስ
(ማር 11:27-33፤ ሉቃ 20:1-8)

23 ዮሱሲ ያሳ ኪሳ ጌሊዲ ታማርሲሺን፤ ካሂኔ ሃላቃቲኔ አይሁዴ ጨማቲ ኢያኮ ዩዲ፤ «ኔኒ ሃይሳ አሳና ሜላ ኔው አይ ማቲ ዴዲ? ኔው ሃ ማታ ኢሚዳይ አኔ?» ያጊዲ አይቺዶሶና።

24 ዮሱሲ ኤንታኮ፤ «ታኒካ ሂንቴና ኢሲባ አይቻይስ፤ ሂንቴ ታው ሄሳ ዛሪኮ፤ ታኒ አይ ማታን አሲያኮ ሂንቴው አዳና።

25 ዮሃንሲ ምቃና ሜላ ማታይ አውፔ ኢሜቲዴ? ያሳፌዬ አሳፔ?» ያጊስ።

ኤንቲ ባንታ ጊዶን ዞሬቲዲ፤ «ኮኒ፤ ጎሳፌ» ጊኮ፤ ኢ ኮና፤ ጎሳቲን አይስ አማኒቤኬቲ?» ያጋና። 26 ኮኒ፤ ጎሳፔ» ጊኮ፤ አሳ

ኡባይ የሃረሳ ናቤ አሲ ዌሊያ ጊሾ አሳ ያዮስ» ያጊዶሶና። ²⁷ ሄሳ ጊሾ፥ «ኑኒ ኤርኮ» ያጊዲ ዛሪዶሶና።

ኢካ፥ «ሂዛ፥ ታኒካ ሃይሳ አይ ማታን አሲያኮ ሂንቴው አዲኬ» ያጊስ።

ናምዑ ናይታ ሌሚሶ

²⁸ «ዮሱሲ ካሊዲካ ሃይሳዳ ያጊስ፡ ናምዑ አዴ ናይቲ ዴዲያ ኢሲ ኡራይ ዴዔስ። ሄ ኡራይ ባይራ ናዓኮ ቢዲ፥ <ታ ናዓው፥ ሃቺ ዎይኒያ ጊዶ ባዳ አሳ> ያጊስ። ²⁹ ናዓይ ዛሪዲ፥ <አቶ ቢኬ> ያጊስ። ሺን ጉዮፔ ባ ዎዛናን ቆፒ ኤኪዲ አሳናው ቢስ። ³⁰ አዋይ ባ ካሎ ናዓኮ ቢዲ፥ ባ ባይራ ናዓኮ ጊዳይሳዳ ኪቲስ። ኢካ፥ <ኤር፥ ታ አዋው> ያጊስ። ሺን ቢቤንና። ³¹ ሃ ናምዑ ናይታፔ ባ አዋስ ኪቲቲዳይሲ አወሴ?» ያጊስ።

ኤንቲካ፥ «ባይራ» ያጊዶሶና።

ዮሱሲ ኤንታኮ፥ «ታ ሂንቴው ቱማ አዳይስ፤ ቃራፃ ቃንጊሴይሳቲኒ ላይማቴይሳቲ ሂንቴፌ ሲንሳቲዲ ያሳ ካዎቴሳ ጌላና። ³² ፃማቂያ የሃረሲ ሱሬ አጊያ ታማርሲሼ ዪን ኢ ጌይሳ አማኒቤኬታ። ሺን ቃራፃ ቃንጊሴይሳቲኒ ላይማቴይሳቲ አማኒዶሶና። ሂንቴ ሃሪ አቶሺን፥ ኤንታ ቤዲዲካ ሂንቴ ናጋራፔ ሲሚዲ አማኒቤኬታ» ያጊስ።

ዎይኒያ ጊዶን አሲያ ጎሻንቾታ ሌሚሶ

(ማር 12፡1-12፤ ሉቃ 20፡9-19)

³³ ቃሲካ ዮሱሲ ሃይሳዳ ያጊስ፤ «ሃራ ሌሚሶ ሲዲቴ፥ ዎይኒ ቶኪዳ ኢሲ ኡራይ ዴዔስ። ሄ ዎይኒያ ዩሹዋ ዲሪስ። ዎይኒያ ጉምዲያ አላካ ቦኪስ። ዎይኒያ ናጋናው ሻኮካ ሻኪስ። ሄሳፌ ጉዮ፥ ጋዲያ ኮሴ ኢሚዲ ሃራ ቢታ ቢስ። ³⁴ ዎይኒ አይፊያ ማጊያ ዎዴይ ጋኪን ባና ጋኪያ ባጋ ኤኪዲ ያና ሜላ ባ አይሌታ ኤንታኮ ዩዲስ። ³⁵ ኮሴ አዋቲ ኢያ አይሌታ አይኪዲ ኢሱዋ ዋዲዶሶና፥ ሃንኩዋ ዎዲዶሶና ቃሲ አቲዳይሳ ሹቻን ጫዲዶሶና። ³⁶ ዎይኒ አታኪልቲያ ጎዳይ ካሴይሳታፔ ዳሪያ ሃራ አይሌታ ኪቲስ። ኮሴ አዋቲ ኤንታ ቦላካ ሃንኮይሳታ ቦላ አሲዳይሳዳ አሲዶሶና። ³⁷ ዉርሴሳን ኢ፥ <ታ ናዓ ኤንቲ ቦንቻና> ያጊዲ ባ ናዓ ኤንታኮ ኪቲስ።

³⁸ «ሺን ኮሴ አዋቲ ናዓ ቤዲዲ ባንታ ጊዶን <ጋዲያ ላታናይሲ ሃይሳ፥ ኢያ ዎዲዲ ጋዲያ ኑኒ ላቶስ!> ያጊዶሶና። ³⁹ ናዓ አይኪዲ ዎይኒያ ጊዶፌ ጋፃ ኪሲዲ ዎዲዶሶና።

21:32 ሉቃ 3:12፤ 7:29-30 21:33 ኢሳ 5:1-2

40 «ሂዛ፥ ዎይኔ አታኪልቲያ ጎዳይ ያ ዎዴ ሄ ኮሴ አዋታ ዋታኔ?» ያጊዲ አይቺስ።

41 ኤንቲ ዛሪዲ፥ «ኢ ሄ ኢታ አሳታ ኢታ ዎዶ ዎዲዲ፥ ዎይኔይ አይፊያ ዎዴ ኢያ ጋኪያ ባጋ ዎዴን ዎዴን ኢሚያ ሃራ ኮሴ አዋታስ ኢሚያ» ያጊዲሶና።

42 ዩሱሲ ዛሪዲ ኤንታኮ፥ ያሳ ቃላን፥

«ጊምቤይሳቲ ቦሪዲ ኢዲዳ ሹቻይ፥

ጎዳ ሃዲዎ ሚንሴያ፥ ኡባፌ አዲያ ሹቻ ጊዲስ።

ሃይሲ ጎዳይ አሲዳባ፤

ኑ አይፊያስ ማላሊሲያባ)

ጌቴቲዲ ሃፌቲዳይሳ ናባቢቤኬቲ?

43 «ሄሳ ጊሾ፥ ታኒ ሂንቴው አዳይስ፤ ያሳ ካዎቴሳይ ሂንቴፌ ኤኬቲዲ ሎዎ አይፌ አይፊያ አሳታስ ኢሜታና። 44 [ሃ ሹቻ ቦላ ኩንዲያ ኡባይ ሜቄሬታና። ቃሲ ሄ ሹቻይ ኢያ ቦላ ዎዲያ ኡራይካ ጋጩታና]» † ያጊስ።

45 ካሂኔ ሃላቃቲኔ ፋሪሳዌቲ ዩሱሲ አዲዳ ሌሚሱዋን ባንታና አዲዳይሳ ኤሪዶሶና። 46 ኤንቲ ዩሱሳ አይካናው ኮዩዶሶና፥ ሺን አሳይ ዩሱሳ ናቤ አሲዲ ሄሊያ ጊሾ አሳስ ያዩዶሶና።

22

ያጋኖ ሄሳ ሌሚሶ

(ሉቃ 14:15-24)

1 ዩሱሲ አሳስ ዛሪዲ ሃይሳዳ ያጊዲ ሌሚሶ አዲስ። 2 «ያሳ ካዎቴሳይ ባ ናዓስ ያጋኖ ጊጊሲዳ ካዉዋ ዳኔስ። 3 ሄ ካዎይ ያጋኖ ያና ሜላ አዲ ዎሴዳ አሳታ ሄጋናው ባ አይሌታ ኪቲስ። ሺን አሳቲ ያናው ኮዩቦኮና። 4 ቃሲ ሃራ አይሌታ ሄጊዲ፥ ሄጊቲዳ አሳታኮ ቢዲ፥ <ታኒ ታ ሳንጋታኔ ሞዲዳ ጋታርሜንሶታ ሹካስ፤ ኡባባይ ጊጊስ። ታ ያጋኑዋ ሃ ዩቴ ያጊቴ» ያጊዲ ኪቲስ። 5 ሺን ሄጊቲዳይሳቲ ሄሳ ኢዲዲ፥ ባንታ አሶስ አሶስ ቢዶሶና። ኢሶይ ባ ጎሻስ፥ ሃንኮይ ባ ዛልዲያስ ቢስ። 6 ሃራቲ ቃሲ ካዉዋ አይሌታ አይኪዲ፥ ካዉሺ ዋዲዲ ዎዲዶሶና።

7 «ካዎይ ዳሮ ዩሎቲዲ፥ ባ ዎታዳሬታ ዩዲዲ ሺምፖ ዎዲዳይሳታ ዎዲሲስ፥ ኤንታ ካታማካ ፀጊስ። 8 ሄሳፌ ጉዩ፥ ባ አይሌታኮ፥ <ያጋኖይ ጊጊስ፥ ሺን ሄጊቲዳይሳቲ ያጋኑዋስ ቢሲያ አሲ ጊዶኮና። 9 ሄሳ ጊሾ፥ ዎጋ አጊታ ቢዲ፥ ዴሚዳ አሲ ኡባ ያጋኑዋ ያና ሜላ ሄጊቴ» ያጊስ። 10 አይሌቲ አጊያ ቦላ ቢዲ ባንታ

21:42 ማዝ 118:22 † 21:44 ኢሲ ኢሲ ቤኒ ማፃፋቲ ፓይዶ 44 ጉጀሶና (ሉቃ 20:18 ሄሊቴ)።

ዴሚዳ አሲ ኡባ ሎዎታኔ ኢታታ ኤሂዲ ያጋኖ ሻቃራ ጌልሲዲ ኩንሲዶሶና።

11 «ሺን ካዎይ ካሳ ማናው ኡቲዳ አሳ ቤዓናው ጌሊዳ ዎዴ ያጋኖ ማዎ ማዲቦና ኢሲ አሲ ዴሚስ። 12 ኢያኮ፣ ሳ፣ ኔ ያጋኖ ማዎ ማዎና ዋናዳ ሃይሳ ጌላዲ?» ያጊስ። ሺን ኡራይ ሲዲ ጊስ።

13 «ካዎይ ባ አይሌታኮ፣ ሃ ኡራ ኩሺያኔ ቶሁዋ ቃቺዲ፣ ካሬ ዲማ ኬሲ ዩጊቴ። ያን ኢያው ዩሆኔ አቻ ጋርጨላ ጊዳና» ያጊስ።

14 «ሄሳዳካ፣ ያሳ ካዎቴላስ ዩጌቲዳይሳቲ ዳሮ ሺን ዶሬቲዳይሳቲ ጉላ» ያጊስ።

ጊራባ

(ማር 12:13-17፤ ሉቃ 20:20-26)

15 ሄሳፌ ጉዩ፣ ፋሪሳዌቲ ቢዲ፣ ዩሱሳ ዋቲ አዳን አይካኔኮ ዞሬቲዶሶና። 16 ባንታ ታማሬታኔ ሄሮዲሳ ባጋታፔ ኢሶታ ኢሶታ ኪቲዶሶና። ኤንቲካ፣ «አስታማሪያው፣ ኔ ቱማ አዴይሳ ኑ ኤሮስ። ኔኔ አሳፔ አሴ ሻካካ፣ አሳ ዎይጋንዴስ ጋዳ አይኮካ አሳካ፣ ያሳ አጊያ ቱማቴላን ታማርሳሳ። 17 አኔ ኑስ አዳ፣ ኑኔ ሮሜ ካዉዋስ ጊራ ጊራናው ቤሲ ቤሴኔ?» ያጊዶሶና።

18 ሺን ዩሱሲ ኤንታ ኢታ ቆፋ ኤሪዲ፣ «ሃ ጨቦቶ፣ ታና አይስ ፓጨቲ? 19 ጊራ ጊሪያ ሚሺያ ታና ቤሲቴ» ያጊስ። ኤንቲካ ኢያው ሳንቲሜ ኤሂዶሶና። 20 ኢ፣ «ሃ ሱንሳይኔ ማላይ አዴባዩ?» ያጊስ።

21 ኤንቲ፣ «ሮሜ ካዉዋይሳ» ያጊዶሶና።

ያቲን ዩሱሲ ኤንታኮ፣ «ሂዛ፣ ካዉዋስ ቤሴይሳ ካዉዋስ፣ ያሳስ ቤሴይሳ ያሳስ ኢሚቴ» ያጊስ።

22 ኤንቲ ሄሳ ሲዲዳ ዎዴ ማላሌቲዲ ኢያ ማታፔ አጊዲ ቢዶሶና።

ሃይቆፔ ዴንዶባ

(ማር 12:18-27፤ ሉቃ 20:27-40)

23 ሄ ጋላስ ሃይቆፔ ዴንዶይ ባዋ ያጊያ ሳዱቃዌቲ ዩሱሳኮ ዩዲ፣ ያጊዲ ኢያ አይቺዶሶና። 24 «አስታማሪያው፣ ሙሴይ፣ ኢሲ አሲ ናዓ ዩሎና ሃይቂኮ፣ ሄ ሃይቂዳይሳ ኢሻይ ኢያ ማቺው ኤኪዲ፣ ባ ኢሻስ ናዓ ዩሎ» ያጊዲ ኪቲስ። 25 ኑ ኤሪያ ሳፑን ኢሻቲ ዴዎሶና፣ ባይራይ ማቾ ኤኪዲ ናዓ ዩሎና ሃይቂስ፣ ኢያ ማቺው ኢያ ካሎ ኢሻይ ኤኪስ። 26 ሄሳዳካ፣ ሄ ማጫሲው ኤኪዳ ናምዓንሶይካ፣ ሄቫንሶይካ፣ ቢዲ ላፑናቲ ወራና ጋካናው ኡባይ

22:13 ማቶ 8:12፤ 25:30፤ ሉቃ 13:28 22:23 ሃ.አ 23:8 22:24 ዛሬ 25:5

ሃይቂዶሶና። 27 ኡባፌ ጉዩ ሄ ማጫሲያ ሃይቃሱ። 28 ያቲን፥ ላፑናቲ ኡባይ ኢዮ ኤኪዳ ጊሾ ሃይቆፕ ዴንዲያ ጋላስ፥ ሄ ማጫሲያ ላፑናታፕ ኣዉሳስ ማቕ ጊዳኔ?» ያጊዶሶና።

29 ዩሱሲ ዛሪዲ፥ «ሂንቴ ያሳ ቃላይ ታማርሲያባ ዎይኮ ኢያ ዎልቃ ኤሮና ጊሾ ባሌታ። 30 ኣሳይ ሃይቆፕ ዴንዲያ ዎዴ ሳሎን ዴዲያ ኪታንቕታ ሜላ ጊዳናፕ ኣቲን ኤኮኮና ጌሎኮና። 31 ቃሲ ሃይቂዳ ኣሳቲ ሃይቆፕ ዴንዳናባ ያሳይ ሂንቴው ኦዲዳይሳ ናባቢቤኬቲ? 32 ያሳይ፥ <ታኒ ኣብራሃሜ ያሳ፥ ዪሳቃ ያሳ፥ ያይቆባ ያሳ» ያጊስ። ሄሳ ጊሾ፥ ያሳይ ጋፃ ዴዲይሳታ ያሳፌ ኣቲን ሃይቂዳይሳታ ያሳ ጊዴና» * ያጊስ።

33 ዳሮ ኣሳይ ሄሳ ሲዲዲ፥ ኢያ ቲሚርቲያን ማላሌቲዶሶና።

ኡባፌ ባይራቲያ ኪታ
(ማር 12: 28-34፤ ሉቃ 10: 25-28)

34 ዩሱሲ ሳዱቃዌታስ ጋናባ ዳይሲዳይሳ ፋሪሳዌቲ ሲዲዳ ዎዴ ኢሲፌ ሺቂዶሶና። 35 ኤንታ ጊዶፌ ኢሲ ሂኔ ኣስታማሬይ ዩሱሳ ፓጩ ኦይሾ ኦይቺስ። 36 «ኣስታማሪያው፥ ሂኔ ኡባፌ ኣዴይሲ ኣዉሴ?» ያጊዲ ኦይቺስ።

37 ዩሱሲ ዛሪዲ፥ « <ኔ ጎዳ፥ ኔ ያሳ፥ ኔ ኩሜሳ ዎዛናፕ፥ ኔ ኩሜሳ ሺምፑዎፌ፥ ኔ ኩሜሳ ቆፋፕ ዶሳ። 38 ኡባፌ ኣዴይሲኔ ባይራ ኪታይ ሃይሳ። 39 ናምዓንሶ ኡባፌ ኣዲያ ኪታይ፥ ኣሴ ኡባ ኔ ሁዲያ ኔ ዶሴይሳዳ ዶሳ ያጌይሳ። 40 ሙሴ ሂኔይኔ ናቤታ ቲሚርቲይ ኡባይ ሃ ኪታታ ቦላ ካቶሶና» ያጊስ።

ኪሪስቶሳባ ኦይቺዳ ኣይሻ
(ማር 12: 35-37፤ ሉቃ 20: 41-44)

41 ፋሪሳዌቲ ኢሲ ቦላ ሺቂዲ ዴዲሺን፥ ዩሱሲ ኤንታና፥ 42 «ኪሪስቶሳባ ሂንቴ ዎይጌቲ? ኢ ኦዴ ናዔ?» ያጊዲ ኦይቺስ። ኤንቲ፥ «ኢ ካዉዋ ዳዊቴ ናዔ» ያጊዲ ዛሪዶሶና።

43 ዩሱሲ ኤንታኮ፥ «ያቲን፥ ዳዊቴይ ጌሻ ኣያናን ጊዲዲ ዎቲዲ ኪሪስቶሳ፥ <ጎዳ» ጊዲ ዪጊ? ዳዊቴይ ጊሼ፥

44 <ጎዳ ያሳይ፥ ታ ጎዳኮ፥ †
ኔ ሞርኬታ ኔ ቶሆይ ዩዲያሶ ኦሳና ጋካናው፥

* 22:32 ያሳይ ጋፃ ዴዲይሳታ ያሳፌ ኣቲን ሃይቂዳይሳታ ያሳ ጊዴና፥ ዩሱሲ ሃ ቤሳን ኦዴይ ያሳይ ሃ ሃይቂዳ ሄቫታስ ቦሴ ጊዲኮ ኤንቲ ዴዎን ዴዎሶና ያጌይሳ። 22:32 ኬሳ 3:6 22:37 ዛሬ 6:5 22:39 ሌዌ 19:18 22:40 ሉቃ 10:25-28 † 22:44 ታ ጎዳኮ፥ ሃ ቤሳን ዳዊቴይ ታ ጎዳ ጊዲ ዪጊይ ኪሪስቶሳ። 22:44 ማዘ 110:1

ሃይሳን ታፔ ኡሻቻ ባጋን † ኡታ ጊስ።
 45 ሂዛ፣ ዳዊቴይ ኪሪስቶሳ ጎዳ ጊዲ ዩጊኮ፣ ዋኒዲ ኪሪስቶሲ ዳዊቴ ናዓ ጊዲ?»
 ያጊስ።
 46 ዮሱሳስ ኢሲ ቃላ ዛራናው ዳንዳዒዳ አሲ አኒካ ባዋ። ቃሲ ሄ ጋላሳፔ ዶሚዲ ሃራ አይሻ አይቻናው አኒካ ዳንዳዒቤና።

23

ሂጌ አስታማሬታኔ ፋሪሳዌታ ኢታቴላ

(ማር 12:38-39፤ ሉቃ 11:43-46፤ 20:45-46)

1 ሄሳፌ ጉዬ፣ ዮሱሲ ሺቂዳ አሳሲኔ ባ ታማሬታስ ሃይሳዳ ያጊስ። 2 «ሂጌ አስታማሬታኔ ፋሪሳዌቲ ሙሴ ሂጊያ ቢላናው ማታራ ዴዎሶና። 3 ሄሳ ጊሾ፣ ኤንቲ ሂንቴና ኪቲያ ኡባ አሲቴኔ ናጊቴ። ሺን ኤንቲ አሴይሳዳ አሶፊቴ። አይስ ጊኮ፣ ኤንቲ አዴይሳዳ አሶኮና። 4 ኤንቲ ቶካናው ዳንዳዒቶና ቶሆ ቃቺዲ አሳ ቶሶሶና። ሺን ባንታው ሃሪ አቶሺን፣ ሄ ቶሁዋ አሳይ ቶኪያ ዎዴ ቢራዴ ዩራን ቦቻናው ኮዮኮና።

5 «ሺን ኤንቲ ባንታ አሶ ኡባ አሲ ቤዓና ሜላ አሶሶና። ባንታ ሶምዖኒኔ ቄሴን ቃቺያ ማፃፋ ዊቂሴይ ዴዒያ ኪታፌ ዳልጊሶሶና፣ ባንታ ማዑዋ ማጫራካ አዱሶሶና። * 6 ዋኬቲያ ቤሳን ቦንቾ ቤሲኔ አይሁዴ ዎሳ ኬሳታን ዳሮ ሎዒያ አይዴ ዶሶሶና። 7 አሳይ ጊያን ኤንታና ቦንቾን ሳሮሳናይሳኔ (አስታማሪያው) ጊዲ ዩጋናይሳ ኮዮሶና።

8 «ሺን ሂንቴ አስታማሬይ ኢሱዋ ፃላላ ጊዲዳ ጊሾኔ ሂንቴ ኡባይ ኢሻታ ጊዲዳ ጊሾ (አስታማሪያው) ጌቴቲዲ ዩጌቶፊቴ። 9 ሂንቴው ሳሎን ኢሲ አዋ ፃላሊ ዴዒያ ጊሾ ሃ ሳዓን አናካ (አዋው) ጊዲ ዩጎፒቴ። 10 ሂንቴው ኢሲ ጎዳይ ኪሪስቶሳ ፃላሊ ዴዒያ ጊሾ (ጎዳው) ጌቴቲ ዩጌቶፊቴ። 11 ሂንቴ ጊዶን ባይራቴይ ሂንቴ አይሴ ጊዶ። 12 ባና ጊታያ አኒካ ካዉያና፤ ባና ካዉሺያ አኒካ ጊታታና።

ሂጌ አስታማሬታኔ ፋሪሳዌቲ ቦሬቲዶሶና

(ማር 12:40፤ ሉቃ 11:39-42፤ 44፤ 52፤ 20:47)

† 22:44 ኡሻቻ ባጋን፡ ማታኔ ቦንቾ ቤሲ። 22:44 ማዝ 110:1 * 23:5 ሶምዖኒኔ ቄሴን ቃቺያ ማፃፋ... ማዑዋ ማጫራ አዱሶሶና፡ ሄሳ ኤንቲ አሴይ ዎሳስ ታ ኢሜታስ ጊያ ማላ ቤላናሳ (ዛሬ 15:37-41)። 23:5 ማቶ 6:1፤ ዛሬ 6:8፤ ታይ 15:38 23:11 ማቶ 20:26 23:12 ሉቃ 14:11፤ 18:14

13 «ሂንቴኖ፥ ጩቦቶ፥ ሂጌ አስታማሬቶኔ ፋሪሳዌቶ፥ አሳ ሲጎሳን ሳሎ ካዎቴሳ ጎርዴይሳቶ ሂንቴና አዩ። ሂንቴ፥ ሂንቴ ሁዔን ጌሌኬታ ቃሲ ሃራታካ ጌልሴኬታ።

14 [«ሂንቴኖ ጩቦቶ፥ ሂጌ አስታማሬቶኔ፥ ፋሪሳዌቶ፥ አምዔታ ኬሳ ሂንቴ ቦንቂሼ፥ አሲ ቤያ ጊዲ ዎሳ አዱሴታ። ሄሳ ጊሾ፥ ሂንቴና አዩ። ኡባፌ አዲያ ፐርዳይ ሂንቴና ናጌስ።] †

15 «ሂንቴኖ፥ ጩቦቶ፥ ሂጌ አስታማሬቶኔ ፋሪሳዌቶ፥ ሂንቴ ኢሲ ኡራ አማንሳናው አባራኔ ሳግራ ዩዩታ። ሺን ሂንቴ ኢያ አማንሲዳ ዎዴ ሄ ኡራ ሂንቴፌ አሲዲ ጋናሜስ ጊጌቲዳይሳ አሲያ ጊሾ ሂንቴና አዩ።

16 «አኒካ ዎሳ ኬሳን ጫቂኮ አይኮይካ ባዎ። ሺን ዎሳ ኬሳን ዴዲያ ዎርቃን ጫቂኮ፥ ሄ ጫቆይ ኢያ ጎማና ጊያ ቆቄቶ፥ ሂንቴው ቆቄዲ ሃራታ ካሌሴይሳቶ፥ ሂንቴና አዩ። 17 ሂንቴኖ፥ ኤያቶ፥ ቆቄቶ፥ ዎርቃይ አዲዩ? ዎርቂያ ዎሳስ ዱማያ ዎሳ ኬሳይ አዲ? 18 ቃሲ <አኒካ ያርሾ ያርሺያ ቤሳን ጫቂኮ፥ አይኮይካ ባዎ። ሺን አኒካ ኢያ ቦላ ዴዲያ ያርሹዎን ጫቂኮ፥ ሄ ጫቆይ ኢያ ጎማና ያጊዲ ታማርሴታ። 19 ሂንቴኖ፥ ቆቄቶ፥ ያርሾይ አዲዩ? ያርሹዎ ዎሳስ ዱማያ ቤሳይ አዲ? 20 ሄሳ ጊሾ፥ ያርሾ ቤሳን ጫቂያ ኡራይ፥ ሄ ያርሾ ቤሳኒኔ ኢያ ቦላ ዴዲያ ኡባባን ጫቀስ። 21 ዎሳ ኬሳን ጫቂያ ኡራይ፥ ሄ ዎሳ ኬሳኒኔ ኢያን ዴዲያ ዎሳን ጫቀስ። 22 ሳሎን ጫቂያ ኡራይ ዎሳ አራታኒኔ ሄ አራታ ቦላ ኡቲያ ዎሳን ጫቀስ።

23 «ሂንቴኖ፥ ጩቦቶ፥ ሂጌ አስታማሬቶኔ ፋሪሳዌቶ፥ ሂንቴና አዩ። ሂንቴ ካሬሳ ሳዎቴ፥ ናቲሮቴኔ አካሼቴ አስራታ ኬሴታ። ሺን ሂጊያን ዴዲያ አዲ ኮሼይሳታ አጊዴታ። ሄሲካ ሱሬ ፐርዳ፥ ቃዲቴሴኔ ኡባባን አማኔቴሴ። ሃራታካ አጎናሺን ሃይሳታ ሂንቴ አሳናው ቤሴስ። 24 ሂንቴው ቆቄዲ ሃራ አሲ ካሌሴይሳቶ፥ ሂንቴ ኡሻፌ ኡዱንዌ ኬሲዲ ጊማሌ ሚቴታ።

25 «ሂንቴኖ፥ ጩቦቶ፥ ሂጌ አስታማሬቶኔ ፋሪሳዌቶ፥ ሂንቴና አዩ። ሂንቴ ሻቲያሲኔ ኬሪያስ ቦላ ባጋ ጌሼታ። ሺን ኤንታው ጋርሳን ቦንቂይኔ ኡዜቴሴ ኩሚ ኡቲስ። 26 ኔኖ ቆቄ ፋሪሳዊያው፥ ሻቲያሲኔ ኬሪያስ ጋርሳ ካሴታዳ ጌሻ። ሄሳፌ ጉዩ፥ ቦላ ባጋይካ ጌሺ ጊዳና።

27 «ሂንቴኖ፥ ጩቦቶ፥ ሂጌ አስታማሬቶኔ ፋሪሳዌቶ፥ ሂንቴና አዩ። ካሬ ባጋራ ቃላሜ ቲዩቲዲ ሎዲዲ፥ ጊዶን ሜቄሴኔ

† 23:14 ኢሲ ኢሲ ቤኒ ማገፋቲ ፓይዶ 14 ጉጆሶና። 23:22 ኢሳ 66:1፤ ግብ 5:34 23:23 ሌዌ 27:30

ዎቂዳባይ ኩሚዳ ዱፎታ ዳኔታ። 28 ሄሳዳካ፥ ቦላ ባጋራ አሳስ ሎዎ ዳኔታ። ሺን ሂንቴ ጋርሳን ጨቦቴሱኔ ኢታቴሱ ኩሚስ።

29 «ሂንቴኖ፥ ጨቦቶ፥ ሂን ኣስታማሬቶኔ ፋሪሳዌቶ፥ ሂንቴና አዩ። ሂንቴ ናቤታስ ዱፎ ኬዌታ፥ ቃሲ ያሎታ ዱፋዋካ ሎይሴታ። 30 ቃሲ ሂንቴ፥ ሱኔ ቤኒ ኑ አዋታ ዎዴ ዴዲዳባ ጊዲያኮ፥ ኤንታራ ኢሲፌ ናቤታ ሱሳ ጉሶኮሺን» ያጌታ። 31 ሄሳ ጊሾ፥ ሂንቴ ናቤታ ዎዲዳ አሳ ናይታ ጊዴይሳ ሂንቴ ሂንቴ ሁዔን ማርካቴታ። 32 ሂዛ፥ ሂንቴ አዋቲ ዶሚዳይሳ ሂንቴ ፖሊቴ።

33 «ሃ ሾሻቶ፥ ሾሻ ናይቶ፥ ሂንቴ ጋናሜ ፐርዳፌ ዋኒዲ አታኔ? 34 ሄሳ ጊሾ፥ ታ አዴይሳ ሲዒቴ፤ ታኒ ናቤታ፥ ጨንጫ አሳታኔ ኣስታማሬታ ሂንቴኮ ኪታና። ኤንታፌ ኢሶታ ኢሶታ ሂንቴ ዎዳናኔ ማስቃሊያ ቦላ ካቃና። ባጋታ አይሁዴ ዎሳ ኬሳታን ሊሶን ጋራፋናኔ ካታማፔ ካታማ ጎዳና። 35 ሄሳ ጊሾ፥ ያሎዋ አቤላ ዎዲዳ ዎዲያፔ ዶሚዲ፥ ዎሳ ኬሳሲኔ ያርሾ ቤሳፌ ጊዶን ሂንቴ ዎዲዳ ባራኪያ ናዓ ዛካሪያሳ ዎዴ ጋካናው ሃይቂዳ ያሎ አሳ ኡባ ጊሾ ሂንቴ ሴሬታና። 36 ታኒ ሂንቴው ቱማ አዳይስ፤ ሂንቴኔ ሂንቴ አዋቲ አሲዳ ባላስ ሃ ፐርዳ ኡባይ ሃ ዩሌቴሳ ቦላ ጋካና።

ዩሱሲ ዩሩሳላሜስ ዩኪስ
(ሉቃ 13:34-35)

37 «ዩሩሳላሜ፥ ዩሩሳላሜ፥ ናቤታ ዎዲያሬ! ዎሳይ ኔኮ ኪቲዳይሳታ ሹቻን ጫዲያሬ! ኩቶይ ባ ናይታ ባ ቁፌን ሃጴይሳዳ ታኒ ኔ አሳ ታ ቁሲያን ጌቻናው አፑን ቶዎ ኮያዲና! ሺን ታና ዲጋዳሳ። 38 ሂዛ፥ ሂንቴ ዎሳ ኬሳይ ካይሲ ጊዳና። 39 ታኒ ሂንቴው አዳይስ፤ ስዳ ሱንሳን ዩይሲ አንጄቲዳይሳ» ሂንቴ ጋና ጋካናው ናምዓን፥ ታና ቤዔኬታ» ያጊስ።

24

ዩሱሲ ዎሳ ኬሳይ ላሌታናይሳ ካሴቲዲ አዲስ
(ማር 13:1-2፤ ሉቃ 21:5-6)

1 ዩሱሲ ዎሳ ኬሳፌ ኬዩዲ ቢሺን፥ ኢያ ታማሬቲ ኢያኮ ዩዲ፥ ማላሌቲዲ ዎሳ ኬሳ ጊምቢያ ቤሲዶሶና። 2 ዩሱሲ ኤንታኮ ዛሪዲ፥ «ኤ! ሃይሳ ኡባ ቤዔቲ? ታኒ ሂንቴው ቱማ አዳይስ፤ ሹቹ ሹቹ ቦላ ጊምቤቲዳ ማላ ላሌቶና አቴና» ያጊስ።

23:27 ሃ.አ 23:3 23:33 ግብግ 3:7፤ 12:34፤ ሉቃ 3:7 23:35 ሜዴ
4:8፤ 2ታሪ 24:20 23:38 ኤር 22:5 23:39 ግዝ 118:26

ሲንሳፌ ሃናናባታ

(ማር 13:3-13፤ ሉቃ 21:7-19)

³ ዮሱሲ ሻማዎ ዴሪያ ቦላ ኡቲዳሺን፥ ኢያ ታማሬቲ ባንታርካ ኢያኮ ዩዲ፥ «ሄሲ አወዴ ሃናኔኮ ኑስ አዳ፥ ቃሲ ኔ ዩሳሲኔ ዎዲያ ወርሴላስ ማላታይ አይቤ?» ያጊዲ አይቺዶሶና።

⁴ ዮሱሲ ዛሪዲ፥ «ሂንቴና አኒካ ባሌሶና ሜላ ናጌቲቴ! ⁵ አይስ ጊኮ፥ ዳሮ አሳቲ ታ ሱንሳን፥ <ታኒ ኪሪስቶሳ፥ ያሳይ አሳ አሻናው ኪቲዳይሳ> ያጊሼ ዩዲ ዳሮ አሳ ባሌሳና። ⁶ ማታን ዴዲያ አላ ጊርሳ፥ ሃሆን ዴዲያ አላ ዎሬ ሲዓናው ዴዴታ፥ ሄሳ ሜላባይ ሃናናው ቤሲያ ጊሾ ሂርጎሬቴ። ሺን ወርሴላይ ቡሮና። ⁷ ዴሬይ ዴሪያሬ፥ ኢሲ ካዎቴሳይ ሃራ ካዎቴሳራ አሌታና፥ ኮሻይኔ ቢታ ቃይዶ ኡባ ቤሳን ሃናና። ⁸ ሄሲ ኡባይ ዩሎ ኢቄሳስ ዞኔ ሜላ።

⁹ «ሄ ዎዴ አሳይ ሂንቴና ዋዩስ አሲ ኢማና፥ ቃቻናኔ ዎዳና፥ ታ ሱንሳ ጊሾ አሳ ኡባይ ሂንቴና ኢፃና። ¹⁰ ሄ ዎዴ ዳሮቲ አማኖ አጋና፥ ባንታ ጊዶን ኢሶይ ኢሱዋ አሲዲ ኢማና፥ ኢሶይ ኢሱዋ ኢፃና። ¹¹ ቃሲ ዳሮ ዎርዶ ናቤቲ ዴንዲዲ ዳሮታ ባሌሳና። ¹² ጌላቴሲ ዳሪያ ጊሾ ዳሮ አሳ ሲቆይ ኢርፃና። ¹³ ሺን ወርሴሲ ጋካናው ጌንጫያ ኡራይ አታና። ¹⁴ አሳ ኡባስ ማርካ ጊዳና ሜላ ያሳ ካዎቴሳ ዎንጌላይ ቢታ ኡባን አዴታና፥ ሄሳፌ ጉዩ፥ ወርሴላይ ያና።

ቴና ባሻ

(ማር 13:14-23፤ ሉቃ 21:20-24)

¹⁵ «ሄሳ ጊሾ፥ ናቢያ ዳኔሊ አዲዳ ባሻ ቴናቴሳይ ጌሻ ቤሳን ኤቲዳይሳ ሂንቴ ቤዓና። (አኬኪሶ፥ ሄሲ ዎይ ጉሴኮ ናባቤይሲ አኬኮ!) ¹⁶ ሄ ዎዴ ዩሁዳ ቢታን ዴዴይሳቲ ዴሪያኮ ባቃቶ። ¹⁷ ኪሳ ሁዔን ዴዲያ ኡራይ ባ ሶን ዴዲያባ ኤካናው ሶ ጌሎና ባቃቶ። ¹⁸ ጋዴን ዴዴይሲ ባ ማዑዋ ኤካናው ጉዩ ሲሞሮ። ¹⁹ ሄ ዎዴ ቃንሳ ማጫሳታሲኔ ዳንሲያ ማጫሳታስ ዳሮ ኡንዓ ጊዳና። ²⁰ ባልጎን ዎይኮ ሳምባታን ሂንቴ ባቃቶይ ጊዶና ሜላ ያሳ ዎሲቴ። ²¹ አይስ ጊኮ፥ ሳዲ ሜዴቶሳፔ ሃቺ ጋካናው ሃናናባይ፥ ቃሲ ሲንሳፌካ ሱባራካ ሃናና ዋዩይ ሄ ዎዴ ሃናና። ²² ያሳይ ሄ ጋላሳታ ታይቡዋ ጉሶናኮ አሴ ጊዲዳ አኒካ አቴና። ሺን ኢ ባ ዶሪዳ አሳታ ጊሾ ሄ ጋላሳታ ታይቡዋ ጉሳና።

²³ «ሄ ዎዴ አኒካ ሂንቴና፥ <ሄኮ፥ ኪሪስቶሲ ሃይሳን> ዎይኮ <ሂንን ዴዴስ> ያጊኮ አማኖ። ²⁴ አይስ ጊኮ፥ ዎርዶ

24:9 ማቶ 10:22 24:13 ማቶ 10:22 24:15 ዛሬ 9:27፤ 11:31፤ 12:11
24:17 ሉቃ 17:31 24:21 ሜዴ 12:1፤ ዮቆ 7:14

ኪሪስቶስ ተኔ ዎርዶ ናቤቲ ዴንዳና። ኤንታው ዳንዳዔቲኮ፥ ሃሪ አቶሺን ያሳይ ዶሪዳይሳታካ ባሌሳናው ጊታ ማላታታኔ ማላሊሲያባታ አሳና። 25 አኬኪቱ፥ ታኒ ሂንቴው ሃይሳ ካሴታዳ አዳስ።

26 «ሄሳ ጊሾ፥ አሳይ ሂንቴኮ፥ <ሄኮ፥ ኪሪስቶሲ ባዞን ዴዔስ> ጊኮ፥ ያ ቦፒቱ። ዎይኮ ሂንቴኮ፥ <ሄኮ፥ ቆልዓን ዴዔስ> ጊኮ፥ ኤንታባ አማኖፒቱ። 27 አይስ ጊኮ፥ ዎልዓንፊ ሳሎን ዎልዓሚዲ፥ ዶሎሃፕ ዉሎሃ ጋካናው ቤንቴይሳዳ፥ አሳ ናዓ ዩሳይ ሄሳዳ ሃናና።

28 «ባዉቲ ዴዒይሶን አንኮቲ ሺቃና።

ኪሪስቶሲ ናምዓንሶ ያና
(ማር 13:24-27፤ ሉቃ 21:25-28)

29 «ሄ ዎዴ ሄ ዋዬ ጋላሳታፕ ጉዬ፥ ሶሁዋራ አዋይ ዱማና፥

አጌናይ ባ ፖዑዋ ዲጋና።

ያሊንቶቲ ሳሎፕ ዎዳና፥

ቃሲ ሳሎን ዴዒያ ዎልቃቲ ቡቄታና።

30 ሄ ዎዴ አሳ ናዓ ዩሳ ማላይ ሳሉዋ ቦላ ቤንታና። ሳዓን ዴዒያ አሲ ኡባይ ዩካና። ቃሲ አሳ ናዓይ፥ ዎልቃራኔ ጊታ ቦንቹዋራ ሳሉዋ ሻራ ጊዶራ ዩሺን ኤንቲ ቤዓና። 31 ኢ ባ ኪታንቾታ ጊታ ፑኒያ ዋይዜራ ኪታና። ኤንቲ ሳዓ አይዱ ባጋ ቤዲ፥ ሃ ጋዋፕ ያ ጋዓ ጋካናው ዴዒያ ኢያው ዶሬቲዳይሳታ ሺሻና።

ጎዳይ ያና ጋላሳ ማላታ
(ማር 13:28-31፤ ሉቃ 21:29-33)

32 «ባላሴ ሚሳፌ ታማሪቱ። ኢ አጪዲ ሃይዒያ ዎዴ ቶርቹይ ማታቲዳይሳ ሂንቴ ኤሬታ። 33 ሄሳዳካ፥ ሂንቴ ሃ ኡባባ ቤዒያ ዎዴ ዩሱሲ ማቲዲ ፔንጊን ዴዔይሳ ኤሪቱ። 34 ታኒ ሂንቴው ቱማ አዳይስ፤ ሃ ኡባባይ ፖሌታና ጋካናው፥ ሃ ዩሌቴሳይ አዴና። 35 ሳሎይኔ ሳዓይ አዳና፥ ሺን ታ ቃላይ ኡባካ አዴና።

ጎዳይ ያና ጋላሳ አኒካ ኤሬና
(ማር 13:32-37፤ ሉቃ 17:26-30፤ 34-36)

36 «ሄ ጋላሳኔ ሄ ሳቲያ ሳሎን ዴዒያ ታ አዋፕ አቲን ሃሪ ሳሎ ኪታንቾታ ጊዲን ዎይኮ ናዓ ጊዲን አኒካ ኤሬና። 37 አሳ ናዓ ዩሳይ፥ ኖሄ ዎዴ ሃኒዳይሳ ሜላ ጊዳና። 38 ሄ ዎዴ ዳዮ ሃሳይ ያናፕ ሲንፊ ኖሄይ ማርካቢያን ጌሊዳ ጋላሳ ጋካናው፥ አሳይ

24:26 ሉቃ 17:23-24 24:28 ሉቃ 17:37 24:29 ኢሳ 13:10፤ ኤር 2:10
24:30 ዛሬ 7:13፤ ዛክ 12:10 24:37 ሜዴ 6:5

ሚሼኔ ኡዱሼ፥ ኤኪሼኔ ጌሊሼ ጋምዒስ።³⁹ ባሻ ሃሳይ ዱዲ፥ ኤንታ ኡባ ዳይሳና ጋካናው አኬኪቦኮና። አሳ ናዓ ዩሳይካ ሄሳዳ ሃናና።

⁴⁰ «ሄ ዎዴ ናምዑ አሳቲ ጋዴን አሳና። ኤንታፌ ኢሶይ ኤኬታና፥ ሃንኮይ አታና።⁴¹ ናምዑ ማጫሳቲ ኢሲፌ ጋጫና። ኤንታፌ ኢሲኒያ ኤኬታና ሃንኪያ አታና።

⁴² «ሂዛ፥ ሂንቴ ጎዳይ አይ ጋላስ ያኔኮ ሂንቴ ኤሮና ጊሾ ሚኒዲ ናጊቴ።⁴³ ሺን ካይሶይ ቃማፌ አይ ሳቴን ያኔኮ ኬሳዋይ ኤሪያኮ፥ ባ ኬሳይ ቦኬቶና ሜላ ባርኪዲ ናጋናሺን።⁴⁴ ሄሳዳካ፥ አሳ ናዓይ ሂንቴ ቆፖና ሳቴን ያና ጊሾ ሂንቴካ ጊጊዲ ዴዒቴ።

ኢታኔ ሎዎ አይሌታ ሌሚሶ
(ሉቃ 12:41-48)

⁴⁵ «ያቲን፥ ባ ሶ አሳስ ካሳ ኮሺያ ዎዲያን ኢማና ሜላ ኢያ ጎዳይ ዶሪዳ አማንፎይሲኔ ዎዛናማ አይሌይ አኔ? ⁴⁶ ኢ ባ ጎዳይ ኪቲዳይሳ አሲሺን ኢያ ጎዳይ ዱዲ ዴሚያ አይሌይ አንጄቲዳይሳ።⁴⁷ ታኒ ሂንቴው ቱማ አዳይስ፤ ጎዳይ ሄ አይሊያ ባባ ኡባ ቦላ ሹማና።⁴⁸ ሺን ሄ አይሌይ ኢታ ጊዲኮ፥ <ታ ጎዳይ ጋምዒዲ ያና> ያጊዲ ባ ዎዛናን ቆፐዲ፥⁴⁹ ባ ላጌ አሳንቾታ ዋዶ ዶሚኮ፥ ማሶቴይሳታራ ሚኮኔ ኡዱኮ፥⁵⁰ ሄ አይሊያ ጎዳይ ኢ ቆፖና ጋላሲኔ ኢ ኤሮና ሳቴን፥⁵¹ ዱዲ ኢያ ቃንዬሬሳና። ኢያ ቃዳ ጩቦታራ አሳና፥ ሄ ቤሳን ኢያው ዩሆኔ አቼ ጋርጩሳ ጊዳና።

25

ታሙ ጌላዎታ ሌሚሶ

¹ «ሄ ዎዴ ሳሎ ካዎቴሳይ ባንታ ኩራዚያ አይኪዲ፥ ማቾ ኤሃናው ቢዳ አዲያ ሞካናው ኬዱዳ ታሙ ጌላዎታ ዳኔስ።
² ኤንታፌ ኢቻሻቲ ኤያ፥ ቃሲ ኢቻሻቲ ጨንጫ።³ ኤያቲ ኩራዜ አይኪዶሶና፥ ሺን ሃራ ላምባ አይኪቦኮና።⁴ ሺን ጨንጫቲ ባንታ ኩራዚያኔ ሃራ ጉዣ ላምባ አይኪዶሶና።⁵ ማቸው ኤኬይሲ ጋምዒን፥ ሄ ጌላዎቲ ባንታና ዲስኮይ አይኪን ዲስኪዶሶና።
⁶ «ጊዲ ቢላሄ ጊዲያ ዎዴ <ሄኮ፥ ማቸው ኤሄይሲ ጋኪስ፥ ኢያ ሞካናው ኬዱቴ> ያጊያ ጊታ ጫቦይ ሲዔቲስ።
⁷ «ሄ ዎዴ ሄ ጌላዎቲ ኡባይ ባርኪዲ፥ ባንታ ኩራዚያ ጊጊሲዶሶና።⁸ ኤያቲ ጨንጫታኮ፥ <ኮ ኩራዜይ ቶዓና ሃኒያ ጊሾ ሂንቴ ላምባፌ ኑስ ኢሜርኬቲ> ያጊዶሶና።

9 «ሺን ጨንጫቲ ኤንታኮ ዛሪዲ፥ ለካይ፥ ኑሲኔ ሂንቴስ ጊዲያ ላምቢ ባዋ፥ ሄሳ ጊሾ፥ ሂንቴው ቢዲ ሻሚዲ ኤኪቴ» ያጊዶሶና።
 10 ኤያ ጌላዎቲ ላምባ ሻማናው ቢን፥ ማቺው ኤኬይሲ ፑቱ ጊስ። ጊጌቲ ኡቲዳ ኢቻሹ ጌላዎቲ ኢያራ ኢሲፌ ያጋኖ ኬላ ጌሊዶሶና፤ ካሪይካ ጎርዴቲ አጊስ።

11 «ጉዩፔ ሃንኮ ጌላዎቲ ዩዲ፥ ጎዳው፥ ጎዳው፥ ኑስ ዶያርኪ» ያጊዶሶና።

12 «ሺን ኢ ኤንታኮ ዛሪዲ፥ ስታኒ ሂንቴው ቱማ አዳይስ፤ ታ ሂንቴና ኤሪኬ!»

13 «ሂዛ፥ አሳ ናዓይ ያና ጋላሳ ዎይኮ ሳቲያ ሂንቴ ኤርና ጊሾ ባርኪዲ ናጊቴ።

ሄሹ አሳንቾታ ሌሚሶ
 (ሉቃ 19:11-27)

14 «ዶሳ ካዎቱሳይ ባ አሳንቾታ ዩጊዲ ባው ዴዲያባ ኤንታው ሹዲዲ አጌ ባናው ኬዩዳ ኡራ ዳኔስ። 15 ኤንታው ሁዔን ሁዔን ኤንታ ዎልቃ ሜላ ኢሱዋስ ኢቻሹ ካርጊቴ ቢራ፥ ኢሱዋስ ናምዑ ካርጊቴ ቢራ ቃሲ ኢሱዋስ ኢሲ ካርጊቴ ቢራ ኢሚዲ ባ አጊያ ቢስ። 16 ኢቻሹ ካርጊቴ ቢራ ኤኪዳ አይሌይ ሶሁዋራ ቢዲ ዛልዲዲ፥ ሃራ ኢቻሹ ካርጊቴ ቢራ ዎዲሲስ። 17 ሄሳዳካ፥ ቃሲ ናምዑ ካርጊቴ ቢራ ኤኪዳ አይሌይ ሃራ ናምዑ ካርጊቴ ቢራ ዎዲሲስ። 18 ሺን ኢሲ ካርጊቴ ቢራ ኤኪዳይሲ ቢዲ፥ አላ ቦኪዲ፥ ባ ጎዳ ሚሺያ ሞጊስ።

19 «ዳሮ ዎዴፔ ጉዩ ሄ አይሌታ ጎዳይ ዩዲ፥ ባ ሚሺያ ኤንታራ ሳላዲስ። 20 ኢቻሹ ካርጊቴ ቢራ ኤኪዳ አይሌይ ዩዲ፥ ሃራ ኢቻሹ ካርጊቴ ቢራ ኤሂዲ፥ ስታ ጎዳው፥ ኔኒ ታው ኢቻሹ ካርጊቴ ቢራ ኢማዳሳ። ሺን ታኒ ሃራ ኢቻሹ ካርጊቴ ቢራ ዎዲሳስ» ያጊስ። 21 ኢያ ጎዳይ፥ ለምቦይ! ኔኒ ሎዶኔ አማንሲያ አይሌ፤ ኔኒ ጉሳባን አማኔታዳሳ። ታኒ ኔና ዳሮባ ቦላ ሹማና፤ ሃ ጌላዳ ኔ ጎዳራ ኡፋይታ» ያጊስ።

22 «ቃሲ ናምዑ ካርጊቴ ቢራ ኤኪዳይሲ ዩዲ፥ ስታ ጎዳው፥ ኔኒ ታው ናምዑ ካርጊቴ ቢራ ኢማዳሳ። ሺን ታኒ ሃራ ናምዑ ካርጊቴ ቢራ ዎዲሳስ» ያጊስ። 23 ኢያ ጎዳይ፥ ለምቦይ! ኔኒ ሎዶኔ አማንሲያ አይሌ፤ ኔኒ ጉሳባን አማኔታዳሳ። ታኒ ኔና ዳሮባ ቦላ ሹማና፤ ሃ ጌላዳ ኔ ጎዳራ ኡፋይታ» ያጊስ።

24 «ቃሲ ኢሲ ካርጊቴ ቢራ ኤኪዳይሲ ዩዲ፥ ስታ ጎዳው፥ ኔኒ ዜርና ቤሳፌ ጫኬይሳኔ ዳርጮና ቤሳፌ ማጊያ ኢታ አሲ ጊዴይሳ

25:14 ሉቃ 19:11-27

ታኒ ኤራይስ። 25 ሄሳ ጊሾ፥ ያያዳ ኔ ቢራ ቢታን ሞጋስ። ኔ ሚሼይ ሃይሲሽ) ያጊስ።

26 «ኢያ ጎዳይ ዛሪዲ፥ <ሃ ኢታ አዛላ አይሊያው፥ ታኒ ዜሮና ቤሳፌ ጫኬይሳኔ ዳርጮና ቤሳፌ ማዲያ አሲ ጊዴይሳ ኤራዳሳ።

27 ያቲን፥ ኔኒ ታ ሚሺያ ባንኬን ዎሲዳባ ጊዲያኮ፥ ታኒ ሲሚያ ዎዴ ታ ሚሺያ ዎዴራ ኤካናይሳ ዲጋዳሳ። 28 ሄሳ ጊሾ፥ ሚሺያ

ኢያፕ ኤኪዲ፥ ታሙ ካርጊቴ ቢሪ ዴዴይሳስ ኢሚቴ። 29 አይስ ጊኮ፥ ዴዲያ ኡባስ ጉገቴታና ኔ ዳራና። ሺን ባይናይሳፌ ሃሪ አቶሺን፥ ሄ ኢያው ዴዲያ ጉሲያካ ኤኬታና። 30 ሃ ማዶና

አይሊያ ካሪ ዱማ ኬሲ ዩጊቴ። ያን ኢያው ዩሆኔ አቼ ጋርጮሲ ጊዳና) ያጊስ።

ዎዲያ ወርሴሳን ሃናና ፐርዳ

31 «አሳ ናዓይ፥ ኪታንቾ ኡባታራ፥ ባ ቦንቹዋራ ያ ዎዴ ኢ ባ ቦንቾ ካዎታ አራታ ቦላ ኡታና። 32 ቢታን ዴዲያ አሲ ኡባይ

ኢያ ሲንፌ ሺቃና። ሄንሳንቾይ ዶርሳታ ዴሻታፕ ሻኬይሳዳ ኢ ሄ አሳ ናሞግን ሻካና። 33 ቃሲ ዶርሳታ ኡሻቻ ባጋራ ዴሻታ ሃዲርሳ ባጋራ ኤሳና።

34 «ሄሳፌ ጉዩ፥ ካዎይ ኡሻቻ ባጋራ ዴዴይሳታኮ ሃይሳዳ ያጋና፥ <ታ አዋይ አንጂዳይሳቶ፥ ሃ ዩዲ ሳዓይ ሜዴቲያ ዎዴ ሂንቴው ጊጊዳ ካዎቴሳ ሳቲቴ። 35 አይስ ጊኮ፥ ታኒ ኮሻቲን

ሙዚዴታ፥ ሳሞቲን ኡሺዴታ፥ ኤሬቶና ኢማሳ አሲ ጊዳዳ ቢን ሞኪዴታ፥ 36 ካሎቲን ማይዚዴታ፥ ሃርጌቲን ሃርጊሲዴታ፥ ቃሼቲን ታና አይቺዴታ) ያጋና።

37 «ሄሳፌ ጉዩ፥ ጊሎቲ ዛሪዲ፥ <ሳዳው፥ ኔኒ ኮሻቲን አወዴ ቤዲዲ ሙዚዶ? ዎይኮ ኔኒ ሳሞቲን አወዴ ቤዲዲ ኡሺዶ? 38 ኔኒ

ኢማፌ ጊዳዳ ዩን አወዴ ቤዲዲ ሞኪዶ? ዎይኮ ኔኒ ካሎቲን አወዴ ማይዚዶ? 39 ኔኒ ሃርጊን ዎይኮ ቃሼቲን ኔኮ ቢዲ ኔና አወዴ አይቺዶ? ያጋና። 40 ካዎይ ዛሪዲ፥ <ታኒ ሂንቴው ቱማ

አዳይስ፤ ሂንቴ ታና ካሊያ ሃ ኡባፌ ጉዩይሳስ አሲዳይሳ ታው አሲዴታ) ያጋና።

41 «ሄ ዎዴ ሃዲርሳ ባጋራ ዴዴይሳታኮ፥ <ሃ ቃንጌቲዳይሳቶ፥ ታ ማታፕ ሃኪቴ። ፃላሄሲኔ ኢያ ኪታንቾታስ ጊጊዳ ሜሪና ታማን ቢቴ። 42 አይስ ጊኮ፥ ኮሻቲን ታና ሙዚቤኬታ፤ ሳሞቲን

ኡሺቤኬታ፥ 43 ታኒ ኢማፌ ጊዳዳ ቢን ታና ሞኪቤኬታ፥ ካሎቲን ማይዚቤኬታ፥ ሃርጊኒኔ ቃሼቲን ታና አይቺቤኬታ) ያጋና።

25:29 ማቶ 13:12፤ ማር 4:25፤ ሉቃ 8:18 25:30 ማቶ 8:12፤ 22:13፤ ሉቃ 13:28 25:31 ማቶ 16:27፤ ማቶ 19:28

44 «ሄ ዎዴ ኤንቲ፥ <ጎዳው፥ ኔኒ ኮሻቲን ዎይኮ ሳሞቲን ዎይኮ ኢማሴ ጊዳዳ ቢን ዎይኮ ካሎቲን ዎይኮ ሃርጊን ዎይኮ ቃሼቲን ቤዒዲ ኔና አወዴ ማዶና ኢዲዶ?» ያጊዲ ዛራና።

45 «ሄ ዎዴ ካዎይ ዛሪዲ ኤንታኮ፥ <ታኒ ሂንቴው ቱማ አዳይስ፤ ሂንቴ ታና ካሊያ ሃ ኡባፌ ጉዲይሳ ማዶና ኢዲዳይሲ፥ ታና ማዶና ኢዲዳይሳ» ያጋና። 46 ሄሳ ጊሾ፥ ሄ አሳቲ ሜሪና ፒርዳስ ቃሲ ዒሎቲ ሜሪና ዴዑሞስ ባና» ያጊስ።

26

ዮሱሳ ቦላ ማቁቲዶሶና

(ማር 14:1-2፤ ሉቃ 22:1-2፤ ዮሃ 11:45-53)

1 ዮሱሲ ሃ ቲሚርቲያ ኡባ ወርሲዳ ዎዴ ባ ታማሬታኮ፥
2 «ናምዑ ጋላሳፔ ጉዩ፥ ፓሲካ ባሌ ቦንቺያ ጋላስ ጊዴይሳ ኤሬታ። ሄ ጋላስ አሳ ናዓይ ማስቃሊያ ቦላ ካቁታናው አሳ ኩሼን አዲ ኢሜታና» ያጊስ።

3 ሄ ዎዴ ካሂኔ ሃላቃቲኔ ጪማቲ፥ ቃያፋ ጊያ ካሂኔ ሃላቃ ኬላን ሺቂዲ፥ 4 አሲ ኤሮና ዮሱሳ አይኪዲ፥ ዎዳናው ማቁቲዶሶና።
5 ሺን ኤንቲ፥ «አሳይ አሺ ኬሶና ሜላ ጊዲ፥ ፓሲካ ቦንቺያ ጋላስ ሄሳ አሶኮ» ያጊዶሶና።

ኢሲ ማጫሲያ ዮሱሳ ሺቶ ቲያሱ

(ማር 14:3-9፤ ዮሃ 12:1-8)

6 ዮሱሲ ቢታኒያ ካታማን ባሮ ሃርጊዳ ሲሞና ሶን ዴዔስ።
7 ዮሱሲ ኢማቱሞ ቦላ ዴዒሺን ኢሲ ማጫሲያ አልባስዒሮሴ ጲልቃዒ ኩሜላ ዳሮ አልዎ ሺቶ ኤካ ያዳ ዮሱሳ ሁዔን ቲጋሱ።

8 ሺን ዮሱሳ ታማሬቲ ሄሳ ቤዒዲ ሃንቁቲዲ፥ «ሃ ሺቶይ ጮ ኢቴይ አይቢሴ? 9 ሃ ሺቶይ አልዎ ጋቴን ባይዜቲዲ፥ ሚሺይ ማንቆታስ ኢሜታናው ዳንዳዔቴስ» ያጊዶሶና።

10 ዮሱሲ ኤንቲ ጌይሳ ኤሪዲ፥ ኤንታኮ፥ «ሃ ማጫሲው አይስ ዋይሴቲ? ኢያ ታው ሎዎባ አሳሱ። 11 ማንቆቲ ኡባ ዎዴ ሂንቴራ ዳና። ሺን ታኒ ሂንቴራ ኡባ ዎዴ ዴዒኬ። 12 ኢያ ሃ ሺቱሞ ታ ቦላ ቲጊዳይሲ ታና ሞጋናው ጊጊሳናሳ። 13 ታኒ ሂንቴው ቱማ አዳይስ፤ ቢታ ኡባን ሃ ዎንጌላይ ሳባኬቲያ ቤሳን አወንካ፥ አሳይ ኢዮ ሃሳያና ሜላ ኢያ አሲዳይሲ አዴታና» ያጊስ።

ዩሁዲ ዮሱሳ አሲዲ ኢማናው ጊጌቲስ

(ማር 14:10-11፤ ሉቃ 22:3-6)

14 ሄ ዎዴ ታማኔ ናምዑ ዩሱሳ ታማሬታፔ ኢሶይ፥ አስቆሮታ ዩሁዳ ጌቴቴይሲ ካሂኔ ሃላቃታኮ፥ 15 ቢዲ፥ «ታኒ ሂንቴው ዩሱሳ አሳ ኢሚኮ፥ ሂንቴ ታው አይ ኢሚኔ?» ያጊዲ ኤንታ አይቺስ፥ ኤንቲ ዞሬቴዲ ሃስታሙ ቢራ ሳንቲሜ *† ኢሚዶሶና፥ 16 ሄሳፌ ጉዩ፥ ዩሁዲ ዩሱሳ አሲዲ ኢማናው ኢንጄቲያ ዎዴ ዎቼስ።

ዩሱሲ ፓሲካ ካሁዋ ባ ሃዋሬታራ ሚስ
(ማር 14:12-21፤ ሉቃ 22:7-14፤ 21-23፤ ዮሃ 13:21-30)

17 ኡይሳ ባሌ ቦንቺያ ኮይሮ ጋላስ፥ ዩሱሳ ታማሬቲ ኢያኮ ዩዲ፥ «ፓሲካ ቦንቺያ ጋላስ ኔኒ ማና ካሲ ኑኒ አውን ጊጊሲኖ?» ያጊዶሶና።

18 ዩሱሲ ኤንታኮ፥ «ካታማን ደዒያ አዲያኮ ቢዲ፥ አስታማሬይ፥ ታው ዎዴይ ጋኪዳ ጊሾ ታ ታማሬታራ ፓሲካ ቦንቺያ ጋላሳ ኔ ሶን አሳና ያጊስ» ያጊቴ። ያጊስ።

19 ኢያ ታማሬቲ ዩሱሲ ባንታና ኪቴዳይሳዳ አሲዲ፥ ፓሲካ ባሌ ጋላስ ማና ካሳ ጊጊሲዶሶና።

20 ሳዓይ አማርሲያ ዎዴ ዩሱሲ ታማኔ ናምዑ ሃዋሬታራ ካሲ ማናው ኡቲስ፥ 21 ኤንቲ ሚሺን፥ ዩሱሲ ኤንታኮ፥ «ታኒ ሂንቴው ቱማ አዳይስ፤ ሂንቴፌ ኢሲ ኡራይ ታና አሲዲ ኢማና» ያጊስ።

22 ኤንቲ ዳሮ ዳጋሚዲ፥ ሁዔን ሁዔን፥ «ጎዳው፥ ቱማ ታኔሻ?» ጊዲ ኢያ አይቺዶሶና።

23 ዩሱሲ ዛሪዲ፥ «ባ ኩሺያ ታራ ኢሲፌ ሻቲያን ዩዴይሲ ኢ ታና አሲዲ ኢማና። 24 አሳ ናዓይ፥ ያሳ ቃላን ኢያው ሃፌቴዳይሳዳ ሃይቃና፥ ሺን አሳ ናዓ አሲዲ ኢሚያ ኡራ አዩ፤ ሄ ኡራይ ዩሱቶና አቲዳኮ ኢያው ሎዎሺን» ያጊስ።

25 ኢያ አሲ ኢማናው ደዒያ ዩሁዲ ዛሪዲ፥ «አስታማሬያው፥ ኔኒ ጌይ ታኔዩ?» ያጊስ።

ዩሱሲ ዛሪዲ፥ «ኔኒ ኔ ሁዔን ጋዳሳ» ያጊስ።

ጎዳ ካሁዋ

(ማር 14:22-26፤ ሉቃ 22:15-20፤ 1ቆሮ 11:23-25)

26 ኤንቲ ሚሺን፥ ዩሱሲ ኡይሳ ኤኪዲ ያሳ ጋላቲስ። ሄ ኡይሳ ሜንሲዲ ባ ታማሬታስ ኢሚዲ፥ «ሄዒቴ፥ ሚቴ፥ ሃይሲ ታ አሹዋ» ያጊስ።

27 ፁዓ ኤኪዲ፥ ያሳ ጋላቲስ። ኤንታው ኢሚዲ፥ «ኡባይ ሃይሳፌ ኡዩቴ። 28 ሃይሲ ዳሮ አሳ ናጋራይ አቶ ጌቴታና ሜላ

26:15 ዛካ 11:12 * 26:15 ቢራ ሳንቲሜ፡ አይኮይካ ጉገቴቦና ገሻ ቢራ ጉሱ።
† 26:15 ሃስታሙ ቢራ ሳንቲሜ፡ ሃስታሙ ቢራ ሳንቲሜይ ኢስራዔል ቢታን አይሌይ ሻሜቲያኔ ባይዜቲያ ጋቴ። 26:23 ማዝ 41:9

ጉዚያ ታ ሱሳ። ሃ ሱሳይ ያሳይ ሂንቴራ ጌሊያ ጫቁዋ ሚንሴይሳ።
29 ሺን ታኒ ሂንቴው አዳይስ፤ ታኒ ታ አዋ ካዎቴሳን አራሳ ዎይኔ ኡሻ ሂንቴራ ኡያና ጋሳ ጋካናው ናምዓንሳ ሃ ዎይኔ ኡሻ ኡዩኬ» ያጊስ።

30 ጋላታ ማዝሙሬ ዩዲዳይሳፌ ጉዩ ሻማሆ ዴሪያ ቢዶሶና።

ዮሱሲ ጴጊሮሲ ካዳናይሳ ኮይሮቲዲ አዲስ
(ማር 14:27-31፤ ሉቃ 22:31-34፤ ዮሃ 13:36-38)

31 ሄ ዎዴ ዮሱሲ ኤንታኮ፣
« (ያሳይ ሄንሳንቹዋ ሾጫና ዶርሳቲካ ላሌታና)
ጌቲቲዲ ያሳ ቃላን ጻፌቲዳይሳ ሜላ ሃቺ ቃማ ሂንቴ ኡባይ ታና አጊዲ ባቃታና። 32 ሺን ታኒ ሃይቆፔ ዴንዲዳፔ ጉዩ ሂንቴፌ ሲንሳታዳ ጋሊላ ባና» ያጊስ።

33 ጴጊሮሲ ዛሪዲ፣ «ኤንቲ ኡባይ ኔና አጊዲ ባቃቲኮካ፣ ታኒ ኔና አጊኬ» ያጊስ።

34 ዮሱሲ ጴጊሮሳኮ፣ «ታኒ ኔው ቱማ አዳይስ፤ ሃቺ ቃማ ኩቶይ ዋሳናፔ ሲንሴ ኔኒ ታና ሄዙ ቶሆ ካዳና» ያጊስ።

35 ጴጊሮሲ ዛሪዲ፣ «ታኒ ኔራ ኢሲፌ ሃይቆፔ አቲን ኔና ኡባካ ካዲኬ» ያጊስ።

ሃንኮ ኢያ ታማሬቲ ኡባይካ ሄሳዳ ጊዶሶና።

ዮሱሲ ጌቴሴማኔን ዎሲስ
(ማር 14:32-42፤ ሉቃ 22:39-46)

36 ያቲዲ፣ ዮሱሲ ባ ታማሬታራ ጌቴሴማኔ ጊያ ቤሳ ቢዲ፣ ኤንታኮ፣ «ታኒ ሂኒ ባዳ ያሳ ዎሳሻና፣ ሂንቴ ሃይሳን ኡቲቱ» ያጊስ። 37 ጴጊሮሳኔ ዛብዲዮሳ ናይታ ናምዓታ ባራ ኤኪ ቢዲ ዳሮ አዛኖኔ ኡንዔቴሲ ዶሚስ። 38 ቃሲካ ኤንታኮ፣ «ታኒ ሃይቆስ ጋሊያ ኡንዓ ኡንዔታስ። ሃይሳን ታራ ጋምዒቴኔ ሚኒዲ ናጊቴ» ያጊስ።

39 ጉሲ ሲንሴ ቢዲ ቢታን ጉፋኒዲ፣ «ታ አዋው፣ ዳንዳዔቲያባ ጊዲኮ ሃ ዋዩ ፀዓ ታፔ ዲጋ። ሺን ኔ ሼኔይ ሃኖፔ አቲን ታ ሼኔይ ሃኖፖ» ያጊዲ ያሳ ዎሲስ።

40 ዮሱሲ ባ ታማሬታኮ ሲሚ ዩዲ ኤንቲ ጴስኪዳሺን ዴሚስ። ጴጊሮሳኮ፣ «ሂንቴ ኢሲ ሳቴኮኔ ጴስኮና ታራ ሚናናው ዳንዳዒቤኬቲ? 41 ፓጩን ሂንቴ ጌሎና ሜላ ባርኪዲ ናጊቴኔ ያሳ ዎሲቴ። ሂንቴው ሎዎ አዋይ ዴዔስ፣ ሺን ሂንቴ ዳቡራንቾ አሲ» ያጊስ።

42 ዮሱሲ ቃሲ ናምዓንን ሲዲ፥ «ታ አዋው፥ ታኒ ሃ ዋዩ ፀግፍ ኡዮና ዴዲሼ አዳናው ዳንዳዔቶናባ ጊዲኮ ኔ ሼኔይ ሃኖ» ያጊዲ ያሳ ዎሲስ። 43 ቃሲካ ሲሚ ያ ዎዴ ኢያ ታማሬታ አይፊያ ዲስኮይ ጎዚን፥ ዚንዒዳሺን ዴሚስ።

44 ቃሲካ ኡንታ አጊ ቢዲ፥ ካሴ ቃላ ዛሬ ሄቫንን ዎሲስ። 45 ሄሳፌ ጉዮ፥ ባ ታማሬታኮ ዩዲ፥ «ሃዒ ጋካናው ዲስኬቲኔ ሼምፕቴ? ሄኮ፥ አሳ ናዓይ፥ ናጋራንቾታ ኩሼን አዲ ኢሜቲያ ሳቴይ ጋኪስ። 46 ዴንዲዲ ዮዲቴ፥ ታና አሲዲ ኢሜይሲ ሃይሲሽ ጋኪስ» ያጊስ።

ዮሱሲ ባ ሞርኬታን አይኬቲስ

(ማር 14: 43-50፤ ሉቃ 22: 47-53፤ ዮሃ 18: 3-12)

47 ዮሱሲ ቡሮ ሄሳ ሃሳዩሺን፥ ታማኔ ናምቡ ታማሬታፕ ኢሶይ፥ ዩሁዲ ጋኪ ዎዲስ። ካሂኔ ሃላቃቲኔ ዴሪያ ጨማቲ ኪቲዳ ዳሮ አሳቲ ማሼኔ ፃምዓ አይኪዲ ኢያራ ኢሲፌ ዩዩሶና።

48 ዮሱሳ አሲ ኢሚያ ዩሁዲ ሄ ዳሮ አሳኮ፥ «ታኒ ዮሬይሲ ሂንቴ ኮዩይሲ ኢያ፥ ኢያ አይኪቴ» ያጊዲ ማላ ኢሚ ዎሲስ።

49 አራካ ዮሱሳኮ ሺቂዲ፥ «አስታማሪያው፥ ሳሮ ዴዓይ» ያጊዲ ኢያ ዮሪስ።

50 ዮሱሲ ኢያኮ፥ «ታ ላጊያው፥ ኔኒ አሳናባ አሳ አጋ» † ያጊስ።

ሄሳፌ ጉዮ፥ ሺቂዲ፥ ዮሱሳ አይኪዩሶና። 51 ዮሱሳራ ዴዔይሳታፕ ኢሶይ ባ ማሻ ሾዲዲ ካሂኔ ሃላቃ አይሊያ ሾጪዲ፥ ኢያ ሃይሳ ቃንጊዲ ዩጊስ። 52 ሺን ዮሱሲ፥ «ኔ ማሻ ጉዮ ሾሁዋን ዛሬ። አይስ ጊኮ፥ ማሻ ሾዲያ ኡባይ ማሻን ሃይቃና። 53 ታ፥ ታ አዋ ዎሲያኮ ዳሮ ሙኩሉን ታይቤቲያ ኪታንቾታ ዩዳናው ዳንዳዎናባ ኔው ዳኒ? 54 ያቲን፥ ያሳ ቃላን ሄሳዳ ሃናናው ቤሴስ ጌቲቲዳይሲ ዋኒዲ ፖሌታኔ?» ያጊስ።

55 ሄ ሳቲያን፥ ዮሱሲ ሄ ሺቂዳ ዳሮ አሳኮ፥ «ታና ፓንጋ አሲዲ አይካናው ማሼኔ ፃምዓ አይኪዲ ዩዴቲ? ታኒ ያሳ ኬሳን ጋላስ ጋላስ ታማርሳሼ ሂንቴራ ዴዒያ ዎዴ ታና አይኪቤኬታ።

56 ሺን ሃይሲ ኡባይ ሃኒዳይሲ ናቤቲ ያሳ ቃላን ፃፊዳይሲ ፖሌታና ሜላሳ» ያጊስ።

ሄ ዎዴ ኢያ ታማሬቲ ኡባይ ኢያ አጊዲ ባቃቲዩሶና።

ዮሱሲ ፒርዳ ሻንጎ ሲንሴ ሺቂስ

(ማር 14: 53-65፤ ሉቃ 22: 54-55፤ 63-71፤ ዮሃ 18: 13-14፤ 19-24)

† 26:50 ታ ላጊያው፥ ኔኒ አሳናባ አሳ አጋ፡ ዎይኮ ሃራ ቢርሼላይ ታ ላጊያው፥ ኔ ሃይላን አይ አሳይ? 26:55 ሉቃ 19: 47፤ 21: 37

57 ዮሱስ አይኪዳይሳቲ ካሂኔ ሃላቃ ቃያፋኮ ኢያ ኤፊዶሶና። ያን ሂጌ አስታማሬቲኔ ቢታ ጨማቲ ሺቂዲ ዴዎሶና። 58 ሺን ጴጊሮሲ ካሂኔ ሃላቃ ዛባ ጋካናው ሃሆን ኢያ ካሊስ። ኢያ ወርሴሳይ ሻኬታና ጋካናው ዛባ ጌሊዲ ናጌይሳታራ ኡቲስ።

59 ካሂኔ ሃላቃቲኔ ሺቂዳ አሳ ኡባይ ዮሱሳ ዎዳናው ኢያ ቦላ ዎርዶ ማርካ ኮዩዶሶና። 60 ዳሮቲ ዩዲ ኢያ ቦላ ዎርዶ ማርካ ማርካቲዶሶና፤ ሺን አይኮካ ዴሚቦኮና። ጉዩፔ ናምቡ አሳቲ ዩዲ፤ 61 «ሃ ኡራይ፤ <ታኒ ዎሳ ኬሳ ላላዳ ሄኹ ጋሳሳን ዛራ ኬፃናው ዳንዳፃይስ» ያጊስ» ያጊዶሶና።

62 ካሂኔታ ሃላቃይ ዴንዲ ኤቂዲ ዮሱሳኮ፤ «ሃይሳቲ ኔና ሞቲያ ሞቶሞስ ኔኒ ዛሪያባይ ባዌ?» ያጊስ። 63 ሺን ዮሱሲ ሲዲ ጊስ። ቃሲካ ካሂኔ ሃላቃይ፤ «ታኒ ኔና ዴዎ ዎሳ ሱንሳን አይካይስ፤ ኔኒ ዎሳ ናዓ ኪሪስቶሳ ጊዲኮ ኑስ አዳ» ያጊስ።

64 ዮሱሲ ዛሪዲ፤ «ኔኒ ኔ ሁዔንካ ጋዳሳ፤ ሺን ታኒ ሂንቲው አዳይስ፤ ሂዛፔ ጉዩ፤ አሳ ናዓይ ዎልቃማ ዎሳ ኡሻቻ ባጋን ኡቲዳሺን፤ ቃሲ ሳሎ ሻራራ ዩሺን ሂንቲ ቤዓና» ያጊስ።

65 ሄ ዎዴ ካሂኔ ሃላቃይ ዳሮ ዩሎቲዲ ባ ማዑዎ ፔዲዲ፤ «ሃይሳ ቤዒቲ ዎሳ ጫዩስ! ኑና ሃራ ማርካ አይ ኮሺ? ኢ ሃዲ ጫዩዳይሳ ሂንቲ ሲዲ ዴታ። 66 ሂንቲ ቆፋይ አይቤ?» ያጊስ።

ኤንቲካ፤ «ኢያው ሃይቆ ቤሴስ» ያጊዲ ዛሪዶሶና።

67 ያቲን፤ ኤንቲ ኢያ ሶምዎን ጩቲዲ ዴቺዶሶና። ሃራቲ ኢያ ባቂዲ፤ 68 «ኪሪስቶሳ! ኔና ዴቺዳይ አኔ? አኔ ኑስ አዳ» ያጊዶሶና።

ጴጊሮሲ ዮሱሳ ካዲስ

(ማር 14: 66-72፤ ሉቃ 22: 56-62፤ ዮሃ 18: 15-18፤ 25-27)

69 ጴጊሮሲ ዛባን ኡቲዳሺን፤ ኢሲ አይሊያ ኢያኮ ያዳ፤ «ኔኒካ ጋሊላ ዮሱሳራ ኢሲፌ ዴዓሳ» ያጋሱ።

70 ሺን ኢ ኤንታ ኡባ ሲንሳን ሄ አይሌኮ፤ «ኔኒ ጊያባይ አይቤኮ ታኒ ኤሪኬ» ያጊዲ ካዲስ።

71 ቃሲ ቢዲ ዲርሳ ፔንጌኮ ጋኪሺን ሃራ አይሊያ ኢያ ቤዓዳ፤ ያን ዴዲያ አሳኮ፤ «ሃ ኡራይ ናዚሬቲ ዮሱሳራ ዴዔስ» ያጋሱ።

72 ጴጊሮሲ ናምዓንሶ ጫቂዲ፤ «ታኒ ሄ ኡራ ኤሪኬ!» ያጊስ።

73 ጉሱ ጋምዲሺን፤ ያን ኤቂዳ አሳቲ ጴጊሮሳኮ ዩዲ፤ «ኔካ ቱማ ኤንታራ ኢሲፌ ዴዓሳ፤ ኔኒ ኔ ሃሳያን ኤሬታሳ» ያጊዶሶና።

74 ሄሳፌ ጉዩ፤ ጴጊሮሲ፤ «ታኒ ሄ ኡራ ኤሪኬ!» ያጊዲ፤ ባና ቃንጌሲኔ ጫቆ ዶሚስ።

ሄ ዎዴ ኢራካ ኩቶይ ዋሲ አጊስ። ⁷⁵ ዩሱሲ ኢያኮ፣ «ኔኔ ኩቶይ ዋሳናፔ ሲንፅ ታና ሄቩ ቶሆ ካዳና» ጊዳይሳ ጳጊሮሲ አከኪዲ፣ ካሬ ከዬዲ ኢታ ዩሆ ዩኪስ።

27

ዩሆዲ ባና ሱሊስ

(ማር 15:1፤ ሉቃ 23:1-3፤ ዮሃ 18:28-32)

¹ ዎንታ ጉራ ካሂኔ ሃላቃቲኔ ቢታ ጨማቲ ኡባይ ዩሱሳ ዎዲሳናው ማቁቲዶሶና። ² ኤንቲ ዩሱሳ ቃቺ ኤፊዲ ዴሪያ ሃሪያ ጳላዎሳስ አሲዲ ኢሚዶሶና።

³ ሄ ዎዴ ዩሱሳ አይሲዳ ዩሆዲ፣ ጳላዎሲ ዩሱሳ ቦላ ፐርዲዳይሳ ቤዲዲ፣ ቂሮቲዲ፣ ሄ ሃስታሙ ቢራ ሳንቲሚያ ካሂኔ ሃላቃታሲኔ ዴሪያ ጨማታስ ጉዩ ዛሪስ። ⁴ «ታኒ ዊሎ አሲ ሃይቆስ አሳ ኢማዳ ናጋራ አሳስ» ያጊስ።

ሺን ኤንቲ፣ «ሄሲ ኑ ሜቶ ጊዴና ኔ ሜቶ» ያጊዶሶና።

⁵ ዩሆዲ ሚሺያ ዶሳ ከሳን ዩጊ አጊዲ ኤንታ ማታፔ ቢዲ፣ ሱሌቲ ሃይቂስ።

⁶ ካሂኔ ሃላቃቲ ሚሺያ ኤኪዲ፣ «ሃ ሚሺይ ሱሳ ሚሺ ጊዲያ ጊሾ ኑኒ ዶሳ ከሳ ሚሺያራ ጋሴይሲ ዎጋ ጊዴና» ያጊዶሶና።

⁷ ሄሳፌ ጉዩ፣ ኢሲፌ ዞሬቲዲ፣ ቤቴ አሲ ዋጋናው ማና ቢታ ሻሚዶሶና። ⁸ ሄሳ ጊሾ፣ ሄ ጋዴይ ሃቺ ጋካናው ሱሳ ቢታ ጌቴቲ ዊጌቴስ።

⁹ ናቢያ ኤርሚያሲ፣ «ኢስራዔል አሳይ ኢያው ቃንፃናው ጋማቲዳ ሃስታሙ ቢራ ሳንቲሜ ኤኪዶሶና። ¹⁰ ጎዳይ ታና ኪቲዳይሳዳ ማና ቢታ ሻማናው ኢሚዶሶና» ጊዳይሲ ሄ ዎዴ ፖሎቲስ።

ዩሱሲ ጳላዎሳ ሲንፅ

(ማር 15:2-5፤ ሉቃ 23:3-5፤ ዮሃ 18:33-38)

¹¹ ዩሱሲ ዴሪያ ሃሪያ ጳላዎሳ ሲንፅ ሺቂን፣ ጳላዎሲ ኢያኮ፣ «ኔኔ አይሆዴ ካዎ?» ያጊዲ አይቺስ።

ዩሱሲ ዛሪዲ፣ «ኔ ጋዳሳ» ያጊስ።

¹² ካሂኔ ሃላቃቲኔ ቢታ ጨማቲ ኢያ ሞቲያ ዎዴ ኤንታው አይቢ ዛሮካ ኢሚቤና።

¹³ ሄ ዎዴ ጳላዎሲ ዩሱሳኮ፣ «ሃይሳቲ ኔና ሞቲያ ሞቱዋ ኡባ ሲዲኪ?» ያጊስ።

14 ዩሱሲ ሃሪ አቶሺን፣ ኢሲ ቃላካ ዛርና ኢጊን፣ ዴሪያ ሃሪይሲ ዳሮ ማላሌቲስ።

ዩሱሳ በላ ሃይቆ ፐርዴቲስ

(ማር 15: 6-15፤ ሉቃ 23: 13-25፤ ዮሃ 18: 39-40፤ 19: 1-16)

15 ዴሪያ ሃሪይሲ ላይሳን ላይሳን ፓሲካ ባሌ በንቺያ ጋላሳን፣ አሳይ ኮያ ኢሲ አሲ ቃሾፕ ቢርሺያ ምጊ ዴዔስ። 16 ሄ ምዴ ኢሲ ባርባና ዩሱሳ ጊያ ዳሮ ኤሬቲዳ ኢታ አሲ ቃሾ ኬላን ዴዔስ። 17 ሄሳ ጊሾ፣ ዳሮ አሳይ ሺቀዲ ዴዒሺን ጲላሶሲ፣ «ታኒ ሂንቴው ባርባና ዩሱሳ ቢርሾዩ፣ ምይኮ ዩሱሳ ጊያ ኪሪስቶሳ ቢርሾ?» ያጊዲ አሳ አይቺስ። 18 ኢ ሄሳ ጊዳይ ኤንቲ ቃናቲዲ ዩሱሳ አይሲዳይሳ ኤሪያ ጊሾሳ።

19 ጲላሶሲ ፐርዳ ኬላን ኡቲዳሺን፣ ኢያ ማቺያ፣ «ታኒ ሃቺ ቃማ አሙሆን ኢያባ ዳሮ ዋዩታሼ አቂዳ ጊሾ ሄ ጊሎ ኡራ በላ አይቢባካ አሶፋ» ያጋዳ ኪታሱ።

20 ሺን ካሂኔ ሃላቃቲኔ ዴሪያ ጨማቲ ጲላሶሲ ባርባና ቢርሺዲ፣ ዩሱሳ ምዳና ሜላ፣ አሳይ ኢያ ምሳና ሜላ፣ አሳ ጨሚዶሶና።

21 ጲላሶሲ ዛሪዲ ኤንታኮ፣ «ታኒ ኤንታ ናምዓሬ ሂንቴው አና ቢላና ሜላ ኮዩቲ?» ያጊዲ አይቺስ።

ኤንቲ፣ «ባርባና ቢላና ሜላ ኮዩስ» ያጊዶሶና።

22 ጲላሶሲ፣ «ያቲን፣ ዩሱሳ ጊያ ኪሪስቶሳ ዋቶ?» ያጊዲ ኤንታ አይቺስ።

ኡባይ ዛሪዲ፣ «ማስቃሊያ በላ ኢያ ካቃ» ያጊዶሶና።

23 ጲላሶሲ አሳኮ፣ «አይስ? ኢ አይ ኢታባ አሲዴ?» ያጊዲ አይቺስ።

ሺን አሳይ ካሴይሳሬ አሲዲ፣ «ማስቃሊያ በላ ኢያ ካቃ» ጊዲ ዋሲዶሶና።

24 አሺ ዴንጅሶሬ ሃራ አይቢባካ አሳናው ዳንዳዔቶናይሳ ጲላሶሲ ቤዒዲ፣ ሃጅ ኤኪዲ፣ «ሃ ኡራ ሃይቁዋን ታኒ ዴዒኬ። ሄሳ አሴይ ሂንቴና» ያጊዲ አሳ ሲንላን ባ ኩሺያ ሜጩቲስ።

25 አሳ ኡባይ ዛሪዲ፣ «ኢያ ሱሳ ጎሜይ ኑናኔ ኑ ናይታ ጋኮ» ያጊዶሶና።

26 ያቲን፣ ጲላሶሲ ባርባና ኤንታው ቢሊዲ፣ ዩሱሳ ሊሶን ጋራሬዲ፣ ማስቃሊያ በላ ካቂቲዲ ሃይቃና ሜላ ኤንታው አሲዲ ኢሚስ።

ዎታዳሬቲ ዩሱሳ ቁልቂሲዶሶና

(ማር 15: 16-20፤ ዮሃ 19: 2-3)

27 ሄሳፌ ጉዩ፥ ጳላዎሳ ዎታዳሬቲ ዩሱሳ ዴሪያ ሃሬይሳ ሶ ኤኪ ኤፊን፥ ዎታዳሬቲ ኡባይ ኢያ ዩሹዋን ኤቂዶሶና። 28 ኢያ አፊላ ቃሪ ኤኪዲ ዞዎ አፊላ * ማይዚዶሶና። 29 ቃሲ አጉንሳ ካላቻ ጊጊሲዲ፥ ኢያ ሁዔን ዎሲዶሶና። ኢያ ኡሻቻ ኩሺያን ማይሬ ሃምዓ አይሲዲ፥ ኢያ ሲንሳን ጉልባቲዲ፥ «አይሁዴ ካዋው፥ ሙኩሉ ላይሲ ካዎታ!» ያጊዲ፥ ኢያ ቦላ ቁልቂሲዶሶና። 30 ኢያ ቦላ ጨቲዶሶና። ሄ ማይሬ ሃምዓ ኤኪዲ፥ ኢያ ሁዔን ሾጨዶሶና። 31 ኤንቲ ኢያ ቦላ ቁልቂሲዳይሳፌ ጉዩ ዞዎ አፊላ ኢያፕ ቃሪ ኤኪዲ፥ ኢያ አፊላ ኢያ ማይዚዶሶና። ማስቃሊያ ቦላ ኢያ ካቃናው ኤኪ ኤፊዶሶና።

ዩሱሳ ካቂቴሳ

(ማር 15:21-32፤ ሉቃ 23:25-43፤ ዮሃ 19:17-27)

32 ኤንቲ ካሬ ኬዩዲ፥ ኢሲ ሲዋና ጊያ ቁሬና ቢታ አሲ ዴሚዲ፥ ዩሱሳ ማስቃሊያ ዎልቃን ቶሲዶሶና። 33 ጎልጎታ ጊያ ቤሲ ጋኪዶሶና። «ጎልጎታ» ጉሳይ «ጉጌ ቤሲ» ጉሱ። 34 ሄሳን ኤንቲ ጨዩ ዋላኬቲዳ ዎይኔ ኡሻ ኡዮ ጊዲ ኢያው ኢሚዶሶና። ሺን ኢ ሄሳ ጋንጊ ኤኪዲ፥ ኡዮና ኢዲስ።

35 ኤንቲ ማስቃሊያ ቦላ ኢያ ካቂዳይሳፌ ጉዩ ኢያ አፊላ ሻኪዲ፥ ሳማ ዩጊዲ ኤኪዶሶና። 36 ሄሳፌ ጉዩ፥ ያን ኡቲዲ ኢያ ናጊዶሶና። 37 ቃሲ፥ «ሃይሲ አይሁዴ ካወዋ ዩሱሳ» ያጊያ ዋቶ ፀፊያ ኢያ ሁዔ ሶን ዎሲዶሶና። 38 ዩሱሳራ ሄ ዎዴ ናምፀ-ፓንጋታ ኢሱዋ ኢያፕ ኡሻቻ ባጋን፥ ሃንኩዋ ኢያፕ ሃዲርሳ ባጋራ፥ ማስቃሊያ ቦላ ካቂዶሶና።

39 አጊያራ አዲያ አሳይ ዩሱሳ ቦሪዲ፥ ኢያ ቦላ ጨቲሾ፥ 40 «ዶሳ ኪሳ ላላዳ ሄኹ ጋላሳ ጊዶን ኬዳይሶ፥ ኔና አሻ። ኔኒ ዶሳ ናዓ ጊዲኮ፥ አኔ ማስቃሊያ ቦላፌ ዎዳ» ያጊዶሶና።

41 ሄሳዳካ፥ ካሂኔ ሃላቃቲ፥ ሂጌ አስታማሬቲኔ ቢታ ጨማቲ ኢሲፌ ዩሱሳ ቦላ ቁልቂሲዶሶና። ሃይሳዳ ያጊዶሶና። 42 «ሃራታ አሺስ፥ ሺን ባና አሻናው ዳንዳዒቤና። ኢ ኢሰራዔሌ ካዎ ጊዲኮ፥ አኔ ማስቃሊያ ቦላፌ ሃዲ ዎዶ፥ ኑካ ኢያ አማናና። 43 ዶሳን ኢ አማኔቴስ፥ ዶሳይ ኢያ አሻናው ኮይኮ አኔ አሾ፥ አይስ ጊኮ፥ ኢ ባና፥ <ታኒ ዶሳ ናዓ> ጌስ» ያጊዶሶና።

44 ቃሲ ሃሪ አቶሺን፥ ኢያራ ማስቃሊያ ቦላ ካቂቲዳ ፓንጋቲካ ሄሳዳ ጊዲ ኢያ ቦላ ቁልቂሲዶሶና።

* 27:28 ዞዎ አፊላ፥ ቤኒ ዎዴ ካዎቲ ቦላራ ማዲያ አፊላ። 27:34 ማዝ 69:21
 27:35 ማዝ 22:18 27:39 ማዝ 22:7፤ 109:25 27:40 ማቶ 26:61፤ ዮሃ
 2:19 27:43 ማዝ 22:8

ዮሱሳ ሃይቂዋ

(ማር 15:33-41፤ ሉቃ 23:44-49፤ ዮሃ 19:28-30)

45 ኡሱፑን ሳቴፔ ቢዲ፥ ኡዱፋን ሳቴ ጋካናው ቢታ ኡባይ ጳጳሚስ። 46 ኡዱፋን ሳቴ ጊዲያ ዎዴ ዮሱሱ፥ «ኤሎሄ፥ ኤሎሄ፥ ላማ ሳባቂታኒ?» ጊዲ ጊታ ዋሶ ዋሲስ። «ኤሎሄ፥ ኤሎሄ፥ ላማ ሳባቂታኒ?» ጊይሳ ቢርሼሳይ «ታ ያሳው፥ ታ ያሳው፥ ታና አይስ አጋዲ?» ጉሱ።

47 ሄሳን ኤቂዳ አሳፔ ኢሶቲ ኢሶቲ ሄሳ ሲዲዲ፥ «ሃ ኡራይ ኤሊያሳ ዌጌስ» ያጊዶሶና። 48 ኢራ ኤንታፌ ኢሶይ ዎዲ ቢዲ፥ ኢስፖንጄ ኤኪዲ፥ ጫላ ዎይኔ ኡሻ ኩንሲስ። ሄሳ ማይሬ ፃምዓ ዌራን ዎሲዲ ኡሻናው ኢያ ዶናኮ ሺሺስ። 49 ሺን ሃንኮቲ፥ «ናጋ፥ ኤሊያሲ ኢያ አሻናው ያኔኮ አኔ ቤያስ» ያጊዶሶና።

50 ዮሱሱ ናምዓንሶ ጊታ ዋሶ ዋሲዲ፥ ሃይቂ አጊስ።

51 ሄ ሳቴን ያሳ ኬሳን ካቂቲዳ ማጋራጆይ ቆዎፌ ዱጌ ጋካናው ናምዑ ኬዬዲ፥ ፔዴቲ ዎዲስ። ቢታይ ቃዲስ፥ ዛላይካ ጳልቂቲስ።

52 ዱፎቲ ዶዩቲን ያሳ አሳታፔ ዳሮቲ ሃይቆፔ ዴንዲዶሶና።

53 ኤንቲ ዱፎፔ ኬዬዲ፥ ዮሱሲ ሃይቆፔ ዴንዲዳይሳፌ ጉዬ ጌሻ ካታማ ቢዶሶና፤ ያን ኤንቲ ዳሮ አሳስ ቤንቲዶሶና።

54 ማቶ ሃላቃይኔ ኢያራ ዮሱሳ ናጊያ ዎታዳሬቲ ቢታይ ቃዲዳይሳኔ ሄሳን ሃኒዳባ ቤዲዳ ዎዴ ዳሮ ያዬዲ «ቱማ ሃይሲ ያሳ ናዓ» ያጊዶሶና።

55 ሄሳን ዳሮ ማጫሳቲ፥ ጋሊላፔ ዶሚዲ ዮሱሳ ሃጋዘሼ ካሊዳይሳቲ ሃሆን ኤቂዲ ዌሎሶና። 56 ኤንታ ጊዶን ማግዴላ ማይራማ፥ † ያይቆባኔ ዮሴፋ አያ ማይራማኔ ዛብዲዮሳ ማቺያ ዴዎሶና።

ዮሱሳ ሞጌቴሳ

(ማር 15:42-47፤ ሉቃ 23:50-56፤ ዮሃ 19:38-42)

57 ሳዓይ አማርሲያ ዎዴ ዮሴፋ ጊያ ኢሲ ዱሬ ኡራይ፥ አርማቲያሳ ካታማፔ ዩስ። ኢ ባ ሁዔንካ ዮሱሳ ካሊያ አሲ።

58 ዮሴፌ ጲላዎሳኮ ቢዲ፥ ዮሱሳ አሃ ኤካናው ዎሲስ። ጲላዎሲ አሃይ ዮሴፋስ ኢሜታና ሜላ ኪቲስ። 59 ዮሱሳ አሃ ኤኪዲ፥ ጌሻ ሞጎ አፊላን ፃዲስ። 60 ባው ሞጌታናው ሹቻፌ ዎጨዳ አራሳ ጎንጎሎን ኢያ አሃ ዎሲስ። ቃሲ ሄ ጎንጎሎዋ ዶናን ጊታ ሹቻ ጎንዶርሲ ዎሲዲ አጊ ቢስ። 61 ማግዴላ ማይራማኔ ሃንኮ ማይራማ ሄ ጎንጎሎዋኮ ሲሚዲ ኡቲዶሶና።

27:46 ማዘ 22:1 27:48 ማዘ 69:21 27:51 ኬሳ 26:31 27:55 ሉቃ 8:2-3 † 27:56 ማግዴላ ማይራሞ፥ ጉሳይ ማግዴላ ካታማፔ ዩዳ ማይራሞ ጉሱ።

62 ዎንቴሴ ሳምባታ ጋላስ፣ ካሂኔ ሃላቃቲኔ ፋሪሳዌቲ ጲላዎሳኮ ዪዲ፣ ሃይሳዳ ያጊዶሶና፣ 63 «ጎዳው፣ ሃ ዎርዳንቾይ ጋግ ዴዲሼ፣ <ታኒ ሄሹ ጋላሳፕ ጉዩ ሃይቆፕ ዴንዳና> ያጊዳይሲ ኑስ ሃሳዩቲስ።

64 ሄሳ ጊሾ፣ ኢ ሞጌቲዳ ጎንጎሉዋ ሄሹ ጋላስ ጋካናው፣ ሚንሲ ናጋና ሚላ ኪታርኪ። ሄሲ ሃናና ኢዲኮ፣ ኢያ ታማሬቲ ቢዲ ኢያ አሃ ካይሲ ዳይሲዲ፣ <ሃይቆፕ ዴንዲስ> ያጊዲ አሳስ አዲኮ ናምግንሶ ባሌሶይ ኮይሮይሳፌ ኡባ ሃ ኢታና» ያጊዶሶና።

65 ጲላዎሲ ኤንታኮ፣ «ሂንቴው ናጌይሳቲ ዴዎሶና፤ ቢዲ ሂንቴው ዳንዳዔቲዳ ሚላ ናጊሲቴ» ያጊስ።

66 ሄሳ ጊሾ፣ ኤንቲ ቢዲ ዱፎይ ቦሼቶና ሚላ ሹቻ ቦላ ማታሜ ዎሲዲ ዎታዳሬታን ናጊሲዶሶና።

28

ዮሱሳ ሃይቆፕ ዴንዱዋ

(ማር 16:1-10፤ ሉቃ 24:1-12፤ ዮሃ 20:1-10)

1 ሳምባቲ አዲን ዎጋ ዎዴ ዎንታ ጉራ፣ ማግዴላ ማይራማኔ ሃንኮ ማይራማ ዮሱሲ ሞጌቲዳ ጎንጎሉዋ ቢዳናው ቢዶሶና።

2 ቆፖና ዎልቃማ ቢታ ቃይሃ ሃኒስ። ጎዳ ኪታንቾይ ሳሎፕ ዎዲዲ ዱፉዋ ዶናን ዴዲያ ሹቻ ጎንዶርሲዲ ኢያ ቦላ ኡቲስ። 3 ኢያ ማላይ ዎልግንሲ ዳኔስ። ኢያ ማይካ ሻቻዳ ቦሲ። 4 ናጌይሳቲ ኪታንቾዋ ቢዲዲ፣ ያሻን ኮኮሪዲ፣ ሃይቂዳ አሳዳ ሃኒዶሶና።

5 ኪታንቾይ ማጫሳታኮ፣ «ሂንቴ ማስቃሊያ ቦላ ካቂቲዳ ዮሱሳ ኮይሮሳ ታኒ ኤሪያ ጊሾ ያዮፊቴ። 6 ኢ ካሴ አዲዳይሳ ሚላ ሃይቆፕ ዴንዲስ፤ ሃይሳን ዴና። ሃ ዪዲ ኢያ ዜንዲሲዳ ቤሳ ቤዲቴ። 7 ሂንቴ ሃዲ ኤሌሲ ቢዲ፣ ኢያ ታማሬታስ፣ <ዮሱሲ ሃይቆፕ ዴንዲስ፣ ቃሲ ኢ ሂንቴፌ ሲንሳቲዲ ጋሊላ ባና፤ ሂንቴ ኢያ ያን ቤዳና> ያጊዲ አዲቴ። ታኒ ሂንቴው ሃይሳ አዳናው ያስ» ያጊስ።

8 ኤንቲ ያዩሼኔ ዳሮ ኡፋይቲሼ፣ ዱፉዋ ማታፕ ኤሌሲዲ ቢዲ፣ ኢያ ታማሬታስ አዳናው ዎዲዶሶና።

9 ቆፖና ዮሱሲ ኤንታራ ጋሄቲዲ ኤንታኮ፣ «ሳሮይ ሂንቴው ጊዶ» ያጊስ። ኤንቲ ኢያኮ ሺቂዲ፣ ኢያ ቶሁዋ አይኪዲ ኢያው ጎይኒዶሶና። 10 ሄ ዎዴ ዮሱሲ ኤንታኮ፣ «ያዮፊቴ፤ ቢዲ ታ ታማሬቲ ጋሊላ ባና ሚላ ኤንታው አዲቴ። ኤንቲ ያን ታና ቤዳና» ያጊስ።

11 ሄ ማጫሳቲ ቢሺን፣ ዱፉዋ ናጊያ ዎታዳሬታፕ ባጋቲ ካታማ ቢዲ፣ ሃኒዳባ ኡባ ካሂኔ ሃላቃታስ አዲዶሶና። 12 ካሂኔ ሃላቃቲኔ

ጨማቲ ሺቂዲ ዙፊቲዲ፥ ዎታዳሬታስ ዳሮ ሚሼ ኢሚዲ፥ ¹³ «
 <ኑኒ ዲስኪዳሺን ኢያ ታማሬቲ ቃማ ዩዲ፥ ኢያ አሃ ካይሲዶሶና
 ያጊቴ። ¹⁴ ሃ አዳ ዴሪያ ሃሬይሲ ሲዲኮ፥ ሄሲ ሂንቴ ባላ ጊዶናይሳ
 ኑኒ ኢያ አዲ አማንሳና። ሂንቴና አይቢካ ሂርጊሶ።» ያጊዶሶና።
¹⁵ ዎታዳሬቲ ሚሺያ ኤኪዲ፥ ኪቴቲዳይሳዳ አሲዶሶና። ሃ
 አዳይ አይሁዴ ማታን ሃቺ ጋካናው አዴቲሼ ዴዔስ።

ዩሱሲ ባ ታማሬታስ ቆንጨስ

(ማር 16: 14-18፤ ሉቃ 24: 36-49፤ ዮሃ 20: 19-23፤ ሃ.አ 1: 6-8፤ 1ቆሮ 15: 3-8)

¹⁶ ታማኔ ኢሲ ኢያ ታማሬቲ ዩሱሲ ባንታና ቢቴ ጊዳ ጋሊላ
 ዴሪያ ቦላ ቢዶሶና። ¹⁷ ያን ኤንቲ ኢያ ቤዲዳ ዎዴ ኢያው
 ጎይኒዶሶና፥ ሺን ኤንታፌ ኢሶቲ ኢሶቲ ሲዲዶሶና።
¹⁸ ዩሱሲ ኤንታኮ ሺቂዲ፥ «ሳሎኒኔ ሳዓን ማቲ ኡባይ ታው
 ኢሜቲስ። ¹⁹ ሂሃ፥ ሂንቴ ኡባ ቤሲ ቢዲ፥ አዋ፥ ናዓ፥ ጌሻ አያና
 ሱንሳን አሴ ኡባ ፃማቂዲ ታና ካሌይሳታ አሲቴ። ²⁰ ታኒ ሂንቴና
 ኪቲዳባ ኡባ ኤንቲ ናጋና ሜላ ኤንታ ታማርሲቴ። ታኒ ዎዲያ
 ዉርሴላ ጋካናው ኡባ ዎዴ ሂንቴራ ዴዓይስ» ያጊስ።

አራሳ ጫቁዋ ጎፋሉ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 12 Mar 2019 from source files dated 12
Mar 2019
c35d6c73-3843-5482-b53e-7559d35deee5